

MESYUARAT PERTAMA, PENGGAL KELIMA
PARLIMEN KEEMPAT BELAS
2022

HARI KHAMIS : 3 MAC 2022

**JAWAPAN-JAWAPAN BAGI PERTANYAAN-PERTANYAAN JAWAB
LISAN YANG TIDAK DIJAWAB DI DALAM DEWAN
(SOALAN NO. 7, 10 HINGGA NO. 81)**

[SOALAN NO. 7 DIJAWAB BERSEKALI DENGAN SOALAN NO. 78]

NOTA : [RUJUK PENYATA RASMI HARIAN (HANSARD)]

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : YB DATUK WILSON UGAK ANAK KUMBONG
[HULU RAJANG]**

TARIKH : 3 MAC 2022 (KHAMIS)

SOALAN

**DATUK WILSON UGAK ANAK KUMBONG [HULU RAJANG] minta
MENTERI KOMUNIKASI DAN MULTIMEDIA menyatakan:**

- (a) bilangan wifi komuniti yang telah dipasang di rumah panjang-rumah panjang di kawasan Parlimen P.216 Hulu Rajang; dan
- (b) status menaik taraf menara-menara telekomunikasi di kawasan Parlimen P.216 Hulu Rajang di bawah program Jalinan Digital Negara (JENDELA).

JAWAPAN

Tuan Yang di-Pertua,

Saya mohon izin untuk menjawab pertanyaan YB Hulu Rajang bersekali dengan pertanyaan-pertanyaan yang dikemukakan oleh YB Serian pada 3 Mac (No. Soalan 78), YB Betong pada 21 Mac (No. Soalan 7) dan YB Baram pada 24 Mac (No. Soalan 38).

Untuk makluman Ahli Yang Berhormat, Kementerian sentiasa cakna dan memberikan tumpuan kepada penambahbaikan perkhidmatan komunikasi melalui pelaksanaan inisiatif yang menyeluruh menerusi inisiatif Pelan Jalinan Digital Negara (JENDELA) bagi menangani isu akses kepada Internet berkualiti termasuk di negeri Sarawak.

Antara inisiatif untuk merapatkan jurang digital di Sarawak melalui Pelan Jalinan Digital Negara (JENDELA) Fasa 1 setakat 31 Januari 2022 adalah seperti berikut:

| Inisiatif | Tapak Menara Baharu | | Naik Taraf Stesen Pemancar | |
|-------------|---------------------|------|----------------------------|-------|
| | Perancangan | Siap | Perancangan | Siap |
| Sarawak | 836 | 83 | 3,213 | 2,576 |
| Baram | 111 | 1 | 63 | 38 |
| Betong | 23 | 0 | 72 | 46 |
| Hulu Rajang | 60 | 0 | 50 | 35 |
| Serian | 25 | 2 | 88 | 66 |

Peratusan liputan 4G di kawasan berpenduduk di Sarawak juga telah meningkat kepada 82.86% pada suku keempat 2021 berbanding 73.67% sebelum pelaksanaan JENDELA pada suku kedua 2020 manakala liputan di Parlimen Baram, Betong, Hulu Rajang dan Serian adalah seperti berikut:

SOALAN NO : 7

| Parlimen | Liputan Jalur Lebar 4G di Kawasan Berpenduduk | |
|-----------------|--|------------------------------|
| | Sebelum JENDELA (Q2 2020) | Terkini (Q4 2021) |
| Baram | 25.97% | 34.12% |
| Betong | 70.06% | 78.65% |
| Hulu Rajang | 11.21% | 18.31% |
| Serian | 54.27% | 78.75% |

Terdapat sebanyak 105 lokasi telah dipasang dengan jalur lebar satelit termasuklah 100 lokasi di kawasan Rumah Panjang di Parlimen Hulu Rajang. Pembinaan 60 buah menara baharu di parlimen Hulu Rajang pula telah mula dilaksanakan dan dijangka siap secara berperingkat bermula suku keempat 2022 hingga suku ketiga 2023. Manakala terdapat sebanyak 15 stesen pemancar sedia ada di parlimen Hulu Rajang yang sedang dinaik taraf di bawah Projek Penaiktarafan Stesen Pemancar dan dijangka siap sepenuhnya pada suku keempat 2022.

Menjawab pertanyaan YB Hulu Rajang mengenai pemasangan WiFi Komuniti, sehingga kini terdapat tiga lokasi WiFi Komuniti di rumah panjang iaitu Kg Uma Daro dan Kg Baloi Ukap manakala satu lokasi lagi di Kg Sungai Asap. SKMM akan mengkaji keperluan untuk meneruskan projek WiFi Komuniti ini atau menyediakan jalur lebar teknologi lain pada masa hadapan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : YB DATUK SERI SHAMSUL ISKANDAR @
YUSRE BIN MOHD AKIN [HANG TUAH JAYA]**

TARIKH : 3 MAC 2022 (KHAMIS)

SOALAN

DATUK SERI SHAMSUL ISKANDAR @ YUSRE BIN MOHD AKIN [HANG TUAH JAYA] minta MENTERI KOMUNIKASI DAN MULTIMEDIA menyatakan mengenai statistik laporan palsu atau 'scam' setakat tahun 2021 dan apakah strategi dan perancangan Kementerian untuk memastikan panggilan-panggilan telefon sebegini dapat dipantau dan dikesan dengan usaha sama syarikat-syarikat telekomunikasi.

JAWAPAN

Tuan Yang Dipertua,

Bagi tempoh Januari hingga 31 Disember 2021, Suruhanjaya Komunikasi dan Multimedia Malaysia (SKMM) telah menerima sejumlah 2,232 aduan awam berkaitan aktiviti berunsur penipuan, yang seterusnya dirujuk kepada agensi-agensi penguatkuasaan yang berkaitan seperti Polis Diraja Malaysia (PDRM), Kementerian Perdagangan Dalam Negeri dan Hal Ehwal Pengguna (KPDNHEP), Suruhanjaya Sekuriti (SC) dan Bank Negara Malaysia (BNM) untuk perhatian dan tindakan lanjut di bawah bidang kuasa masing-masing.

Melalui usaha sama dengan penyedia perkhidmatan komunikasi, dari tahun 2018 sehingga 2021, sejumlah 1.6 bilion panggilan yang meragukan telah berjaya disekat daripada sampai kepada pengguna. Pihak penyedia perkhidmatan komunikasi juga turut terlibat di dalam satu pasukan petugas khas bagi Penipuan Telekomunikasi dalam usaha mengekang aktiviti penipuan oleh pihak tidak bertanggungjawab melalui panggilan dan khidmat pesanan ringkas (SMS). Dalam masa yang sama, beberapa kempen kesedaran turut diadakan dengan kerjasama pihak syarikat pemberi perkhidmatan dan PDRM menerusi platform SMS media sosial dan penyiaran (televisyen dan radio).

SKMM juga mewujudkan dokumen Rujukan Industri (*Industry Reference*) dalam pelaksanaan peraturan sekatan yang menggariskan tujuh peraturan sekatan pada tahun 2018 bagi mengurangkan jumlah panggilan yang meragukan dan penambahan lima peraturan sekatan pada tahun 2020 bagi mengekang panggilan sampai kepada pengguna. Selain itu, SKMM juga sedang melihat keperluan untuk mewujudkan satu garis panduan baharu bagi mengekang penipuan melalui perkhidmatan SMS.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN LUKANISMAN BIN AWANG
SAUNI (SIBUTI)**

TARIKH : 3 MAC 2022 (KHAMIS)

SOALAN

TUAN LUKANISMAN BIN AWANG SAUNI (SIBUTI) minta **MENTERI PERTANIAN DAN INDUSTRI MAKANAN** menyatakan apakah usaha Kementerian untuk menjadikan industri tanaman bunga atau florikultur sebagai sumber pendapatan kepada masyarakat luar bandar dan adakah usaha membekalkan benih atau anak pokok bunga berkualiti tinggi sebagai langkah galakan kepada penanam bunga.

JAWAPAN

Tuan Yang Di Pertua,

Untuk makluman Ahli Yang Berhormat, industri florikultur merupakan salah satu industri yang telah dikenalpasti dalam Dasar Agromakanan Negara 2021-2030 (DAN 2.0) sebagai bidang yang berpotensi bagi memacu pertumbuhan tanaman bernilai tinggi dan menyumbang kepada pendapatan negara. Iklim dan topografi Malaysia yang sesuai membolehkan pengeluaran produk florikultur diusahakan sepanjang tahun untuk pasaran tempatan dan eksport. Produk tanaman hiasan temperat yang diusahakan di tanah tinggi seperti Cameron Highlands adalah tertumpu bagi pengeluaran produk bunga keratan, keratan daun dan tanaman pasuan manakala pengeluaran produk florikultur di tanah rendah pula lebih tertumpu kepada tanaman hiasan landskap dan juga tanaman pasuan.

Selain itu, antara usaha lain dalam menjadikan industri tanaman bunga sebagai sumber pendapatan adalah dengan mempelbagaikan produk industri florikultur untuk pasaran dunia melalui penghasilan bahan tanaman, biji benih dan mengeksport input keperluan industri. Galakan akan diberi untuk membangunkan produk berkualiti termasuk kraftangan dan produk hiasan dalaman melalui penggunaan teknologi pengawetan bunga dan dedaun. Penggunaan teknologi pengawetan juga akan diperluas bagi pembangunan produk potpourri dan bau-bauan.

Bagi menggalakkan pertumbuhan industri florikultur, Kementerian Pertanian dan Industri Makanan (MAFI) melalui Jabatan Pertanian Malaysia telah menawarkan bantuan dan insentif di bawah Rancangan Malaysia Kesebelas (RMK-11) seperti berikut:

1. Subprojek Transformasi Nurseri Bunga dan Tanaman Hiasan yang menyediakan insentif maksimum RM50,000/ usahawan bagi keluasan minimum 0.2 hektar;

2. Subprojek Kluster Bunga dan Tanaman Hiasan yang menyediakan insentif maksimum RM500,000/ kluster dengan minimum 10 orang usahawan/ kluster ; dan
3. Subprojek Taman Agrotek Florikultur (TAF) yang menyediakan peruntukan RM50,000/ usahawan bagi keluasan minimum 0.4 hektar.

Di bawah Dasar Agromakanan Negara 2021 – 2030 (DAN 2.0), industri florikultur akan terus diberi perhatian oleh MAFI melalui Teras Dasar 2 yang memberi penekanan kepada peningkatan hasil keluaran yang mempunyai permintaan tinggi dan berorientasikan eksport. Jabatan Pertanian Malaysia telah menggubal Akta Perlindungan Varieti Baru Tumbuhan 2004 bagi mendaftar dan melindungi varieti-varieti baru tumbuhan termasuk florikultur yang dihasilkan oleh pembiak baka tumbuhan. Pindaan ini kelak akan dapat menggalakkan pertumbuhan industri florikultur di Malaysia seterusnya menjadi sumber ekonomi yang mampan kepada rakyat Malaysia.

Sebagai langkah galakan kepada penanam bunga, Jabatan Pertanian Malaysia giat menganjurkan program berbentuk khidmat nasihat seperti menyediakan kursus jangka pendek dan panjang, latihan kemahiran kepada usahawan sedia ada dan baharu bagi memastikan perniagaan florikultur ini berkembang mengikut permintaan psaran semasa. Khidmat sokongan akan diperkukuh termasuklah melalui kerjasama awam-swasta bagi membangunkan industri florikultur yang berdaya saing. Tumpuan akan diberi dalam pengeluaran varieti baharu dan bahan tanaman yang berkualiti, pembangunan makmal tisu kultur, pembiakan mikro, pembangunan media steril dan pembangunan teknologi pengangkutan pokok hidup untuk tujuan eksport. Selain itu, khidmat pengembangan akan dipergiat bagi menggalakkan dan memperluas penggunaan teknologi terkini di kalangan pengusaha florikultur dalam usaha untuk meningkatkan produktiviti dan memastikan pengendalian lepas tuai yang cekap dan efisien.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN KHOO POAY TIONG
[KOTA MELAKA]**

TARIKH : 03 MAC 2022 (KHAMIS)

SOALAN

TUAN KHOO POAY TIONG [KOTA MELAKA] minta **MENTERI PELANCONGAN, SENI DAN BUDAYA** menyatakan status dan maklumat terperinci mengenai penggunaan peruntukan Pelan Pemulihan Pelancongan berjumlah RM230 juta sepertimana yang diperuntukkan dalam Belanjawan 2022.

JAWAPAN

Tuan Yang di-Pertua,

1. Melalui Belanjawan 2022, Kementerian Pelancongan, Seni dan Budaya (MOTAC) telah diperuntukkan sejumlah RM230 juta dalam usaha membantu penggiat industri pelancongan, seni dan budaya secara berterusan bagi pasca COVID-19.

2. Perincian agihan bantuan ini adalah seperti berikut:

- (i) Bantuan khas tunai kepada Pemandu Pelancong, Syarikat Pelancongan (TOBTAB), Syarikat Malaysia My Second Home (MM2H), Pengusaha Homestay, Syarikat SPA dan Pusat Urutan Kaki, Usahawan Kraf dan Komuniti Orang Asli Mah Meri dengan jumlah keseluruhan sebanyak RM85juta;
- (ii) Geran Pembaikan Homestay dan Geran Padanan Pembaikan Hotel Bajet sebanyak RM30juta;
- (iii) Geran Padanan berkaitan Pelancongan, Seni dan Budaya sebanyak RM50juta; dan
- (iv) Dana Galakan Aktiviti Promosi & Pelancongan Domestik sebanyak RM65juta yang meliputi:
 - (a) Pemberian Baucar Diskaun/Rebat;
 - (b) Dana Galakan Aktiviti Promosi dan Pengiklanan;
 - (c) Dana Sokongan Promosi & Publisiti Penggiat Pelancongan;
 - (d) Dana Sokongan Penganjuran Acara Menyokong Pengembangan Pelancongan Islam sebanyak; dan
 - (e) *3R Business Events (Reset, Restart, Responsible)*.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : YB PUAN NOR AZRINA BINTI SURIP
[MERBOK]**

TARIKH : 3 MAC 2022 (KHAMIS)

SOALAN

YB PUAN NOR AZRINA BINTI SURIP [MERBOK] minta **MENTERI PENGANGKUTAN** menyatakan apakah kesiapsiagaan Kerajaan dalam memastikan matlamat pengangkutan awam mampu mengadaptasi mengikut perubahan zaman dan mendapat kebolehpercayaan masyarakat.

JAWAPAN

Tuan Yang di-Pertua,

1. Pengangkutan awam darat terbahagi kepada beberapa jenis perkhidmatan iaitu perkhidmatan bas, perkhidmatan rel serta perkhidmatan Teksi dan *e-Hailing*, yang menawarkan perkhidmatan mengikut model operasi masing-masing sepertimana yang telah ditetapkan.
2. Perkhidmatan bas terutamanya bas henti-henti menyediakan perkhidmatan pengangkutan yang menyambungkan pusat-pusat petempatan di kawasan bandar dan luar bandar untuk membawa penduduk ke lokasi-lokasi utama seperti tempat kerja, sekolah dan pekan yang berdekatan. Perkhidmatan rel terutamanya rel bandar seperti perkhidmatan MRT dan LRT merupakan perkhidmatan pengangkutan massa yang pantas serta melalui lokasi-lokasi berdensiti tinggi ke pusat bandar.
3. Bagi perkhidmatan Teksi dan *e-Hailing* ia merupakan pelengkap perjalanan penumpang dalam urusan pergerakan harian. Penumpang boleh menggunakan perkhidmatan Teksi dan *e-Hailing* sama ada sebagai pergerakan jarak dekat, jarak jauh ataupun pengantara sahaja. Kepelbagaian jenis perkhidmatan pengangkutan awam darat ini sekaligus memberi pilihan kepada penumpang untuk melakukan pergerakan dengan lebih cepat dan mudah.
4. Dalam masa beberapa tahun lagi, sebanyak 90 km rel bandar akan ditambah ke dalam rangkaian rel di Lembah Klang / Kuala Lumpur. Projek MRT Putrajaya (MRT2) sejauh 52.2 km dijangka siap sepenuhnya menjelang Januari 2023, manakala projek LRT3 sejauh 37.6 km pula dijangka siap sepenuhnya menjelang Februari 2024. Selain itu, Kerajaan juga sedang melaksanakan pembinaan projek Laluan Rel Pantai Timur (ECRL) sepanjang 665 km yang merupakan projek rel yang akan menghubungkan negeri-negeri di Pantai Timur dengan Pantai Barat Semenanjung Malaysia dan dijangka siap pada tahun 2027.

5. Projek Iskandar Malaysia Bus Rapid Transit (IMBRT) di Johor dijangka bermula sepenuhnya pada akhir tahun 2022, dengan Fasa 1 dijangka beroperasi pada akhir tahun ini. IMBRT mempunyai liputan rangkaian sepanjang 2,051km yang terdiri daripada 63km (*Trunk Line*), 1,247 km (*Direct Line*) dan 741km (*Feeder Line*) yang melibatkan pelbagai laluan. Perkhidmatan BRT ini mampu menampung seramai 4,500 jumlah penumpang perjam sehalu.

6. Bagi memastikan kesalinghubungan perkhidmatan bas kepada rakyat, Kerajaan telah menyediakan perkhidmatan bas 'MyBAS' di 4 ibu negeri iaitu Kangar, Ipoh, Seremban dan Kuala Terengganu. Bagi tahun 2022 Kerajaan telah memperuntukan sebanyak RM78 juta bagi membiayai program ini di mana ianya turut diperluaskan ke Johor Bahru pada tahun 2022. Bagi perluasan SBST JB, Kerajaan telah memperuntukan sebanyak RM150 juta bagi tempoh tiga tahun sebagai usaha Kerajaan dalam meningkatkan kualiti perkhidmatan bas di negeri itu sekali gus menggalakkan penggunaan bas sebagai mod pilihan rakyat. Selain itu, Kerajaan juga memberi bantuan sokongan dana menerusi program Dana Sementara Perkhidmatan Bas Berhenti-henti (ISBSF) kepada 46 pengendali bas yang menjalankan perkhidmatan bas berhenti-henti di seluruh Semenanjung Malaysia agar perkhidmatan bas terutamanya di laluan-laluan sosial luar bandar tidak terjejas.

7. Selain itu, Kerajaan juga telah meneruskan Pas Perjalanan Tanpa Had My50 bagi perkhidmatan rel dan bas kendalian RapidKL bagi Lembah Klang dan Pulau Pinang. Kerajaan juga telah memperkenalkan inisiatif MyRail5 khusus bagi perkhidmatan KTM Komuter di sektor Lembah Klang, Utara dan Antarabandar Kuala Lipis – Tumpat untuk pelajar sekolah Tahun 1 sehingga Tingkatan 6 dan golongan orang kurang upaya kendalian Keretapi Tanah Melayu Berhad. Inisiatif ini merupakan suatu usaha untuk mengurangkan kos sara hidup dan menjaga kebajikan pelajar sekolah dan golongan orang kurang upaya serta meringankan beban mereka yang menggunakan perkhidmatan kereta api.

8. Perkhidmatan teksi dan e-hailing iaitu tempahan kenderaan secara atas talian merupakan pelengkap kepada jaringan pengangkutan awam dari segi perjalanan batuan pertama dan akhir. Sesuai dengan arus perubahan teknologi semasa, perkhidmatan e-hailing mempunyai liputan lebih meluas dan dapat memenuhi permintaan pelanggan dengan lebih baik berbanding kaedah tradisional (tahanan tepi jalan atau di pengkalan). Pada masa yang sama, perkhidmatan teksi atau kereta sewa tradisional juga dibenarkan untuk menggunakan platform e-hailing untuk memastikan mereka terus berdaya saing selari dengan perkembangan teknologi di dalam memberikan kemudahan kepada pengguna.

Sekian terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : PUAN RUSNAH BINTI ALUAI
[TANGGA BATU]**

TARIKH : 3 MAC 2022 (KHAMIS)

SOALAN

PUAN RUSNAH BINTI ALUAI [TANGGA BATU] minta **MENTERI KANAN PENDIDIKAN** menyatakan apakah hala tuju bagi pelajar yang mempelajari bidang Pendidikan dan Latihan Teknikal dan Vokasional memandangkan hanya beberapa universiti sahaja setaraf Sarjana Muda yang ditawarkan kepada pelajar-pelajar.

JAWAPAN

Tuan Yang di-Pertua,

Untuk makluman Ahli Yang Berhormat, hala tuju yang disasarkan oleh Kementerian Pendidikan Malaysia (KPM) bagi pelajar lepasan kolej vokasional (KV) ialah 70 peratus bekerja di industri, 20 peratus menyambung pengajian dan 10 peratus menjadi usahawan.

Program pengajian peringkat Diploma Vokasional Malaysia (DVM) yang dilaksanakan di KV mematuhi standard program yang ditetapkan oleh *Malaysia Qualifications Agency* (MQA) dan *Malaysian Board of Technologists* (MBOT) dan mendapatkan akreditasi daripada kedua-dua agensi ini. Justeru, program DVM dapat membuka peluang kepada graduan untuk melanjutkan pengajian ke peringkat Sarjana Muda di universiti awam dan swasta. Perkara ini adalah selaras dengan surat siaran Jabatan Pendidikan Tinggi bertarikh 20 November 2019 mengenai kemasukan ke universiti awam dan 21 April 2020 mengenai kemasukan ke institut pendidikan tinggi swasta.

Dari tahun 2018 hingga 2020, terdapat lebih daripada 3,000 orang graduan DVM yang melanjutkan pengajian ke peringkat Sarjana Muda di rangkaian universiti teknikal Malaysia (*Malaysian Technical University Network*). Selain itu, terdapat juga graduan DVM yang melanjutkan pengajian Sarjana Muda di luar negara seperti di *Pacific International Hotel Management School* (PIHMS) New Zealand, *Business & Hotel Management School* (BHMS) Switzerland dan *Tianjin University of Technology*, China.

KPM yakin graduan TVET KV KPM mampu mengisi keperluan industri seperti yang dihasratkan dan juga mampu untuk melanjutkan pengajian ke peringkat yang lebih tinggi.

Sekian, terima kasih.

**PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' SRI HAJAH ROHANI BINTI HAJI ABDUL
KARIM (BATANG LUPAR)**

TARIKH : 3 MAC 2022 (KHAMIS)

SOALAN

Minta **MENTERI PENGAJIAN TINGGI** menyatakan sejauh manakah pendekatan dan pemahaman Matlamat Pembangunan Lestari diketengahkan dalam kalangan pelajar di Institut Pendidikan Tinggi sama ada dalam subjek mata pelajaran mahupun aktiviti ko-kurikulum.

JAWAPAN

Tan Sri Yang di-Pertua,

Kementerian Pengajian Tinggi (KPT) melalui Institusi Pendidikan Tinggi (IPT) sentiasa menyokong usaha Kerajaan bagi mencapai Matlamat Pembangunan Lestari menjelang tahun 2030. Justeru, kekuatan dan sumber kepakaran di IPT terus diperkukuh dan digunakan secara optimum ke arah keseimbangan persekitaran, masyarakat dan ekonomi.

Untuk itu, KPT telah memperkenalkan beberapa inisiatif, antaranya ialah program *Service Learning Malaysia – University for Society* (SULAM) dan “*University for Society@Keluarga Malaysia* atau UNiTY”. Di samping itu, kementerian turut memberikan penekanan kepada *Education for Sustainable Development* atau ESD sebagai pemboleh daya utama dalam mencapai *Sustainable Development Goals* (SDG). IPT juga secara berterusan melaksanakan pembangunan program akademik baharu, membuat semakan kurikulum secara berkala serta melaksanakan pemetaan program akademik agar selaras dengan Matlamat Pembangunan Lestari. Usaha-usaha ini adalah bagi memastikan kurikulum di IPT kekal relevan dalam melahirkan graduan yang berpengetahuan, berkemahiran dan bertanggungjawab selari dengan kehendak semasa.

Jabatan Pendidikan Politeknik dan Kolej Komuniti (JPPKK), seiring dengan aspirasi *Technical and Vocational Education and Training – Education for Sustainable Development* (TVET-ESD) negara turut menyokong penuh usaha merealisasikan Matlamat Pembangunan Lestari dengan melaksanakan beberapa inisiatif seperti berikut:

- i. Menterjemahkan *Sustainable & Development Goals* (SDG) di peringkat global dan Dasar Teknologi Hijau Kebangsaan (DTH) di peringkat kebangsaan melalui *Blueprint POLYGreen* 2015 – 2020 dan *Blueprint Smartgreen* POLYCC 2021 – 2026 sebagai garis panduan pelaksanaan amalan hijau;

SOALAN NO : 17

- ii. Menawarkan kursus “Pematuhan Teknologi Hijau” (*Green Technology Compliance*);
- iii. Menerapkan amalan hijau (*green practices*) dalam semua kurikulum program pengajian politeknik;
- iv. Menerapkan elemen tanggungjawab dan peranan insan dalam memelihara alam sekitar melalui kursus wajib Mata Pelajaran Umum (MPU), iaitu Pendidikan Islam, Pendidikan Moral dan Nilai Masyarakat;
- v. Menawarkan kursus pilihan bagi MPU Kategori U4 (kelab) seperti Kelab Alam Sekitar, Kelas 5S serta Kelab Inovasi dan Reka Cipta supaya dapat memupuk pembudayaan amalan lestari dalam kalangan pelajar; dan
- vi. Menerapkan elemen lestari dalam aktiviti kesukarelawanan yang melibatkan pelajar politeknik dan kolej komuniti melalui badan sukarelawan di institusi seperti YES Politeknik dan BriSK Kolej Komuniti.

Selain itu, bagi menjamin kualiti program yang ditawarkan, KPT melalui Agensi Kelayakan Malaysia (*Malaysian Qualifications Agency*, MQA), menekankan pembentukan kurikulum program berasaskan kepada lima (5) kluster hasil pembelajaran seperti yang terkandung dalam dokumen Kerangka Kelayakan Malaysia (Edisi Kedua).

Antaranya termasuklah pengetahuan dan pemahaman (*knowledge and understanding*), kemahiran kognitif (*cognitive skills*) dan lain-lain. Aspek amalan lestari (*sustainable practices*) juga turut dimasukkan sebagai salah satu elemen hasil pembelajaran yang perlu dicapai di bawah kluster Etika dan Profesionalisme, selain turut diselaraskan dalam dokumen jaminan kualiti yang lain seperti Kod Amalan Akreditasi Program TVET, Standard Ijazah Sarjana dan Kedoktoran (Edisi Kedua) dan Standard-Standard Program edisi yang terkini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' HAJI MAHFUZ BIN HAJI OMAR
[POKOK SENA]**

TARIKH : 3 MAC 2022 (KHAMIS)

SOALAN

DATO' HAJI MAHFUZ BIN HAJI OMAR [POKOK SENA] minta **MENTERI PERTANIAN DAN INDUSTRI MAKANAN** menyatakan apakah langkah dan tindakan Kementerian menangani kenaikan kos bahan input pertanian yang begitu tinggi yang menyebabkan kos pengeluaran padi semakin tinggi dan pendapatan bersih petani padi makin berkurang.

JAWAPAN

Tuan Yang Di Pertua,

Untuk makluman Ahli Yang Berhormat, Secara umumnya, Kerajaan telah membelanjakan hampir RM1 bilion saban tahun bagi menyediakan subsidi input pertanian untuk pembangunan industri padi negara. Jumlah ini merangkumi hampir 60% daripada kos pengeluaran padi sehektar dan bakinya ditanggung oleh para pesawah sendiri. Antara bentuk subsidi input pertanian yang diberikan meliputi Skim Baja Padi Kerajaan Persekutuan (SBPKP) dalam bentuk baja urea dan baja sebatian; Skim Insentif Pengeluaran Padi (SIPP) dalam bentuk bantuan baja NPK tambahan, bajak, racun makhluk perosak dan pengapuran; Insentif Benih Padi Sah (IBPS); dan Skim Baja dan Racun Padi Bukit (SBRPB) di mana baja dan racun yang diberikan adalah khusus untuk penanaman padi bukit di Sabah dan Sarawak sahaja.

Walau bagaimanapun, Kerajaan amat prihatin dengan keluhan para pesawah berikutan berlakunya peningkatan kos dan harga bahan racun yang ketara. Ianya tidak dapat dielakkan memandangkan sebahagian besar bahan dan material racun di pasaran tempatan yang diimport dari luar negara mendapat permintaan yang tinggi, negara-negara pengeksport bahan racun telah mengurangkan penghasilan material susulan pandemik wabak COVID-19, dan sebagainya. Oleh yang demikian, mengambil kira keadaan semasa, Kerajaan telah menaikkan kadar bantuan bersubsidi racun makhluk perosak di bawah program SIPP daripada RM200/hektar per musim kepada RM300/hektar per musim untuk tahun 2022. Kadar ini akan dapat menampung pembelian empat (4) botol racun pelbagai jenama di bawah senarai SIPP yang mana harganya adalah terkawal untuk setiap hektar per musim berdasarkan keperluan oleh pesawah. Kenaikan kadar ini melibatkan implikasi kewangan sebanyak RM62 juta kepada Kerajaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : JAWAB LISAN

**DARIPADA : YB TUAN KARUPAIYA A/L MUTUSAMI
[PADANG SERAI]**

TARIKH : 03 MAC 2022 (KHAMIS)

SOALAN

TUAN KARUPAIYA A/L MUTUSAMI [PADANG SERAI] Minta **MENTERI PENGANGKUTAN** menyatakan penjelasan mengenai pembaharuan lesen GDL yang mana timbul kekeliruan di kalangan pemandu lori beranggapan lesen tersebut untuk pembaharuan satu tahun dan dua tahun.

JAWAPAN

Tuan Yang di-Pertua,

1. Berdasarkan ketetapan peraturan sedia ada, tarikh tamat sesuatu lesen memandu akan diselaraskan mengikut tarikh lahir pemegang lesen tersebut. Walau bagaimanapun, sekiranya pemegang lesen tersebut memperbaharui Lesen Memandu Vokasional (GDL, PSV) tersebut selepas daripada tarikh lahir di mana berlakunya kelewatan dalam membuat permohonan pembaharuan, pemegang lesen akan dikenakan pelarasan tamat tempoh lesen kepada tarikh lahir pemohon pada tahun yang berikutnya, menjadikan tempoh kuatkuasa lesen pemohon adalah kurang daripada dua (2) tahun.

2. Dalam hal ini, penetapan **Fi untuk pembaharuan lesen** yang tersebut di atas hendaklah mematuhi ketetapan sedia ada di bawah **Kaedah 4A, Kaedah-kaedah Kenderaan Barang (Pelesenan Pemandu) 1965** iaitu dengan amaun RM 20.00 setahun.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

DARIPADA : TUAN CHOW KON YEOW [TANJONG]

TARIKH : 03 MAC 2022 (KHAMIS)

SOALAN

TUAN CHOW KON YEOW [TANJONG] minta **MENTERI KEWANGAN** menyatakan adakah Kerajaan akan mengkaji semula Perkara 109(1)(a) serta Bahagian I Jadual Kesepuluh Perlembagaan Persekutuan berhubung sumbangan geran populasi kepada setiap negeri yang dilaksanakan kini. Nyatakan tempoh pelaksanaannya jika ya, sekiranya tidak, apakah sebabnya.

JAWAPAN

Tan Sri Yang di Pertua,

Untuk makluman, kadar Pemberian Mengikut Bilangan Orang telah dipinda beberapa kali dan kadar yang diguna pakai pada masa ini adalah berdasarkan kepada pindaan yang diluluskan pada bulan Julai 2002 melalui Akta 622 berkuat kuasa mulai 1 Januari 2002. Pada masa ini, Kerajaan Persekutuan belum bercadang untuk melaksanakan kajian semula ke atas formula dan asas pengiraan mengikut bilangan orang. Ini kerana cadangan ini akan melibatkan implikasi kewangan yang besar dan akan menjejaskan usaha Kerajaan dalam proses pemulihan semula ekonomi Negara.

Walau bagaimanapun, Kementerian Kewangan akan terus komited untuk mengkaji dan menimbang sebarang penambahbaikan ke atas Pemberian kepada negeri-negeri, tertakluk kepada kemampuan kewangan Kerajaan Persekutuan.
Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK SERI DR. SHAMSUL ANUAR BIN
HAJI NASARAH [LENGGONG]**

TARIKH : 03 MAC 2022 (KHAMIS)

SOALAN

**DATUK SERI DR. SHAMSUL ANUAR BIN HAJI NASARAH
[LENGGONG]** minta **MENTERI PELANCONGAN, SENI DAN
BUDAYA** menyatakan apakah usaha pihak Kementerian untuk
mempertingkatkan industri arkeo-pelancongan di Geopark Kebangsaan
Lenggong di peringkat domestik dan global.

JAWAPAN

Tuan Yang di-Pertua,

1. Kementerian Pelancongan, Seni dan Budaya (MOTAC) menerusi agensinya, Jabatan Warisan Negara (JWN) melaksanakan fungsinya di bawah Akta Warisan Kebangsaan 2005 [Akta 645] untuk memulihara, memelihara dan melindungi tapak melalui penyelidikan dan pembangunan (R&D) sebagaimana dirancang.

2. Di samping itu, MOTAC sentiasa melaksanakan usaha untuk mempertingkatkan industri arkeo-pelancongan di Tapak Warisan Dunia Lembah Lenggong. Antaranya ialah:

- (i) dengan menyebarkan program peringkat global kepada golongan sasaran iaitu belia di Tapak Warisan Dunia Lembah Lenggong melalui program *World Heritage Volunteers (WHV) Campaign 2022 – Resilience and Re-mobilization towards World Heritage*. Antara intipati program ini adalah aktiviti-aktiviti yang akan melibatkan belia, bersifat "*non-profit*" dan berkaitan dengan Tapak Warisan Dunia;
- (ii) mempromosi pelancongan berteraskan penyelidikan arkeologi secara berterusan dengan kehadiran para penyelidik dan penuntut dari Institusi Pengajian Tinggi Awam / Swasta di Malaysia yang menjadikan Lembah Lenggong sebagai lokasi kajian ilmiah mereka. Contoh institusi yang terlibat ialah Pusat Penyelidikan Arkeologi Global, USM dan Fakulti Teknikal dan Vokasional, UPSI, Universiti Tunku Abd Rahman (UTAR), Kolej Komuniti Gerik serta Kolej Komuniti Lenggong;
- (iii) menjalinkan kerjasama dengan para pemain industri sektor pelancongan tempatan dalam mempromosikan pakej-pakej pelancongan milikan masing-masing dengan menjadikan lokasi Arkeologi Lembah Lenggong sebahagian dari pakej pelancongan yang mereka tawarkan;

SOALAN NO : 21

- (iv) melaksanakan projek menaik taraf Galeri Arkeologi Lembah Lenggong Fasa 1 yang melibatkan penambahan galeri baru untuk 'Perak Man' dan Pejabat JWN Zon Tengah. Pihak JWN juga dalam proses menaik taraf Galeri Arkeologi Lembah Lenggong Fasa 2 membabitkan kerja-kerja menaik taraf galeri pameran secara keseluruhan bagi memperkukuh dan meningkatkan kredibiliti Warisan Arkeologi Lembah Lenggong Perak sebagai Tapak Warisan Dunia UNESCO;
- (v) sentiasa memberi perhatian kepada usaha untuk memelihara Tapak Warisan Dunia di Malaysia termasuk Lembah Lenggong, Perak. Antaranya adalah memastikan pematuhan Pelan Pengurusan Pemuliharaan (*Conservation Management Plan*) dan Rancangan Kawasan Khas (*Special Area Plan*) yang secara langsung dapat mengekalkan Nilai Keunggulan Sejagat (*Outstanding Universal Value*) agar integriti dan keasliannya terpelihara; dan
- (vi) melaksanakan kerja-kerja penyelenggaraan dan pemantauan di beberapa tapak gua di sekitar Lembah Lenggong termasuklah Gua Harimau, Gua Badak, Gua Gunung Runtuh, Gua Asar dan Gua Teluk Kelawar dengan memastikan ia sentiasa terpelihara dan tidak diganggu oleh pihak yang tidak bertanggungjawab.

3. Di samping itu, Karnival Lenggong secara atas talian dilaksanakan sebagai salah satu program pengembangan berkaitan Tapak Warisan Dunia yang melibatkan komuniti setempat, pencinta warisan dan budaya dari seluruh negara dan juga luar negara.

4. Penglibatan di peringkat antarabangsa juga diadakan melalui Sesi Perkongsian Ilmu Tapak Warisan Dunia di Asia Tenggara dengan kehadiran para pengurus tapak membicarakan penemuan di tapak-tapak yang berkaitan seperti Sangiran, Indonesia dan Gua Niah, Sarawak. Pada masa yang sama, Program Pemuliharaan Tapak Warisan Dunia Lembah Lenggong juga diadakan di seluruh tapak arkeologi bersama komuniti setempat dan wakil jabatan yang terlibat dalam melindungi Warisan Arkeologi Lembah Lenggong, Perak.

SOALAN NO : 21

5. Pelbagai inisiatif promosi juga dilaksanakan melalui Tourism Malaysia, iaitu satu lagi agensi di bawah MOTAC. Antaranya:

- (i) akan mengadakan seminar/bengkel kepada agensi-agensi pelancongan di Wilayah Utara untuk membangunkan pakej arkeopelancongan di Lembah Bujang dan juga Lembah Lenggong seterusnya mempromosikan tapak-tapak warisan khazanah negara;
- (ii) membawa masuk krew-krew penggambaran televisyen untuk membuat liputan serta membuat penggambaran di kawasan Lenggong untuk mempromosi produk pelancongan di situ. Antaranya adalah Penggambaran Program Travelog *Gastronomic Trail of Malaysia* pada 25-26 Februari 2022 oleh Radio Televisyen Malaysia (RTM); dan
- (iii) melaksanakan atau menyertai misi jualan/pemasaran yang menyediakan platform pertemuan di antara penggiat industri tempatan dari seluruh negara bagi menjalin hubungan dan kerjasama rapat dalam merencanakan lagi industri pelancongan.
- (i) bekerjasama dengan penggiat industri seperti pemandu pelancong dan pemilik produk pelancongan dengan mengadakan program promosi webinar, virtual tour dan *online travel fair* pasaran antarabangsa walaupun sempadan negara masih ditutup; dan
- (ii) mengadakan promosi berterusan di pasaran antarabangsa mengenai produk dan destinasi pelancongan yang menarik di setiap negeri melalui laman media sosial.

Sekian, terima kasih.

**PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

DARIPADA : DATUK DR. HASAN BIN BAHROM (TAMPIN)

TARIKH : 3 MAC 2022 (KHAMIS)

SOALAN

DATUK DR. HASAN BIN BAHROM (TAMPIN) minta **MENTERI PENGAJIAN TINGGI** menyatakan hasil penyelidikan yang dilakukan oleh ahli akademik, berapa jumlah telah dipatenkan, bolehkah Kementerian memberikan beberapa contoh pembangunan negara yang berjaya hasil daripada penyelidikan akademik tempatan dan sejauh mana hasil penyelidikan itu telah dimanfaatkan oleh negara luar.

JAWAPAN

Tan Sri Yang di-Pertua,

Berdasarkan kepada Data *Malaysia Research Assessment* (MyRA)[®] sepanjang Rancangan Malaysia Ke-11(RMKe-11), iaitu dari tahun 2016 hingga 2020, sebanyak 938 paten telah diperolehi bagi *patent granted* tempatan, manakala *patent granted* antarabangsa adalah sebanyak 83 paten.

Dalam hal berkaitan, terdapat projek penyelidikan yang telah diluluskan di bawah Dana Penyelidikan *Fundamental* (DPF) di bawah Kementerian Pengajian Tinggi (KPT) yang telah dipatenkan di peringkat antarabangsa, iaitu *Molecular Diagnostic Method for Rapid and Accurate Identification of Malaria Parasite Species*. Projek ini diterajui oleh Universiti Malaysia Sabah (UMS) dengan kerjasama Universiti Monash Malaysia, Universiti Malaya (UM) dan Jabatan Hidupan Liar Sabah

(*Sabah Wildlife Department*) sebagai rakan strategik. Projek ini memberikan fokus kepada faktor-faktor penyumbang risiko serta strategi pengawalan *Zoonotic Malaria*.

Hasil penyelidikan ini telah menyumbang kepada penyediaan garis panduan Pertubuhan Kesihatan Dunia (WHO) untuk rawatan dan pengurusan *Plasmodium Knowlesi*, iaitu parasit yang menyebabkan malaria pada manusia dan kumpulan monyet (*primates*). Projek penyelidikan ini juga telah mendapat tajaan daripada Majlis Penyelidikan UK (*London School of Hygiene & Tropical Medicine*) dengan jumlah kira-kira RM1.26 juta.

Selain itu, sebuah projek penyelidikan di bawah DPF KPT pada tahun 2015, iaitu *Green Technology and Nanomaterial Applications for the Mitigation of Greenhouse Gases (GHGs)* juga telah dimanfaatkan oleh universiti luar negara. Projek ini diterajui oleh Universiti Sains Malaysia (USM) dengan kerjasama Universiti Teknologi Malaysia (UTM), Universiti Putra Malaysia (UPM) dan Universiti Monash Malaysia.

Syarikat Petroliaam Nasional Berhad (PETRONAS) terlibat sebagai kolaborator strategik bersama-sama beberapa kolaborator antarabangsa terkemuka seperti Universiti Teknologi Wuhan, Universiti Osaka dan University of New South Wales. Hasil kolaborasi projek ini, satu perjanjian usaha sama antara USAINS (syarikat milik USM) dan NANOMALAYSIA telah ditandatangani dan menyumbang kepada rangka Dasar dan Strategi Nanoteknologi Negara (DSNN) 2021 – 2030.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN YUSUF BIN ABD. WAHAB
(TANJONG MANIS)**

TARIKH : 3 MAC 2022 (KHAMIS)

SOALAN

TUAN YUSUF BIN ABD. WAHAB (TANJONG MANIS) minta **MENTERI PERTANIAN DAN INDUSTRI MAKANAN** menyatakan status pembekuan pemberian lesen kepada para nelayan pantai (Zon A) di Parlimen Tanjong Manis. Pembekuan lesen ini telah menjejaskan peluang nelayan-nelayan untuk menangkap ikan dan mendapat bantuan-bantuan dari Kementerian.

JAWAPAN

Tuan Yang Di Pertua,

Untuk makluman Ahli Yang Berhormat, sejak tahun 1982, Kementerian Pertanian dan Industri Makanan (MAFI) telah membekukan semua pengeluaran lesen vesel dan peralatan menangkap ikan bagi Zon A, B dan C kecuali bagi vesel menangkap ikan yang beroperasi di laut dalam iaitu Zon C2 di Pantai Timur Semenanjung Malaysia, Sabah dan Sarawak serta Zon C3.

Pembekuan ini dilaksanakan setelah mengambil kira status sumber perikanan dan tahap tampungan bilangan vesel penangkapan ikan sedia ada yang beroperasi di dalam perairan Malaysia telah mencapai tahap optimum.

Pada tahun 2021, MAFI telah mempertimbangkan sebanyak 660 permohonan baru untuk Lesen Sampan Khas bagi negeri Sarawak melalui Program Pemutihan ke atas lesen Zon A di seluruh negara. Sebanyak 37 permohonan telah diterima dari kawasan Tanjong Manis dan dari jumlah tersebut, 26 permohonan telah diluluskan Pemberian Lesen Sampan Khas.

Kelulusan lesen adalah tertakluk kepada proses pemutihan yang dijalankan dari masa ke semasa bergantung kepada keupayaan daya tampungan (*carrying capacity*) sesebuah kawasan berbanding dengan sumber perikanan sedia ada. Ini bertujuan untuk memastikan sumber perikanan dapat diuruskan secara mapan serta mengurangkan kesesakan di zon tangkapan.

Nelayan-nelayan tulen sedia ada di Sarawak khususnya di kawasan Tanjong Manis digalakkan untuk meneroka perairan perikanan laut dalam negeri tersebut. Sebanyak 560 buah kuota lesen laut dalam telah dibuka untuk permohonan baru dengan memanfaatkan kemudahan pangkalan sedia ada di Pelabuhan Perikanan Laut Dalam Tanjong Manis dan Pelabuhan LKIM Tanjong Bako.

MAFI sentiasa komited dalam melaksanakan pelbagai inisiatif bantuan bagi membantu golongan nelayan untuk mengurangkan kos operasi, meningkatkan produktiviti, taraf hidup dan pendapatan antara bantuan yang diberikan adalah:

- i. Skim Tabung Bantuan Bencana Alam dan Kebajikan Nelayan;
- ii. Program Rezeki Tani;
- iii. Program Pembangunan Pelan Peningkatan Pendapatan Golongan B40: Nelayan Melalui Projek Tanaman Kontan;
- iv. Program Pembangunan Kumpulan Nelayan;
- v. Program Pasar Nelayan;
- vi. Program Khas Perumahan Nelayan (PKPN);
- vii. Skim Keselamatan Sosial Pekerjaan Sendiri (SKSPS);
- viii. Dana Nelayan (SNEP);
- ix. Subsidi Minyak;
- x. Geran Pemadanan *Change Upgrade Product (CUP)*;
- xi. Geran Pemadanan *High Impact Product (HIP)*;
- xii. Program Agropreneur Muda; dan
- xiii. Pembangunan Modal Insan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK SERI DR. SHAMSUL ANUAR
BIN HAJI NASARAH [LENGGONG]**

TARIKH : 03 MAC 2022 (KHAMIS)

SOALAN

**DATUK SERI DR. SHAMSUL ANUAR BIN HAJI NASARAH
[LENGGONG]** minta **MENTERI KEWANGAN** menyatakan adakah pihak Kerajaan menerusi Bank Negara bercadang untuk menaikkan Kadar Dasar Semalaman (OPR) dan apakah kesannya kepada prospek keseluruhan inflasi dan pertumbuhan dalam negara.

JAWAPAN

Tan Sri Yang Di Pertua,

Dasar monetari ditentukan oleh Jawatankuasa Dasar Monetari (atau *Monetary Policy Committee*, MPC) di Bank Negara Malaysia (atau BNM). Mandat MPC BNM adalah untuk memastikan bahawa pendirian dasar monetari kekal konsisten dengan objektif mengekalkan kestabilan harga dan menentukan pertumbuhan ekonomi yang mampan di Malaysia.

Seperti yang dinyatakan oleh MPC BNM dalam mesyuaratnya yang terkini iaitu pada Januari 2022, Jawatankuasa berkenaan menyifatkan pendirian semasa dasar monetari adalah wajar dan akomodatif bagi menyokong ekonomi semasa. Pada masa hadapan, ekonomi negara diunjurkan pulih secara beransur-ansur dalam keadaan tekanan harga yang terkawal.

Walau bagaimanapun, berikutan keadaan pandemik yang tidak menentu serta risiko gangguan rantai bekalan, sebarang pelarasan OPR oleh MPC BNM akan ditentukan berdasarkan data dan maklumat terkini terhadap prospek keseluruhan inflasi dan pertumbuhan ekonomi.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK WIRA HAJI MOHD. ANUAR
MOHD. TAHIR [TEMERLOH]**

TARIKH : 3 MAC 2022 (KHAMIS)

SOALAN

DATUK WIRA HAJI MOHD. ANUAR MOHD. TAHIR (TEMERLOH) minta **MENTERI PERTANIAN DAN INDUSTRI MAKANAN** menyatakan meneliti pengusaha ikan patin yang terjejas teruk seperti MZ Agriculture yang telah kerosakan lebih 70 sangkar dan kerugian lebih RM100,000 apabila air banjir kali ini membawa kayu-kayu balak dan merosakkan sangkar.

JAWAPAN

Tuan Yang Di Pertua,

Untuk makluman Ahli Yang Berhormat, banjir besar telah melanda negara pada Disember 2021 dan dilaporkan bahawa terdapat seramai 450 orang penternak akuakultur dan 95 orang nelayan darat di seluruh negara telah mengalami kerugian berjumlah RM36.97juta. Kerugian yang dianggarkan bagi negeri Pahang adalah sebanyak RM12.10juta melibatkan 275 orang penternak ikan termasuklah MZ Agriculture. Bagi Daerah Temerloh, seramai 158 orang penternak dilaporkan terkesan akibat daripada bencana banjir dengan nilai kerugian berjumlah RM9.69juta.

Kementerian Pertanian dan Industri Makanan (MAFI) telah memperakukan sebanyak RM5.02juta melalui Peruntukan

Pembangunan Semula Projek Agromakanan (PPSPA) untuk membantu semua penternak akuakultur dan nelayan darat yang terkesan akibat banjir.

MAFI juga telah melaksanakan beberapa langkah dalam usaha mengurangkan impak bencana alam seperti banjir kepada penternak akuakultur antaranya:

- i. menasihati penternak untuk mengurangkan aktiviti pembenihan atau ternakan sebelum musim banjir, menuai hasil ternakan yang telah mencapai saiz pasaran sebelum musim banjir; dan
- ii. memberikan bantuan input ternakan seperti benih serta menyediakan khidmat nasihat teknikal bagi membantu penternak mengoperasikan semula aktiviti ternakan yang terjejas.

Pada tahun 2021, sejumlah 1,904,330 ekor benih ikan bernilai RM439,723.00 telah diberikan secara percuma kepada 472 orang penternak di negeri Pahang. Bagi Daerah Temerloh, sebanyak 233,150 ekor benih ikan bernilai RM53,624.50 telah diberikan secara percuma kepada 91 orang penternak. Berikutan banjir besar melanda negeri Pahang, sejumlah 91,250 ekor benih ikan bernilai RM146,140.00 diberikan secara percuma kepada 149 orang penternak yang terjejas bermula 1 Januari 2022 sehingga kini.

Sekian, terima kasih.

**PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK SERI DR. HAJI DZULKEFLY BIN
AHMAD (KUALA SELANGOR)**

TARIKH : 3 MAC 2022 (KHAMIS)

SOALAN

DATUK SERI DR. HAJI DZULKEFLY BIN AHMAD (KUALA SELANGOR) minta **MENTERI PENGAJIAN TINGGI** menyatakan sejauh manakah kursus-kursus dan kurikulum yang ditawarkan di universiti awam dan swasta telah melalui 'pengubahsuaian' mengikut kehendak pasaran.

JAWAPAN

Tan Sri Yang di-Pertua,

Kementerian Pengajian Tinggi (KPT) dari semasa ke semasa sentiasa mengambil langkah yang proaktif bagi memastikan Institusi Pendidikan Tinggi (IPT) menawarkan program akademik yang selari dengan keperluan semasa. Dalam hubungan ini, IPT diberi fleksibiliti membangunkan kurikulum baharu atau menambah baik kurikulum sedia ada.

Pada 15 Oktober 2021 yang lepas, KPT telah melancarkan inisiatif *Experiential Learning and Competency-Based Education Landscape* (EXCEL). Inisiatif ini merupakan satu kerangka transformasi program akademik yang mengintegrasikan elemen industri, komuniti, penyelidikan dan fleksibiliti (*personalised*) dalam menghasilkan graduan yang mempunyai atribut dan kemahiran, yang diperoleh daripada

SOALAN NO : 26

pembelajaran berasaskan pengalaman dan pendidikan berasaskan kompetensi.

KPT berharap kerangka EXCEL ini dapat terus memacu usaha untuk menghasilkan graduan yang mempunyai daya tahan dan keupayaan menghadapi serta menerima perubahan (*Resilient and Change-Ready Talent*). Ini termasuk juga aspirasi untuk melahirkan graduan yang memiliki ciri-ciri pengamal pembelajaran sepanjang hayat (*lifelong learners*), usahawan inovatif (*innovative entrepreneurs*), pengamal kreatif (*creative practitioners*) dan pengarah perubahan (*change-makers*).

Selain itu, Institusi Pendidikan Tinggi Swasta (IPTS) juga adalah bertanggungjawab melaksanakan penambahbaikan yang berterusan melalui 'pengubahsuaian' mengikut kehendak pasaran bagi memastikan kualiti kursus pengajian dan kurikulum adalah mantap serta pengalaman pelajar dapat lebih diperkaya. Selaras dengan peruntukan Akta 555 dan Peraturan-Peraturan di bawahnya, IPTS perlu mendapat kelulusan ketua pendaftar dan membuat permohonan pembaharuan mengendalikan kursus pengajian tidak lewat daripada enam (6) bulan sebelum tamat tempoh sah laku kursus secara dalam talian melalui sistem e-IPTS.

Dari aspek jaminan kualiti pula, setiap IPT dikehendaki melaksanakan semakan kurikulum sekurang-kurangnya sekali dalam tempoh tiga (3) hingga lima (5) tahun bagi setiap program yang ditawarkan. Ini bagi memastikan kandungan kurikulum program sentiasa terkini dan memenuhi keperluan perubahan industri semasa. Dalam hal ini, IPT dibenarkan untuk membuat perubahan kurikulum sehingga 30 peratus melibatkan komponen teras secara dalaman tanpa perlu mendapatkan kelulusan dari Agensi Kelayakan Malaysia (MQA) kecuali, program-program di bawah seliaan badan profesional yang mana kelulusannya adalah daripada badan profesional yang berkenaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DR. MASZLEE BIN MALIK
[SIMPANG RENGAM]**

TARIKH : 3 MAC 2022 (KHAMIS)

SOALAN

DR. MASZLEE BIN MALIK [SIMPANG RENGAM] minta **MENTERI KANAN PENDIDIKAN** menyatakan apakah usaha Kementerian untuk memastikan guru interim dan lepasan ijazah perguruan di IPTA diberikan keutamaan untuk mendapat tempat sebagai guru tetap di sekolah-sekolah di bawah KPM.

JAWAPAN

Tuan Yang di-Pertua,

Kementerian Pendidikan Malaysia (KPM) melaksanakan pengambilan guru interim bagi menampung kekosongan guru di sekolah bawah KPM. Dalam usaha untuk memastikan guru interim boleh dilantik sebagai guru tetap, KPM menawarkan Program Diploma Pascasiswazah Pendidikan (PDPP) dikendalikan oleh Institut Pendidikan Guru Malaysia (IPGM).

KPM akan mengemukakan senarai nama guru interim yang berjaya menamatkan PDPP serta memenuhi syarat skim Pegawai Perkhidmatan Pendidikan (PPP) DG41 kepada Suruhanjaya Perkhidmatan Pendidikan (SPP) selaku Pihak Berkuasa Melantik untuk urusan temuduga. Guru interim yang berjaya dalam temuduga tersebut akan ditawarkan sebagai PPP Gred DG41 lantikan tetap oleh SPP.

Bagi pengambilan graduan pendidikan lepasan Universiti Awam, proses pengambilan dilaksanakan melalui pendekatan pasaran terbuka seperti yang digariskan di dalam Rancangan Malaysia ke-10 (RMK-10). Berdasarkan pendekatan ini, graduan mesti mendaftar melalui portal mySPP. Pihak SPP kemudiannya akan memanggil calon yang melepasi tapisan awal untuk ditemuduga. Hanya graduan yang berjaya di dalam temuduga SPP sahaja yang akan dilantik.

Untuk makluman Ahli Yang Berhormat, selaras dengan syarat Skim Pegawai Perkhidmatan Pendidikan yang ditetapkan oleh Jabatan Perkhidmatan Awam (JPA), guru lantikan tetap mesti mempunyai ikhtisas iaitu Ijazah Sarjana Muda dalam bidang pendidikan atau Ijazah Sarjana Muda dengan Diploma Pendidikan. Namun, sekiranya kekosongan tersebut tidak dapat dipenuhi oleh graduan pendidikan, calon yang tidak mempunyai ikhtisas boleh dilantik sebagai guru kontrak setelah mendapat kelonggaran syarat daripada JPA.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN KHOO POAY TIONG
[KOTA MELAKA]**

TARIKH : 03 MAC 2022 (KHAMIS)

SOALAN

TUAN KHOO POAY TIONG [KOTA MELAKA] minta **MENTERI KEWANGAN** menyatakan:

- a) adakah Suruhanjaya Sekuriti telah memanggil Tan Sri Azam Baki dalam penyiasatan isu akaun saham beliau, termasuk tarikh kehadiran beliau dalam siasatan tersebut; dan
- b) justifikasi Suruhanjaya Sekuriti dalam menyimpulkan bahawa beliau ialah penama dan mempunyai kuasa ke atas akaun tersebut.

JAWAPAN

Tan Sri Yang di Pertua,

Berdasarkan seksyen 25(4) Akta Perindustrian Sekuriti (Depositori Pusat) 1991 (SICDA) [*Akta 453*], suatu akaun dagangan mesti dibuka di atas nama pemilik benefisial atau penama yang diberi kuasa. Hasil inkuiri Suruhanjaya Sekuriti Malaysia (SC) menunjukkan bahawa:

- YBhg. Tan Sri Azam Baki adalah penama akaun saham dan beliau mempunyai kuasa ke atas akaun saham tersebut; dan
- YBhg. Tan Sri Azam Baki telah mengendalikan akaun saham yang dibukanya dan telah menyampaikan arahan untuk jual, beli serta pemindahan saham daripada akaun tersebut.

Oleh yang demikian, pihak SC sebagai pihak berkuasa berwajib (*competent authority*) telah menamatkan inkuiri dan berdasarkan keterangan bebas yang diperolehi, pihak SC membuat keputusan bahawa tiada pelanggaran terhadap seksyen 25(4) Akta 453 yang dilakukan oleh YBhg. Tan Sri Azam Baki.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK SERI HAJI MOHD. SALIM SHARIF
[JEMPOL]**

TARIKH : 3 MAC 2022 (KHAMIS)

SOALAN

DATUK SERI HAJI MOHD. SALIM SHARIF [JEMPOL] minta **MENTERI KANAN PENDIDIKAN** menyatakan tindakan tuntas yang diambil bagi mengawal dan mengekang penularan jangkitan wabak COVID-19 dalam kalangan murid di sekolah.

JAWAPAN

Tuan Yang di-Pertua,

Kementerian Pendidikan Malaysia (KPM) komited dalam memastikan persekitaran sekolah adalah selamat bagi pelaksanaan pengajaran dan pembelajaran (PdP) secara bersemuka.

Bagi memastikan kelancaran pengoperasian sekolah, KPM telah menyediakan Garis Panduan Pengurusan dan Pengoperasian Sekolah 3.0 (GPPPS) 3.0 sebagai rujukan kepada jabatan pendidikan negeri (JPN), pejabat pendidikan daerah (PPD) dan pentadbir serta guru. Garis Panduan ini mengandungi panduan khusus mengenai prosedur pengurusan murid bergejala, murid disahkan positif COVID-19, murid yang dikenal pasti sebagai kontak rapat pesakit COVID-19 di sekolah dan penutupan sekolah.

Selari dengan situasi semasa berkenaan penularan wabak COVID-19, KPM sentiasa berbincang secara berkala bersama-sama Kementerian

Kesihatan Malaysia (KKM) untuk meneliti dan menambah baik prosedur operasi standard (SOP) sedia ada bagi mengekang jangkitan COVID-19 di sekolah. Berdasarkan saranan daripada KKM, pihak KPM telah mengambil tindakan memperketatkan lagi pelaksanaan GPPPS 3.0 dengan menyediakan lampiran tambahan (*annexe*) kepada garis panduan ini yang memberi penekanan kepada keselamatan dan kesihatan warga sekolah. Ia menekankan beberapa aspek utama seperti kehadiran warga sekolah yang bergejala, kebenaran masuk berdasarkan status MySejahtera, tanggungjawab guru di sekolah, pengurusan bilik guru, pengurusan murid di sekolah, pengurusan asrama, pengurusan dewan makan asrama dan pengurusan kes positif di sekolah. Selain itu, peranan ketua kelas/pengawas/pembimbing rakan sebaya turut diperkasakan untuk bersama-sama memantau rakan-rakan yang bergejala dari semasa ke semasa dan mengingatkan rakan mereka supaya sentiasa mematuhi SOP. Selain itu, KPM turut melaksanakan ujian saringan bergilir COVID-19 bagi murid sekolah rendah di bawah Strategi Pengujian COVID-19 Kebangsaan.

KPM komited dalam memastikan pengoperasian sekolah berjalan dengan teratur dan selamat serta sentiasa mengambil langkah proaktif bagi mengawal dan mengekang penularan jangkitan wabak COVID-19 dalam kalangan murid di sekolah.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : Y.B. DATUK HAJI AHMAD JAZLAN BIN
YAAKUB [MACHANG]**

TARIKH : 03 MAC 2022 (KHAMIS)

SOALAN

DATUK HAJI AHMAD JAZLAN BIN YAAKUB [MACHANG] minta **MENTERI KEWANGAN** menyatakan apakah maklum balas pihak Kementerian ke atas desakan untuk membenarkan pengeluaran i-Citra sebanyak RM10,000 dari pelbagai lapisan masyarakat. Adakah terdapat inisiatif lain yang dilaksanakan setara dengan pengeluaran KWSP RM10,000 tersebut bagi membantu golongan terjejas terutamanya B40.

JAWAPAN

Tan Sri Yang di Pertua,

KWSP telah memperkenalkan tiga (3) program pengeluaran khas iaitu i-Lestari, i-Sinar dan i-Citra yang terbuka kepada ahli di bawah umur 55 tahun tertakluk kepada syarat-syarat kelayakan yang ditetapkan bagi membantu kelangsungan hidup ahli dalam menempuh cabaran dan impak Perintah Kawalan Pergerakan (PKP) akibat pandemik COVID-19. Secara keseluruhannya di bawah ketiga-tiga pengeluaran ini, ahli KWSP telah mempunyai akses kepada dana persaraan mereka sehingga RM71,000, tertakluk kepada jumlah baki simpanan mereka.

Pengeluaran khas ini telah dapat memanfaatkan seramai 7.34 juta ahli atau 58% daripada 12.6 juta ahli yang berumur di bawah 55 tahun (yang telah membuat sekurang-kurangnya satu daripada pengeluaran ini) melibatkan amaun pengeluaran berjumlah RM101 bilion. Buat masa ini, bayaran bagi pengeluaran i-Citra akan berakhir pada bulan Februari 2022.

Pengeluaran khas oleh KWSP ini adalah pengeluaran pra-persaraan yang belum pernah dilaksanakan sebelum ini. Ia hanya diperkenalkan sebagai langkah jangka masa pendek dan bersifat sementara disebabkan oleh keadaan dan situasi yang tidak pernah dialami sebelum ini. Hal ini juga telah mendapat kritikan pakar ekonomi, ahli akademik, pertubuhan bukan kerajaan (NGO) yang mewakili pekerja dan majikan serta juga pakar kesejahteraan sosial yang telah menyatakan kebimbangan mereka tentang kemudahan akses awal simpanan persaraan dan sebarang pengeluaran tambahan akan menjejaskan simpanan hari tua dan bercanggah dengan objektif penubuhan KWSP.

Implikasi pengeluaran khas ini khususnya pengeluaran daripada Akaun 1 telah memberikan kesan jangka panjang iaitu pengurangan jumlah simpanan persaraan yang ketara kepada ahli-ahli yang terlibat. Daripada keseluruhan ahli KWSP di bawah umur 55 tahun, setakat 31 Disember 2021, seramai 6.1 juta ahli atau 48% hanya mempunyai baki simpanan kurang daripada RM10,000 di dalam akaun KWSP setelah

majoriti ahli mengeluarkan simpanan melalui i-Lestari, i-Sinar dan i-Citra. Amaun RM10,000 menunjukkan ahli dijangka hanya mempunyai pendapatan persaraan yang kurang daripada RM42 sebulan untuk tempoh 20 tahun.

Selain itu, pengeluaran khas ini telah menyebabkan penurunan yang ketara dalam peratusan ahli yang mencapai Simpanan Asas (RM240,000 pada 55 tahun) daripada 36% pada tahun 2020 kepada 30% pada akhir tahun 2021. Situasi ini secara langsung menunjukkan bahawa 70% atau lebih dua pertiga daripada ahli berumur 55 tahun dan ke bawah berada dalam situasi yang serius di mana jumlah dana mereka tidak cukup untuk bersara melebihi paras kemiskinan. KWSP menganggarkan ahli perlu bekerja antara 4-6 tahun tambahan untuk membina semula simpanan yang telah dikeluarkan semasa pandemik.

Sehubungan itu, sebarang pengeluaran tambahan i-Citra atau pengeluaran khas baharu akan menjejaskan lagi isu ketidakcukupan simpanan persaraan yang kini telah pun berada pada tahap yang amat membimbangkan.

Pertimbangan terhadap sebarang pengeluaran sebelum umur persaraan juga adalah perlu mengambil kira keperluan untuk mengimbangkan antara keperluan semasa dan kepentingan simpanan persaraan untuk masa hadapan dengan keadaan negara dijangka akan mengalami penuaan penduduk pada 10 ke 15 tahun akan datang. Ini bermakna, rakyat akan hidup lebih lama sehingga umur 75 ke 80 tahun kerana jangka hayat semakin panjang dan mereka memerlukan simpanan persaraan yang lebih banyak untuk membiayai sara hidup mereka kelak.

Berdasarkan statistik KWSP setakat Disember 2021, bilangan Ahli Aktif KWSP menunjukkan peningkatan sebanyak 1.3% kepada 7.7 juta berbanding 7.6 juta pada bulan Disember 2020 manakala bilangan Majikan Aktif juga menunjukkan peningkatan sebanyak 3.3% kepada 553,000 berbanding 536,000 pada tahun sebelumnya. Statistik ini disokong oleh peningkatan pendaftaran ahli dan majikan baru sebanyak 422,000 dan 73,000, berbanding 402,000 dan 67,000 masing-masing

pada tahun 2020. Selain itu, jumlah caruman bagi tahun 2021 menunjukkan peningkatan sebanyak 2.6% iaitu sebanyak RM71.8 bilion berbanding RM70 billion bagi tahun 2020. Data-data dalaman KWSP ini secara tidak langsung menunjukkan bahawa dengan pembukaan semula ekonomi di mana perniagaan boleh beroperasi sepenuhnya membolehkan pekerja-pekerja kembali bekerja dan memperoleh pendapatan bagi menampung kehidupan.

Lanjutan itu, pelbagai pihak seperti kesatuan pekerja iaitu Majlis Rangkaian Kesatuan Sekerja Antarabangsa Malaysia (UNI-MLC, Kongres Kesatuan Sekerja Malaysia (MTUC) dan NUBE serta Persekutuan Majikan-majikan Malaysia (MEF) dan Sarawak Business Federation (SBF) telah menyatakan pendirian bahawa sebarang pengeluaran tambahan akan menjejaskan kecukupan simpanan hari tua ahli, menambah beban kewangan Kerajaan di masa hadapan dan bercanggah dengan objektif penubuhan KWSP.

Kerajaan turut menyediakan pelbagai bentuk bantuan yang telah dan akan disalurkan kepada rakyat bagi membantu meringankan beban kewangan ahli yang terjejas dengan pandemik ini seperti Bantuan Keluarga Malaysia (BKM) yang akan memanfaatkan lebih 9.6 juta penerima dengan peruntukan RM8.2 bilion pada tahun ini berbanding 8.6 juta penerima dengan peruntukan RM7 bilion di bawah Bantuan Prihatin Rakyat (BPR) pada tahun sebelumnya.

Walau bagaimanapun, atas dasar keprihatinan kepada keperluan ahli, KWSP bersama-sama Kementerian Kewangan amat prihatin dengan keperluan ahli, justeru itu, sebanyak tiga (3) program pengeluaran khas telah diberikan untuk ahli mengakses simpanan persaraan mereka bagi tujuan kelangsungan hidup ketika pandemik. KWSP sentiasa berusaha untuk mengimbangi keperluan semasa ahli dengan kepentingan simpanan untuk masa hadapan selaras dengan mandat dan objektif penubuhan Skim KWSP.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

DARIPADA : TUAN SIM TZE TZIN (BAYAN BARU)

TARIKH : 3 MAC 2022 (KHAMIS)

SOALAN

TUAN SIM TZE TZIN (BAYAN BARU) minta **MENTERI PERTANIAN DAN INDUSTRI MAKANAN** menyatakan senarai syarikat-syarikat yang diberikan *Approve Permits* sejak Januari 2022 untuk mengimport ayam bulat, kuantiti dan negara asal. Nyatakan jumlah permintaan (*demand*) ayam bulat, jumlah *supply* penternak dalam negara untuk bulan September 2021 hingga Februari 2022.

JAWAPAN

Tuan Yang Di Pertua,

Untuk makluman Ahli Yang Berhormat, jumlah permintaan negara terhadap ayam bulat dari bulan September 2021 sehingga Februari 2022 adalah sebanyak 679,320 tan metrik (377.4 juta ekor) dengan purata 113,220 tan metrik (62.9 juta ekor) sebulan. Namun begitu, berlaku penurunan pengeluaran ayam dalam negara sebanyak 648,882 tan metrik (360.5 juta ekor) dengan purata 108,147 tan metrik (60.1 juta ekor) sebulan dalam tempoh tersebut. Ini telah menyebabkan negara berhadapan dengan kekurangan bekalan ayam sebanyak 4.5 peratus (30,438 tan metrik/16.9 juta ekor).

Penurunan bekalan telah berlaku kerana terdapat peningkatan harga dedak ayam dan pengurangan kemasukan anak ayam bagi mengelakkan penyakit Newcastle Disease (sampar ayam) yang mudah merebak di dalam suasana cuaca buruk. Lanjutan itu, penternak tempatan terpaksa

mengurangkan pengeluaran. Tidak terkecuali, bencana banjir yang berlaku pada penghujung tahun 2021 telah mengakibatkan pengeluaran di beberapa kawasan turut terjejas. Selain itu, peningkatan permintaan yang mendadak berikutan pembukaan semula sektor ekonomi, terutamanya hotel, restoran dan katering pasca Perintah Kawalan Pergerakan (PKP) bermula bulan Oktober 2021, telah mengakibatkan permintaan ayam dalam negara melebihi jumlah pengeluaran semasa. Keadaan ini telah menyebabkan berlakunya kenaikan harga ayam bulat sehingga mencecah RM10 bagi satu kilogram di pasar basah, kedai runcit dan pasaraya.

Susulan itu, Kerajaan telah mengambil tindakan proaktif dalam mengawal kenaikan harga ayam dan seterusnya mengatasi masalah kekurangan bekalan ayam bulat bagi menjaga kebajikan rakyat. Kerajaan telah memberi kebenaran untuk mengimport ayam sebagaimana yang diumumkan oleh YAB Perdana Menteri pada 1 Disember 2021. Kebenaran pengimportan sehingga 10,000 tan metrik sebulan adalah sebagai langkah intervensi sementara tertakluk kepada syarat-syarat yang ditetapkan. Ini adalah bagi memenuhi keperluan pasaran tempatan terutamanya menjelang musim perayaan.

Sebanyak 36 buah syarikat termasuk 4 buah syarikat rantai pasaraya/hypermarket yang memohon telah diberi kelulusan mengimport (*Approved Permit – AP*) dari loji yang diiktiraf oleh Jabatan Perkhidmatan Veterinar (DVS) di negara Thailand, China dan Brazil. Kesemua 36 syarikat ini diberi kelulusan kuota untuk tempoh dari Disember 2021 sehingga Mei 2022 berdasarkan penilaian keperluan bekalan negara dan kemampuan syarikat. Senarai syarikat-syarikat yang diberikan kebenaran mengimport adalah seperti berikut:

| BIL | SYARIKAT | NEGARA SUMBER |
|------------|--------------------------------------|----------------------------|
| 1 | Amal Meat Sdn Bhd | Thailand, Brazil dan China |
| 2 | AN Nafis Agro Ventures Sdn Bhd | |
| 3 | AS Shams Poultry & Livestock Sdn Bhd | |
| 4 | Audadi Feedmills Sdn Bhd | |
| 5 | Ayam Hebat Poultry Sdn Bhd | |
| 6 | Bangi Agro | |

| | | |
|----|--------------------------------------|--|
| 7 | Ben Daud Industries Sdn Bhd | |
| 8 | Dikara Cemerlang Sdn Bhd | |
| 9 | Dmj Mega Group Sdn Bhd | |
| 10 | Erti Jayamega Sdn Bhd | |
| 11 | Gms Food Impex Sdn Bhd | |
| 12 | Green Seek Nature Sdn Bhd | |
| 13 | Kalut Frozen Sdn Bhd | |
| 14 | Kemuda Holdings Sdn Bhd | |
| 15 | Konsortium H & T Sdn Bhd | |
| 16 | Lembah Madu Intergrated Farm Sdn Bhd | |
| 17 | Levent Corporation Sdn Bhd | |
| 18 | Nusaxa Sdn Bhd | |
| 19 | Oval Spring Sdn Bhd | |
| 20 | Prevelly Sdn Bhd | |
| 21 | PS Food & Beverages Sdn Bhd | |
| 22 | Pwp Mesra Sdn Bhd | |
| 23 | Rizki Setia Resources | |
| 24 | RSC Food Sdn Bhd | |
| 25 | SKT Group Sdn Bhd | |
| 26 | SLH Poultry Trading | |
| 27 | SR Food Industry Resources Sdn Bhd | |
| 28 | Star Fresh & Frozen Sdn Bhd | |
| 29 | Taat Kota Maharani Malaysia Sdn Bhd | |
| 30 | Ultra Sepadu Sdn Bhd | |
| 31 | Worldsign Industries Sdn Bhd | |
| 32 | Zastron Sdn Bhd | |
| 33 | Lotuss Stores (Malaysia) Sdn Bhd | |
| 34 | Lulu Group Retail Sdn Bhd | |
| 35 | Mydin Mohamed Holdings Berhad | |
| 36 | NSK Trading Sdn Bhd | |

Untuk makluman Ahli Yang Berhormat jua, permintaan dan pengeluaran ayam dalam Negara dari bulan September 2021 hingga Februari 2022 adalah seperti berikut:

| BULAN | PERMINTAAN (TAN METRIK) | PENGELUARAN (TAN METRIK) | PERATUS LEBIHAN/ KEKURANGAN (%) |
|-------------------------------|--|--|---|
| September 2021 | 104,582 (58.1 juta ekor) | 120,654 (67.0 juta ekor) | 15.4 |
| Oktober 2021 | 110,537 (61.4 juta ekor) | 93,690 (52.1 juta ekor) | -15.2 |
| November 2021 | 111,596 (62.0 juta ekor) | 92,592 (51.4 juta ekor) | -17.0 |
| Disember 2021 | 103,093 (57.3 juta ekor) | 110,142 (61.2 juta ekor) | 6.8 |
| Januari 2022 (unjuran) | 139,617 (77.6 juta ekor) | 117,342 (65.2 juta ekor) | -16.0 |
| Februari 2022 (unjuran) | 109,895 (61.1 juta ekor) | 114,462 (63.6 juta ekor) | 4.2 |
| JUMLAH | 679,320 (377.4 juta ekor) | 648,882 (360.5 juta ekor) | -4.5 (30,438 tan metrik/ 16.9 juta ekor) |
| PURATA SEBULAN | 113,220 (62.9 juta ekor) | 108,147 (60.1 juta ekor) | -4.5 (5,073 tan metrik/ 2.8 juta ekor) |

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : DATO' HAJI MOHD FASIAH BIN HAJI MOHD
FAKEH [SABAK BERNAM]**

TARIKH : 3 MAC 2022 (KHAMIS)

SOALAN

DATO' HAJI MOHD FASIAH BIN HAJI MOHD FAKEH [SABAK BERNAM] minta **MENTERI KANAN PENDIDIKAN** menyatakan bilangan graduan pendidikan Universiti Awam (UA) yang masih belum diserapkan menjadi guru di sekolah-sekolah Kerajaan dan faktor-faktor yang menyebabkan graduan pendidikan Universiti Awam (UA) ini gagal untuk diserapkan sebagai guru di sekolah-sekolah Kerajaan.

JAWAPAN

Tuan Yang di-Pertua,

Pengambilan graduan pendidikan lepasan universiti awam dilaksanakan melalui pendekatan pasaran terbuka seperti yang digariskan di dalam Rancangan Malaysia ke-10 (RMK-10). Berdasarkan pendekatan ini, graduan mesti mendaftar melalui portal mySPP. Pihak Suruhanjaya Perkhidmatan Pendidikan (SPP) selaku Pihak Berkuasa Melantik kemudiannya akan memanggil calon yang melepasi tapisan awal untuk ditemuduga. Hanya graduan yang berjaya di dalam temuduga SPP sahaja yang akan dilantik. Berdasarkan rekod SPP, antara faktor graduan pendidikan Universiti Awam (UA) gagal dilantik adalah disebabkan bidang kelayakan akademik graduan tidak sesuai atau sepadan dengan keperluan opsyen mata pelajaran di sekolah.

Untuk makluman Ahli Yang Berhormat, berdasarkan data Kementerian Pengajian Tinggi (KPT) melalui Sistem Kajian Pengesanan Graduan (SKPG) yang dikeluarkan pada tahun 2020, seramai 6,615 graduan warganegara dalam bidang pendidikan di UA telah berjaya bergraduasi pada tahun tersebut. Daripada jumlah tersebut, 4,981 graduan atau 75.3 peratus telah berjaya mendapat pekerjaan di mana seramai 3,245 graduan atau 65.1 peratus bekerja dalam sektor pendidikan. Baki sebanyak 10.4 peratus graduan pula sedang menunggu penempatan pekerjaan dan sebanyak 9.7 peratus graduan masih belum mendapat pekerjaan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN CHA KEE CHIN (RASAH)

TARIKH : 3 MAC 2022 (KHAMIS)

SOALAN

TUAN CHA KEE CHIN (RASAH) minta **MENTERI TENAGA DAN SUMBER ASLI** menyatakan apakah rasional disebalik peningkatan bayaran elektrik untuk pengguna TNB kategori komersial dan industri mulai 1 Februari 2022, kerana negara masih dibayangi oleh pandemik COVID-19 dan keadaan ekonomi semasa yang tidak memberangsangkan ketika ini, kenaikan ini dijangka akan membebankan peniaga kecil dan sektor IKS.

JAWAPAN

Tuan Yang di-Pertua,

1. Pelarasan tarif elektrik di Semenanjung di bawah mekanisme *Imbalance Cost Pass-Through* (ICPT) dilaksanakan setiap enam bulan dengan mengambil kira perubahan harga bahan api di pasaran dunia serta kos-kos penjanaan tambahan lain untuk tempoh enam bulan ke belakang. Kos ICPT bagi tempoh Julai hingga Disember 2021 ialah sebanyak RM1.672 bilion. Sebahagian besarnya berpunca daripada kenaikan harga arang batu yang mendadak di pasaran dunia sehingga mencecah secara purata USD105.09/metrik tan berbanding harga arang batu yang diunjurkan pada tahun 2021 iaitu sebanyak USD67.45/metrik tan. Peningkatan harga arang batu yang ketara ini telah menyebabkan kos penjanaan berasaskan arang batu meningkat sebanyak 45% bagi tempoh Julai hingga Disember 2021.
2. Selain kenaikan harga bahan api, pertukaran mata wang asing bagi tempoh Julai hingga Disember 2021 juga turut meningkat iaitu pada kadar RM4.246 untuk setiap USD1.00 berbanding RM4.212 bagi setiap USD1.00 seperti yang diunjurkan pada tahun 2021 dan ini turut meningkatkan kos penjanaan.
3. TNB telah membayar kos bahan api dan penjanaan tambahan bagi tempoh Julai hingga Disember 2021 berjumlah RM1.672 bilion. Oleh itu, TNB perlu mendapatkan semula kos tersebut bagi menampung kos operasi bagi tempoh Januari hingga Jun 2022. Justeru, kos ini telah dilepaskan kepada pengguna elektrik dalam bentuk surcaj sebanyak 3.70 sen/kWj bagi tempoh Februari 2022 hingga Jun 2022. Sekiranya kos yang terlibat tidak dapat dikutip semula daripada pengguna, ia akan menjejaskan aliran tunai TNB serta menjejaskan keupayaan TNB untuk membuat bayaran kepada pembekal- pembekal bahan api gas dan arang batu, pembayaran kepada vendor, pembayaran gaji kakitangan dan sebagainya. Ini sudah tentu akan menjejaskan perkhidmatan bekalan elektrik kepada pengguna. Selain itu, Kerajaan juga telah membelanjakan sejumlah RM493 juta pada tahun 2021 melalui dana Kumpulan Wang Industri Elektrik (KWIE) untuk menampung kos rebat 2 sen/kWj bagi

semua pengguna elektrik di Semenanjung Malaysia agar tarif dapat dikekalkan pada ketika itu.

4. Oleh itu, Kerajaan tidak mempunyai pilihan lain dan terpaksa melepaskan kos ICPT sebanyak RM1.672 bilion kepada pengguna komersial dan industri kerana kedudukan kewangan Kerajaan tidak mengizinkan Kerajaan untuk menyerap kos tersebut. Walau bagaimanapun, Kerajaan telah memutuskan untuk melindungi pengguna domestik dan telah membuat keputusan untuk menanggung kos ICPT pengguna domestik sebanyak RM432 juta.

5. Kerajaan sedar bahawa surcaj elektrik kepada pengguna komersial dan industri meningkatkan kos operasi mereka terutamanya pengusaha industri kecil dan sederhana (IKS). Oleh itu, saya ingin menyarankan agar pengguna-pengguna dalam kedua-dua kategori ini untuk melanggan *Green Electricity Tariff* (GET). Ia bukan sahaja boleh membantu mengurangkan bil elektrik kerana pelanggan GET akan dikecualikan daripada membayar surcaj untuk tempoh setahun, malah mereka akan turut memiliki *Renewable Energy Certificate* (REC) yang boleh membantu memenuhi komitmen *Environmental, Social and Governance* (ESG), dengan izin, dan menyokong agenda Tenaga Boleh Baharu negara.

6. Selain itu, pengguna-pengguna bukan domestik turut dicadangkan untuk meneroka potensi solar melalui pemasangan sistem solar bagi kegunaan sendiri (*self-consumption* – SelCo) atau menyertai Program *Net Energy Metering 3.0* (NEM 3.0). Kementerian juga menyarankan pemain-pemain industri untuk mengamalkan penggunaan elektrik secara cekap dengan menggunakan peralatan cekap tenaga yang mendapat penarafan 4 atau 5 bintang oleh pihak Suruhanjaya Tenaga. Inisiatif-inisiatif ini dapat membantu pengguna komersial dan industri untuk mengurangkan bil elektrik mereka pada masa akan datang.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK WIRA DR. MOHD HATTA BIN
MD. RAMLI [LUMUT]**

TARIKH : 03 MAC 2022 (KHAMIS)

SOALAN

DATUK WIRA DR. MOHD HATTA BIN MD. RAMLI [LUMUT] minta **MENTERI PELANCONGAN, SENI DAN BUDAYA** menyatakan langkah-langkah yang telah dan akan diambil oleh Kementerian untuk menarik lebih ramai pelancong ke Pulau Pangkor.

JAWAPAN

Tuan Yang di-Pertua,

1. Kementerian Pelancongan, Seni dan Budaya (MOTAC) melalui Tourism Malaysia, iaitu sebuah agensi di bawah seliaannya sentiasa melaksanakan pelbagai inisiatif bagi menarik lebih ramai pelancong ke Pulau Pangkor.
2. Antaranya adalah menganjurkan Seminar & Bengkel bersama penggiat-penggiat industri pelancongan di Pulau Pangkor dan Wilayah Utara. Program '*Networking Session with Industry Players*' juga diadakan dalam usaha untuk memperkenalkan produk-produk baharu yang terdapat di negeri-negeri wilayah utara dan memberi platform bagi pemain industri pelancongan yang terdiri daripada hotel, pemilik produk dan agensi pelancongan untuk bertukar idea dan kenalan.
3. Selain itu, Tourism Malaysia juga bekerjasama dengan agensi-agensi pelancongan dan hotel-hotel di Pulau Pangkor bagi mengemaskini pakej-pakej pelancongan sedia ada serta menghasilkan pakej-pakej khas yang lebih menarik.
4. Terkini, Syarikat Penerbangan pelancongan tempatan, SKS Airways telah memperkenalkan penerbangan terus ke Pulau Pangkor dari Lapangan Terbang Sultan Abdul Aziz Shah, Subang. Produk baru ini menyediakan peluang bagi meningkatkan program kerjasama promosi bagi menambah potensi pelancongan Pulau Pangkor, termasuklah pembangunan pakej menggunakan perkhidmatan penerbangan yang ini.
5. Pada masa yang sama, program-program suai kenal produk pelancongan di Pulau Pangkor kepada media di seluruh negara turut dilaksanakan dari semasa ke semasa bagi mendapatkan publisiti optimum.

SOALAN NO : 34

6. Sementara itu, bagi menggalak dan membantu pembangunan kemudahan infrastruktur pelancongan di Pulau Pangkor, MOTAC telah mewujudkan insentif-insentif bagi membantu syarikat swasta untuk membina infrastruktur pelancongan bagi menarik kedatangan lebih ramai pelancong ke pulau ini. Insentif yang ditawarkan adalah Skim Infrastruktur Pelancongan (SIP) dan Pendaftaran Projek Pelancongan.

7. Selain itu, penggiat industri pelancongan juga boleh memohon insentif berbentuk pengecualian cukai sebagai usaha Kerajaan mengiktiraf pelabur-pelabur dan pengusaha-pengusaha yang melabur dalam sektor pelancongan. Insentif ini diberikan kepada pengusaha projek penginapan dan projek bukan penginapan melalui pemberian Sijil Pendaftaran Projek Pelancongan oleh MOTAC yang membolehkan pengusaha projek pelancongan mendapatkan insentif pengecualian cukai daripada *Malaysian Investment Development Authority* (MIDA).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' SERI ANWAR BIN IBRAHIM
[PORT DICKSON]**

TARIKH : 03 MAC 2022 (KHAMIS)

SOALAN

DATO' SERI ANWAR BIN IBRAHIM [PORT DICKSON] minta **MENTERI KEWANGAN** menyatakan apakah tindakan Kerajaan terhadap Malayan Banking Berhad (MAYBANK), Kumpulan CIMB Berhad dan RHB Bank yang memberi pinjaman tanpa jaminan berjumlah USD600 juta kepada Genting Hong Kong yang kini sudah mufliis.

JAWAPAN

Tan Sri Yang di Pertua,

Pemberian pinjaman oleh institusi kewangan kepada mana-mana pihak merupakan keputusan berdasarkan pertimbangan komersial melalui penilaian kredit dan kesanggupan mengambil risiko yang diketahui oleh institusi tersebut, tanpa perlu mendapatkan sebarang kelulusan dari Bank Negara Malaysia (BNM), Kementerian Kewangan atau pemegang saham.

Penilaian kredit oleh institusi perbankan adalah berdasarkan pertimbangan mengenai kemampuan peminjam membayar balik pinjaman. Setelah permohonan pinjaman diterima, bank akan membuat penilaian kredit terhadap peminjam dengan mengambil kira keupayaan peminjam membayar balik pinjaman yang merangkumi perkara-perkara berikut:

- Kedudukan kewangan yang mantap
- Profil risiko peminjam
- Prospek ekonomi dan prospek khusus industri
- Daya maju projek dan perniagaan
- Analisis aliran tunai bagi memastikan keupayaan peminjam memenuhi obligasi hutang jangka pendek dan jangka panjang mereka

Jika bank-bank berpuas hati, mereka boleh memberikan kemudahan tanpa cagaran. Bank-bank boleh meluluskan pinjaman tanpa cagaran berdasarkan kesanggupan bank tersebut mengambil risiko pada peringkat dalaman, penilaian kredit yang memuaskan semasa permohonan dibuat dan kelulusan dibuat mengikut proses tadbir urus dalaman.

Pengurusan risiko kredit dan amalan peruntukan (*provisioning practices*) oleh institusi perbankan adalah berpandukan kepada dokumen dasar BNM mengenai risiko kredit (*policy document on Credit Risk*), dokumen dasar mengenai had dedahan pihak tunggal lain yang berkenaan (*policy document on Counterparty Exposure Limit*) dan dokumen dasar mengenai ujian tekanan (*policy document on Stress Test*). Dari semasa ke semasa, BNM akan mengkaji semula peraturan sedia ada.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : PUAN HAJAH NATRAH BINTI ISMAIL
(SEKIJANG)**

TARIKH : 3 MAC 2022 (KHAMIS)

SOALAN

PUAN HAJAH NATRAH BINTI ISMAIL (SEKIJANG) minta **MENTERI PERTANIAN DAN INDUSTRI MAKANAN** menyatakan apakah langkah pihak Kementerian dalam menggalakkan penglibatan golongan wanita dalam bidang pertanian khususnya bagi mereka yang bergelar ibu tunggal dan terjejas pendapatan akibat pandemik COVID19.

JAWAPAN

Tuan Yang Di Pertua,

Untuk makluman Ahli Yang Berhormat, Kementerian Pertanian dan Industri Makanan (MAFI) sentiasa komited dan menggalakkan penglibatan wanita dalam bidang pertanian termasuk ibu tunggal. MAFI melalui Lembaga Kemajuan Ikan Malaysia (LKIM) dan Lembaga Pertubuhan Peladang (LPP) telah melaksanakan program melalui pertubuhan kumpulan bagi memperkasa dan melibatkan wanita dalam bidang pertanian seperti Program Pembangunan Kumpulan Nelayan dan Kumpulan PeladangNita.

Program Pembangunan Kumpulan Nelayan di bawah seliaan LKIM ini bertujuan mengukuhkan dan memperkasa sosioekonomi keluarga nelayan yang terdiri daripada isteri dan anak-anak nelayan. Bantuan yang diberikan termasuklah modal, peralatan dan khidmat nasihat bagi menjalankan projek ekonomi berasaskan perikanan dan juga bukan perikanan. Sehingga kini terdapat 66 buah Kumpulan Nelayan Wanita (KUNITA) dengan keahlian seramai 4,220 orang dan 19 buah Kumpulan Belia Nelayan (KUBENA) dengan bilangan ahli seramai 639 orang. Bagi tahun 2022, sejumlah RM250,000.00 telah diperuntukkan bagi pelaksanaan program ini.

LPP telah menubuhkan Kumpulan PeladangNita pada tahun 2016. Antara tujuan penubuhan Kumpulan PeladangNita adalah bagi menggalakkan lebih ramai peladang wanita menjadi ahli Pertubuhan Peladang Kawasan (PPK) dan bergiat aktif dalam aktiviti serta perkhidmatan yang diberikan oleh PPK. Selain itu, penubuhan PeladangNita bertujuan meningkatkan ekonomi dan kualiti keluarga dalam kalangan ahli peladang Wanita PPK.

Untuk makluman, Pakej Rangsangan Ekonomi (PRE) telah diperkenalkan bagi merangsang ekonomi negara yang terjejas akibat pandemik Covid-19 melalui pelaksanaan pengeluaran agromakanan bagi memastikan bekalan makanan terjamin. Fokus pakej rangsangan ini adalah kepada pembangunan projek agromakanan jangka pendek yang dapat mengeluarkan hasil dalam tempoh tiga (3) hingga enam (6) bulan. Skop pembiayaan projek ekonomi ini meliputi pengeluaran pertanian (tanaman, ternakan dan akuakultur).

Melalui Program Peningkatan Pendapatan Golongan B40, MAFI juga menyediakan peruntukan untuk disalurkan kepada golongan B40 sebagai galakan untuk mengusahakan tanaman kontan sebagai pendapatan tambahan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DR. MASZLEE BIN MALIK
[SIMPANG RENGAM]**

TARIKH : 3 MAC 2022 (KHAMIS)

SOALAN

DR. MASZLEE BIN MALIK [SIMPANG RENGAM] minta **MENTERI KANAN PENDIDIKAN** menyatakan apakah usaha Kementerian untuk mengatasi masalah beg sekolah yang berat dan apakah Kementerian bercadang untuk menukarkan kaedah PDP yang tidak terlalu bergantung kepada buku teks semata-mata.

JAWAPAN

Tuan Yang di-Pertua,

Untuk makluman Ahli Yang Berhormat, isu mengenai beg berat murid merupakan isu yang telah berlarutan sekian lama. Di sepanjang beberapa dekad lepas, Kementerian Pendidikan Malaysia (KPM) telah menjalankan beberapa kajian bagi mengenal pasti punca dan mendapatkan penyelesaian berhubung perkara tersebut.

Sebagai contoh, pada tahun 1994, KPM telah melaksanakan Kajian Beban Beg Buku Murid Sekolah Rendah. Ini kemudian disusuli dengan Kajian Berat Beg Murid Sekolah Rendah pada tahun 2008 dan Laporan Kajian Berat Beg Murid Sekolah Rendah pada tahun 2017.

Hasil daripada kajian-kajian yang dilaksanakan, KPM telah mengambil pelbagai pendekatan dan inisiatif bagi menangani isu beg berat. Antaranya termasuk menyusun semula jadual waktu supaya dapat disesuaikan antara tiga hingga empat mata pelajaran dipelajari setiap hari serta meminimumkan penggunaan buku latihan untuk satu-satu mata pelajaran. Pendekatan tersebut dibuat melalui Surat Siaran Panduan Menangani Isu Beg Berat Murid di Sekolah pada tahun 2018.

Namun demikian, pendekatan yang telah diambil masih lagi belum dapat menangani sepenuhnya isu beg berat murid. Oleh yang demikian, KPM telah membuat ketetapan untuk memperincikan secara mendalam perkara berkaitan beg berat dan merangka satu penyelesaian yang holistik dan menyeluruh. Ini adalah penting bagi membolehkan pendekatan yang akan dilaksanakan dapat menyelesaikan isu beg berat secara tuntas. KPM akan mengumumkan perincian menyeluruh mengenai perkara ini. Kerjasama erat semua pihak adalah penting bagi memastikan segala cadangan, langkah dan tindakan bagi mengatasi beg sekolah yang berat dapat dilaksanakan secara menyeluruh demi kesejahteraan murid.

KPM komited untuk memastikan aktiviti pembelajaran murid sentiasa berada dalam keadaan kondusif. Sekian, terima kasih.

**PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK SERI HAJI SALAHUDDIN BIN AYUB
(PULAI)**

TARIKH : 3 MAC 2022 (KHAMIS)

SOALAN

DATUK SERI HAJI SALAHUDDIN BIN AYUB (PULAI) minta **MENTERI PENGAJIAN TINGGI** menyatakan adakah terdapat data atau maklumat mengenai jumlah mahasiswa keciciran atau menangguhkan pengajian bagi Institusi Pengajian Tinggi Awam/Swasta (IPTA/IPTS) ekoran menanggung bebanan status sosioekonomi keluarga atau terkait dengan kesihatan mental.

JAWAPAN

Tan Sri Yang di-Pertua,

Berdasarkan data Sistem MyMoheS Kementerian Pengajian Tinggi (KPT), pada tahun 2021, seramai 17,613 pelajar telah direkodkan sebagai tercicir daripada melanjutkan pengajian di Universiti Awam (UA), sementara sejumlah 5,165 orang pelajar di UA yang menangguhkan pengajian tanpa sebab yang khusus. Bagi pelajar di Institusi Pendidikan Tinggi Swasta (IPTS) pula, data Sistem e-IPTS sehingga 31 Disember 2021 menunjukkan seramai 20,577 orang pelajar menangguhkan pengajian tanpa sebab yang khusus.

Antara faktor yang dikenal pasti menyumbang kepada pelajar menangguh pengajian adalah:

- i. Penangguhan pengajian atas masalah kesihatan;

- ii. Penangguhan pengajian atas kepentingan perkhidmatan (terutamanya bagi pelajar yang bekerja);
- iii. Penangguhan pengajian atas sebab masalah kesihatan ahli keluarga terdekat;
- iv. Penangguhan pengajian atas sebab masalah keluarga (selain masalah kesihatan);
- v. Penangguhan pengajian atas sebab masalah kewangan; dan
- vi. Penangguhan pengajian atas sebab pelajar yang menghadapi masalah lain (masalah peribadi selain daripada yang dinyatakan di atas).

Berhubung perkara ini, KPT amat prihatin dan sentiasa mengambil langkah bagi membantu pelajar yang menghadapi masalah dalam pelaksanaan PdP. Antaranya adalah dengan memberikan IPT fleksibiliti dalam menentukan kaedah PdP serta pentaksiran dan penilaian yang bersesuaian.

Selain itu, KPT turut menyediakan kemudahan biasiswa dan bantuan kewangan kepada golongan sasar tertentu termasuk B40. Kemudahan ini diberikan kepada pelajar yang layak.

Selain itu juga, KPT menerusi Unit Kaunseling dan Bimbingan di UA turut menyediakan perkhidmatan kaunseling dan sokongan psikososial kepada mahasiswa yang terkesan dari segi tekanan emosi atau mental. Terdapat hampir 150 kaunselor dan pakar psikologi yang bersedia untuk membantu pelajar yang memerlukan melalui perkhidmatan yang diadakan secara fizikal di kampus masing-masing, secara dalam talian (e-kaunseling), dan juga dengan menghubungi talian *hotline* (tele-kaunseling).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN SIVAKUMAR VARATHARAJU NAIDU
[BATU GAJAH]**

TARIKH : 3 MAC 2022 (KHAMIS)

SOALAN

TUAN SIVAKUMAR VARATHARAJU NAIDU [BATU GAJAH] minta **MENTERI KANAN PENDIDIKAN** menyatakan tentang rasional untuk menghalang Ahli-Ahli Parlimen memasuki premis sekolah untuk menghadiri program-program yang diadakan mahupun untuk memberi sumbangan dana bagi infrastruktur, fasiliti ataupun aktiviti-aktiviti yang diadakan. Kenapakah Kementerian tidak mahu bersikap adil dengan minda 'terbuka' dalam hal ini.

JAWAPAN

Tuan Yang di-Pertua,

Kementerian Pendidikan Malaysia (KPM) amat mengalu-alukan sumbangan atau derma demi kebaikan sekolah. Walau bagaimanapun, KPM mempunyai prosedur standard bagi kehadiran orang kenamaan atau individu tertentu ke sekolah termasuk penggunaan premis atau kemudahan sekolah oleh pihak luar. KPM telah mengeluarkan Surat Pekeliling Ikhtisas Bil.3/2008: Mengundang Orang-orang Kenamaan ke Upacara Sekolah dan Penggunaan Premis Sekolah oleh Pihak Luar bertarikh 31 Mac 2008. Berdasarkan surat pekeliling ini, semua urusan pihak luar termasuk orang kenamaan untuk memasuki sekolah perlu mendapat kebenaran daripada KPM. Perkara ini juga telah dimaklumkan melalui surat peringatan yang bertarikh 11 November 2019.

Untuk makluman Ahli Yang Berhormat, apabila pandemik COVID-19 melanda negara pada suku pertama tahun 2020, KPM telah mengeluarkan Garis Panduan Pengurusan dan Pengoperasian Sekolah Dalam Norma Baharu sebagai panduan kepada pegawai bahagian di KPM, jabatan pendidikan negeri (JPN), pejabat pendidikan daerah (PPD) dan pentadbir serta guru di sekolah tentang pengurusan sekolah dengan mengambil kira langkah-langkah keselamatan bagi mengawal penularan jangkitan COVID-19. Berdasarkan situasi semasa, garis panduan ini ditambah baik kepada Garis Panduan Pengurusan dan Pengoperasian Sekolah Dalam Norma Baharu 2.0 dan Garis Panduan Pengurusan dan Pengoperasian Sekolah 3.0 pada tahun 2021. Kedua-dua garis panduan ini telah menetapkan bahawa pihak sekolah hendaklah memastikan pihak luar yang bukan warga KPM tidak dibenarkan memasuki kawasan sekolah kecuali bagi tujuan pembaikan dan penyelenggaraan sekolah. Larangan ini adalah untuk memastikan kesihatan dan keselamatan warga sekolah terutamanya murid dilindungi dalam situasi norma baharu ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN WONG KAH WOH
[IPOH TIMUR]**

TARIKH : 03 MAC 2022 (KHAMIS)

SOALAN

TUAN WONG KAH WOH [IPOH TIMUR] minta **MENTERI KEWANGAN** menyatakan jumlah wang yang telah berjaya dikembalikan hasil daripada tindakan yang diambil terhadap isu 1MDB sejak tahun 2018. Nyatakan juga jumlah kerugian keseluruhan.

JAWAPAN

Tan Sri Yang Di Pertua,

Sehingga 31 Januari 2022, jumlah dana berkaitan 1Malaysia Development Bhd (1MDB) yang telah berjaya didapatkan kembali dan dimasukkan ke dalam Akaun Amanah Mendapatkan Kembali Aset (Assets Recovery) [AA MKA] adalah sebanyak kira-kira **RM19.14 bilion**. Sebahagian besar dana tersebut diperoleh daripada 5 sumber utama seperti berikut:

- sebanyak USD1.23 bilion atau kira-kira RM5.17 bilion telah diperoleh daripada Jabatan Keadilan Amerika Syarikat (DOJ);
- sebanyak USD2.5 bilion atau kira-kira RM10.5 bilion diperoleh daripada **Goldman Sachs sebagai sebahagian jumlah penyelesaian** yang telah berjaya dimuktamadkan pada Julai 2020 (dikreditkan pada September 2020);

- sebanyak USD80 juta atau kira-kira RM336 juta diterima daripada Deloitte hasil penyelesaian global yang telah dimeterai pada 24 Mei 2021 (dikreditkan pada Jun 2021);
- sebanyak RM2.315 bilion diterima daripada AmBank hasil penyelesaian global yang telah dimeterai pada 5 Mei 2021 (dikreditkan pada Julai dan Disember 2021); dan
- sebanyak USD80 juta atau kira-kira RM336 juta diterima daripada KPMG hasil penyelesaian global yang telah dimeterai pada 16 Disember 2021 (dikreditkan pada Januari 2022).

1MDB telah melantik Parker Randall sebagai juruaudit untuk melaksanakan pengauditan ke atas penyata kewangan syarikat termasuk aset dan liabilitinya. Namun demikian, laporan penyata kewangan beraudit yang terkini masih belum dapat dimuktamadkan kerana juruaudit yang lama iaitu KPMG (tahun 2010, 2011 dan 2012) dan Deloitte (tahun 2013 dan 2014) telah menarik balik laporan dan pandangan mereka terhadap penyata kewangan syarikat. Justeru itu, jumlah kerugian sebenar 1MDB pada masa ini tidak dapat ditentukan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KE EMPAT BELAS 2022**

PERTANYAAN : LISAN

DARIPADA : TUAN AHMAD BIN HASSAN (PAPAR)

TARIKH : 3 MAC 2022 (KHAMIS)

SOALAN

**TUAN AHMAD BIN HASSAN (PAPAR) minta MENTERI
PERTANIAN DAN INDUSTRI MAKANAN menyatakan :-**

- (a) langkah yang lebih tegas diambil bagi menyekat aktiviti pencerobohan bot pukat tunda dan nelayan asing di persisiran pantai Sabah yang menjejaskan pendapatan nelayan; dan
- (b) demi untuk membantu nelayan-nelayan pantai di P.175 Papar meningkatkan hasil tangkapan, berapa peruntukan yang akan disalurkan oleh Kementerian untuk membuat tukun-tukun tiruan sekitar perairan pulau-pulau berdekatan.

JAWAPAN

Tuan Yang Di Pertua,

Untuk makluman Ahli Yang Berhormat, di peringkat Persekutuan, Kerajaan telah meluluskan pindaan Akta Perikanan 1985 pindaan (2019) dan telah menaikkan denda maksimum bagi vesel penangkapan ikan asing yang menceroboh perairan perikanan Malaysia daripada RM1juta kepada RM6juta bagi nakhoda dan bagi setiap anggota kru dari RM100 ribu kepada RM600 ribu.

SOALAN NO : 41

Kementerian Pertanian dan Perikanan Sabah pula telah melaksanakan pelbagai langkah untuk menyekat aktiviti pencerobohan bot pukat tunda dan nelayan asing di persisiran pantai Sabah seperti berikut:

- i. memasang semua bot pukat tunda dengan Sistem Pemantauan Pergerakan Bot (*Vessel Monitoring System - VMS*);
- ii. menggantung dan membatalkan lesen perikanan bagi bot-bot tunda yang telah melakukan kesalahan lebih daripada empat (4) kali;
- iii. mengadakan operasi khusus iaitu 'Ops Naga' yang membabitkan pengoperasian bersama serta rondaan dan penguatkuasaan undang-undang secara bersepadu mulai 2 Mei 2019;
- iv. perkongsian maklumat antara agensi dari masa ke semasa; dan
- v. rondaan dan penguatkuasaan di perairan perikanan Malaysia dengan kerjasama pelbagai agensi penguatkuasa maritim.

Kementerian Pertanian dan Industri Makanan (MAFI) telah menyalurkan peruntukan pembangunan di bawah RMKe-12 berjumlah RM230,000.00 bagi membangunkan tukun-tukun tiruan di Daerah Papar dalam usaha membantu nelayan-nelayan di Papar meningkatkan hasil tangkapan. Bermula tahun 2010, sebanyak 38 unit tukun tiruan telah dilabuhkan di kawasan perairan laut Kg. Muara Papar, Kg. Sungai Padang, Kg. Pantai Manis, Kg. Buang Sayang, Kg. Laut Papar dan Kg. Kuala Kimanis. Sebanyak 14 unit tukun tiruan rekreasi jenis Penghalang Pukat Tunda seberat 5.5 tan metrik seunit telah dilabuhkan di Kg. Kuala Kimanis pada tahun 2021.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' DR. XAVIER JAYAKUMAR A/L
ARULANANDAM (KUALA LANGAT)**

TARIKH : 3 MAC 2022 (KHAMIS)

SOALAN

DATO' DR. XAVIER JAYAKUMAR A/L ARULANANDAM (KUALA LANGAT) minta **MENTERI TENAGA DAN SUMBER ASLI** menyatakan semua jenis mineral yang terdapat dalam negara kita mengikut negeri serta jumlah kuantiti keseluruhan dan nilainya. Siapakah pengusaha-pengusaha mineral ini dan apakah status kini dalam penubuhan Lembaga Sumber Asli Negara (Formation of the Mineral Board).

JAWAPAN

Tuan Yang di-Pertua,

1. Berdasarkan kepada kajian yang dilaksanakan oleh Jabatan Mineral dan Geosains Malaysia (JMG) telah melaksanakan pemetaan di pelbagai lokasi di negeri-negeri bagi menentukan sumber mineral negara. Setakat tahun 2020, jumlah sumber mineral negara dianggarkan bernilai mencecah RM4.11 trilion yang terdiri daripada mineral berlogam berjumlah RM1.03 trilion, mineral bukan logam atau mineral perindustrian berjumlah RM2.96 trilion dan mineral tenaga berjumlah RM0.12 trilion.

2. Anggaran jumlah nilai ini merangkumi mineral-mineral seperti timah, emas, bauksit, nikel, bijih besi, arang batu dan termasuk sumber mineral baharu iaitu unsur nadir bumi bukan radioaktif (*Non-Radioactive Rare Earth Elements* - NR-REE).

3. Selain itu, negara juga mempunyai sumber pasir yang terdiri daripada pasir laut dan pasir sungai dengan anggaran berjumlah 43,897 juta tan metrik dengan nilai RM1.312 bilion.
4. Untuk makluman Yang Berhormat, sumber mineral tersebut terdapat di pelbagai lokasi di seluruh negara.
5. Setakat ini, pengusaha mineral di Malaysia terdiri daripada pelabur tempatan dan luar negara yang memenuhi keperluan dan syarat yang ditetapkan oleh Akta Pembangunan Mineral 1994. Antaranya seperti Rahman Hydraulic Tin Sdn. Bhd. dan Kaolin (Malaysia) Sdn. Bhd.
6. Seterusnya, saya ingin memaklumkan bahawa gerak kerja penubuhan Lembaga Pembangunan Industri Mineral Malaysia (LPMM) sedang giat dilaksanakan oleh KeTSA bersama JMG dan melibatkan beberapa siri libat urus bersama Agensi Pusat dan Pihak Berkuasa Negeri.
7. Penubuhan LPMM ini bertujuan memperkasakan industri mineral ke arah penjanaaan sumber ekonomi baharu dan meningkatkan daya saing industri melalui aktiviti penyelidikan pembangunan, pengkomersialan dan inovasi (*Research, Development, Commercialization, Innovation – R&D&C&I*). Penubuhan LPMM juga bakal memperkemaskan elemen kawal selia dan penguatkuasaan serta mewujudkan pengurusan sumber mineral yang lebih sistematik.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : JAWAB LISAN

**DARIPADA : YB DATUK HAJI HASANUDDIN BIN MOHD
YUNUS [HULU LANGAT]**

TARIKH : 3 MAC 2022 (KHAMIS)

SOALAN

DATUK HAJI HASANUDDIN BIN MOHD YUNUS [HULU LANGAT]
minta **MENTERI PENGANGKUTAN** menyatakan apakah inisiatif yang
dibuat oleh Kerajaan untuk menjadikan penerbangan Malaysia (MAS)
dalam kalangan 10 syarikat penerbangan paling selamat di dunia, "*The
World's Safest Airline*".

JAWAPAN

Tuan Yang di-Pertua,

1. Kementerian Pengangkutan melalui Pihak Perkuasa Penerbangan Awam Malaysia (CAAM) bertanggungjawab dalam mengawal selia perihal selamat dan keselamatan penerbangan awam termasuk mewujudkan standard dan menguatkuasakannya. Piawaian dan *standard* yang ditetapkan adalah berasaskan kepada piawaian antarabangsa yang ditetapkan oleh *International Civil Aviation Organisation* (ICAO).
2. Dalam hubungan ini, semua syarikat penerbangan termasuk Malaysia Airlines Berhad (MAB) perlu mematuhi peraturan-peraturan teknikal dan keselamatan yang telah ditetapkan oleh CAAM bagi membolehkannya beroperasi. Sehingga kini, kesemua syarikat penerbangan Malaysia termasuk MAB telah mematuhi piawaian yang telah ditetapkan dan beroperasi dengan selamat.
3. Penarafan "*World's Safest Airlines*" dibuat oleh *AirlineRatings*, sebuah laman web semakan keselamatan dan penilaian produk syarikat penerbangan di seluruh dunia, untuk langkah kesihatan dan keselamatan COVID-19. Dalam hubungan ini, inisiatif-inisiatif yang telah diambil oleh MAB untuk tersenarai sebagai "*World's Safest Airlines*" menjurus kepada pematuhan piawaian keselamatan penerbangan antarabangsa yang digariskan oleh ICAO dan CAAM serta keakuran kepada Program Pensijilan Industri Penerbangan Awam yang dikenali sebagai *The International Air Transport Association (IATA) Operational Safety Audit* (IOSA).
4. Piawaian pihak berkuasa dan industri antarabangsa ini menjamin keselamatan penerbangan melalui pengekalan amalan "Keselamatan dan Sekuriti Penerbangan" yang mengutamakan pengurusan risiko, juruterbang yang terlatih dan berkemahiran, pesawat yang moden dan diselenggara, penggunaan aplikasi digital, penganalisan penerbangan yang rapi, sistem komunikasi yang canggih dan berlapis, sistem sekuriti siber dan penilaian keselamatan ruang angkasa di kawasan konflik.

5. MAB juga menempatkan “Keselamatan dan Sekuriti Penerbangan” sebagai salah satu daripada lima “Bidang Tumpuan Utama” di dalam “*Malaysia Aviation Group (MAG) Sustainability Blueprint*”. “*MAG Sustainability Blueprint*” ini merupakan pelan tindakan oleh MAG, iaitu syarikat induk MAB, yang bertujuan untuk menggalakkan pembangunan sosio-ekonomi dan mencapai sasaran pelepasan karbon sifar bersih menjelang tahun 2050.

6. Selain daripada itu, MAB bersama-sama anak-anak syarikat lain di bawah MAG juga komited terhadap keselamatan dan kebersihan dengan kempen “MHFlySafe” yang menetapkan piawaian kesihatan dan keselamatan Kumpulan MAG dengan amalan terbaik dan cadangan yang diiktiraf di peringkat global. “MHFlySafe” ialah bukti usaha bersepadu MAG merentas semua bidang perniagaan dalam memastikan aset, produk, infrastruktur dan proses MAG memenuhi piawaian global dari segi kualiti, kesihatan dan keselamatan, perlindungan alam sekitar dan tanggungjawab sosial.

7. MAG baru-baru ini menerima pensijilan untuk Label Kecemerlangan dan Keselamatan “SAFEGUARD” oleh Bureau Veritas yang dinilai secara menyeluruh oleh badan bebas dan diiktiraf di peringkat global. Pensijilan ini menandakan bahawa usaha MAG untuk memastikan perjalanan yang lebih selamat dan lancar memenuhi piawaian antarabangsa. Ini adalah bukti komitmen MAG untuk meletakkan keselamatan sebagai teras portfolio perniagaan penerbangan MAG yang berbeza-beza.

**PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN
DARIPADA : YB DATO' ABDULLAH SANI BIN ABDUL
HAMID (KAPAR)
TARIKH : 3 MAC 2022 (KHAMIS)

SOALAN

YB DATO' ABDULLAH SANI BIN ABDUL HAMID (KAPAR) minta **MENTERI PENGAJIAN TINGGI** menyatakan adakah terdapat perancangan merangka garis panduan untuk golongan mahasiswa dalam melibatkan diri dalam aktiviti politik selari dengan pindaan Akta Universiti dan Kolej Universiti (AUKU) pada 2019 yang membuang Seksyen 15(2)(c).

JAWAPAN

Tan Sri Yang di-Pertua,

Pewujudan Akta Universiti dan Kolej Universiti Tahun 1971 (AUKU) bertujuan untuk menubuhkan, menyelenggara dan mentadbir universiti serta kolej universiti dan bagi perkara yang berkenaan dengannya. Antara komponen yang terkandung dalam AUKU termasuk pelantikan pengurusan tertinggi universiti, tadbir urus universiti serta aktiviti pelajar.

Selaras dengan hasrat Kementerian untuk memastikan AUKU kekal relevan, beberapa pindaan terhadap AUKU telah dilakukan. Antara pindaan yang melibatkan aktiviti pelajar adalah pindaan pada tahun 2012 bagi membolehkan mahasiswa menyertai kegiatan parti politik di luar kampus, dan pindaan pada tahun 2019 untuk memberikan kebebasan kepada pelajar menyertai aktiviti parti politik dalam kampus. Kedua-dua pindaan ini telah memberikan impak yang signifikan dalam memberikan kebebasan serta menyediakan ruang untuk pelajar menyertai aktiviti politik.

Sehubungan dengan itu, Kementerian telah melihat semula peruntukan berkaitan aktiviti politik dalam Kaedah Tatatertib Universiti Awam (UA) bagi memberikan kebenaran penglibatan pelajar dalam aktiviti politik. Pada masa yang sama, pihak universiti dan Kementerian sedang membangunkan garis panduan bersesuaian sebagai panduan kepada golongan mahasiswa dalam menyertai kegiatan politik di dalam dan luar kampus agar keharmonian UA tetap terpelihara.

Amnya, garis panduan yang disediakan meletakkan kepentingan dan kebajikan pelajar sebagai keutamaan. Kementerian juga yakin bahawa garis panduan ini kelak dapat memperkasakan kebebasan bersuara dan semangat autonomi yang diberikan kepada pelajar, yang seterusnya boleh membentuk generasi pelapis pemimpin negara yang bersikap lebih terbuka, matang dan bertanggungjawab ke atas setiap keputusan yang diambil.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN WONG TACK (BENTONG)

TARIKH : 3 MAC 2022 (KHAMIS)

SOALAN

TUAN WONG TACK (BENTONG) minta **MENTERI TENAGA DAN SUMBER ASLI** menyatakan mengapa jalan boleh diluluskan dan dibina di dalam kawasan Hutan Simpan Lentang dan Hutan Simpan Klau/Raka di Bentong.

JAWAPAN

Tuan Yang di-Pertua,

1. Jabatan Perhutanan Semenanjung Malaysia (JPSPM) melalui Jabatan Perhutanan Negeri Pahang tidak meluluskan sebarang pembinaan jalan hutan dalam Hutan Simpan Lentang untuk digunakan oleh mana-mana pihak luar bagi tujuan pengusaha hasil hutan. Jalan hutan di dalam Hutan Simpan Lentang hanya digunakan bagi aktiviti pemantauan dan penguatkuasaan oleh kakitangan Jabatan Perhutanan Pahang serta kegunaan penduduk setempat yang diberikan permit penggunaan untuk mengakses sumber air.

2. Manakala bagi Hutan Simpan Klau/Raka, jalan hutan tersebut merupakan jalan sedia ada semenjak tahun 1970an. Jabatan Perhutanan Pahang telah memberikan Permit Jalan untuk menggunakan jalan hutan sedia ada dalam Hutan Simpan Klau/Raka bagi mengeluarkan saki baki kayu jaras dan kayu balak dari kawasan hutan Tanah Kerajaan yang bersebelahan. Keputusan untuk memberikan Permit Jalan ini juga dibuat melalui Mesyuarat Majlis Kerajaan Negeri pada 25 Februari 2021. Selain itu, Permit Jalan yang diberikan oleh Jabatan Perhutanan Pahang untuk menggunakan jalan hutan sedia ada ini adalah bagi mengelakkan pembukaan kawasan hutan lain untuk membina jalan hutan baharu.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK MOHD AZIS BIN JAMMAN
[SEPANGGAR]**

TARIKH : 03 MAC 2022 (KHAMIS)

SOALAN

DATUK MOHD AZIS BIN JAMMAN [SEPANGGAR] minta **MENTERI KEWANGAN** menyatakan jumlah dan nilai projek rundingan terus dan tender terhad yang telah diluluskan oleh Kementerian Kewangan kepada setiap permohonan dari Kementerian terlibat bagi tahun 2020 dan 2021 (mengikut tahun dan Kementerian).

JAWAPAN

Tan Sri Yang Di Pertua,

Kerajaan telah dan terus berusaha untuk merancakkan aktiviti ekonomi melalui pengenalan beberapa strategi berkaitan perolehan/projek Kerajaan agar pelaksanaannya dapat dipercepatkan dan seterusnya mampu memberi kesan berganda kepada ekonomi negara. Antara lain, Agensi Kerajaan dibenarkan untuk mepakej perolehan tahunan kepada pakej yang lebih kecil untuk dilaksanakan secara sebut harga atau undian (bagi perolehan kerja) berbanding tender. Had nilai perolehan kerja Kerajaan dinaikkan ke nilai ambang baharu seperti Pekeliling Perbendaharaan (PP)/Perolehan Kerajaan (PK) 2.2: Kaedah Pelaksanaan Perolehan/Projek Kerajaan Tahun 2021 dan Surat Edaran Kementerian Kewangan bertarikh 16 Februari 2021 mengenai had nilai lantikan terus bagi perolehan kerja untuk kontraktor Gred G1 dan G2.

Pertimbangan pengecualian kaedah perolehan secara rundingan terus dibuat berdasarkan kriteria seperti melibatkan kesegeraan atas kepentingan awam, bagi maksud penyeragaman, satu punca bekalan/perkhidmatan (pembuat/pemegang francais), melibatkan keselamatan/strategik atau kontrak dengan syarikat pembuat Bumiputera sepertimana yang dinyatakan di bawah PP/PK 7.15: Garis Panduan Permohonan Perolehan Secara Rundingan Terus.

Semua permohonan yang dikemukakan akan dinilai dan diteliti secara menyeluruh daripada pelbagai aspek bagi memastikan kelulusan rundingan terus yang diberikan tetap melindungi kepentingan Kerajaan serta tidak menjejaskan kerancakan perkembangan ekonomi. Kerajaan juga melaksanakan *due diligence* yang sewajarnya bagi memastikan hanya projek yang benar-benar memenuhi kriteria tersebut boleh dipertimbangkan. Manakala kaedah perolehan secara tender terhad telah dimansuhkan dan digantikan dengan kaedah tender terbuka prakelayakan berdasarkan surat arahan Kementerian Kewangan bertarikh 29 Jun 2018. Selain itu, MOF sedang mengkaji semula paparan senarai pengecualian kaedah perolehan secara rundingan terus di Portal MyProcurement. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : Y.B. TUAN KHALID BIN ABD SAMAD
[SHAH ALAM]**

TARIKH : 03 MAC 2022 (KHAMIS)

SOALAN

TUAN KHALID BIN ABD SAMAD [SHAH ALAM] minta **MENTERI KEWANGAN** menyatakan impak kemuflihan Genting Hong Kong terhadap insitusi kewangan tempatan negara khususnya Permodalan Nasional Berhad, Khazanah dan Kumpulan Wang Simpanan Pekerja (KWSP) sebagai pemegang saham terbesar dalam ketiga-tiga bank yang terlibat.

JAWAPAN

Tan Sri Yang di Pertua,

Setiap institusi perbankan mempunyai proses usaha wajar (*due diligence*) dan penilaian kredit oleh Jawatankuasa Kredit masing-masing bagi menilai keupayaan bakal peminjam untuk membayar balik pinjaman mereka. Institusi perbankan terus mengekalkan tahap peruntukan yang tinggi dan penampakan modal yang kukuh justeru menunjukkan daya tahan mereka untuk menangani potensi risiko kredit yang lebih tinggi. Potensi kerugian akibat dedahan kepada Kumpulan Genting HK berada dalam kadar kerugian yang mampu ditanggung oleh institusi perbankan terbabit. Ujian tekanan turut mengesahkan keupayaan sistem perbankan untuk berhadapan dengan potensi kejutan dalam keadaan ekonomi makro dan kewangan yang buruk.

Seperti yang kita sedia maklum, ketiga-tiga bank yang terlibat dengan pemberian pinjaman kepada Kumpulan Genting HK telah mengeluarkan laporan kewangan untuk tahun kewangan berakhir 31 Disember 2021 yang mantap berbanding tahun sebelumnya sejajar dengan pemulihan ekonomi pasca pandemik. Berdasarkan prestasi kewangan yang kukuh, ianya tidak memberi impak yang ketara kepada pemegang saham terbesar institusi perbankan terbabit.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

DARIPADA : DR. ONG KIAN MING [BANGI]

TARIKH : 03 MAC 2022 (KHAMIS)

SOALAN

DR. ONG KIAN MING [BANGI] minta **MENTERI KEWANGAN** menyatakan status pelaksanaan projek berskala kecil bagi kontraktor kelas G1-G4 yang diumumkan di bawah Pakej Rangsangan Ekonomi 2020 (RM2.5 bilion), Pakej Prihatin (RM2 bilion), dan Pakej PEMERKASA (penambahan peruntukan RM2.5 bilion) dan berapa jumlah yang diperuntukkan dan telah digunakan masing-masing bagi setiap negeri.

JAWAPAN

Tan Sri Yang Di Pertua,

Sehingga Januari 2022, sebanyak RM4.3 bilion atau 61.4% daripada keseluruhan peruntukan pakej pemulihan dan bantuan 2020 dan 2021 yang telah diagihkan bagi tujuan pelaksanaan projek berskala kecil telah dibelanjakan yang memanfaatkan kontraktor kelas G1 hingga G4. Dijangkakan prestasi perbelanjaan berkenaan akan tercapai sepenuhnya menjelang hujung tahun 2022. Skop projek berskala kecil ini menjurus kepada penyelenggaraan, pembaikan kecil, naiktaraf dan penggantian peralatan yang merangkumi infrastruktur awam dan jabatan atau agensi Kerajaan bagi meningkatkan perkhidmatan penyampaian Kerajaan.

Untuk makluman Yang Berhormat jua, pengagihan peruntukan dibuat kepada kementerian, jabatan atau agensi berdasarkan keperluan mereka dan bukan menumpukan kepada pengagihan mengikut negeri. Lima negeri yang menerima agihan peruntukan tertinggi bagi projek berskala kecil yang telah dikenalpasti adalah seperti berikut:

- Pertama, Selangor dengan peruntukan sebanyak RM267 juta dan perbelanjaan setakat ini sebanyak RM114 juta;
- Kedua, Sabah dengan peruntukan sebanyak RM211 juta dan perbelanjaan setakat ini sebanyak RM172 juta;
- Ketiga, Johor dengan peruntukan dengan peruntukan sebanyak RM211 juta dan perbelanjaan setakat ini sebanyak RM157 juta;
- Ke-empat, Wilayah Persekutuan dengan peruntukan sebanyak RM199 juta dengan perbelanjaan sebanyak RM68 juta; dan
- Kelima, Sarawak dengan peruntukan sebanyak RM186 juta dan perbelanjaan setakat ini sebanyak RM141 juta.

Walau bagaimanapun, pengagihan ini adalah bukan pengukuran sebenar kerana terdapat juga agihan yang dibuat oleh agensi di bawah kluster pelbagai negeri yang memanfaatkan semua negeri.

Sekian, terima kasih.

**PEMBERITAHUAN PERTANYAAN DEWAN NEGARA
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN LARRY SOON @ LARRY SNG
WEI SHIEN (JULAU)**

TARIKH : 3 MAC 2022 (KHAMIS)

SOALAN

TUAN LARRY SOON @ LARRY SNG WEI SHIEN [JULAU] minta **MENTERI PERTANIAN DAN INDUSTRI MAKANAN** menyatakan apakah Kementerian mempunyai perancangan khusus untuk memanfaatkan sumber tanah di Sabah dan Sarawak yang luas bagi tujuan aktiviti-aktiviti pertanian sebagai usaha dalam merancakkan lagi sektor agrikultur negara agar kebergantungan dalam hasil eksport tani luar dapat dikurangkan.

JAWAPAN

Tuan Yang Di Pertua,

Untuk makluman Ahli Yang Berhormat, Kerajaan Persekutuan melalui Rancangan Malaysia Kedua Belas (RMKe-12) telah memberikan tumpuan khusus untuk melonjakkan pembangunan Sabah dan Sarawak melalui satu bab khas yang menggariskan strategi, inisiatif dan tindakan yang akan dilaksanakan dalam tempoh 2021-2025. Aspirasi ini adalah selaras dengan semangat Keluarga Malaysia untuk mencapai pembangunan sosioekonomi yang lebih adil, saksama dan inklusif.

Secara khususnya, perancangan Kementerian untuk merancakkan lagi sektor pertanian di Sabah dan Sarawak adalah seperti berikut:

1. Membangunkan Ranau dan Keningau sebagai kawasan pengeluar utama sayuran dan produk tenusu serta Kota Belud untuk penanaman padi dan pengeluaran buah-buahan berskala besar;
2. Mentransformasi kawasan Pembangunan Pertanian Bersepadu di Kalaka Saribas dan Samarahan kepada kawasan pertanian moden;
3. Menaik taraf kawasan yang dikhaskan untuk pengeluaran makanan seperti Taman Kekal Pengeluaran Makanan dan Zon Industri Akuakultur bagi menggalakkan pertanian moden;
4. Menggalakkan penanaman komoditi agromakanan bernilai tinggi secara berskala besar; dan
5. Meningkatkan penggunaan teknologi digital melalui aplikasi pertanian pintar dan tepat di sepanjang rantai nilai pengeluaran.

Usaha-usaha tersebut akan terus dipergiatkan melalui pelbagai program dan projek yang akan dilaksanakan sepanjang tempoh RMKe-12 untuk meningkatkan pengeluaran hasil pertanian dan bekalan makanan negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : PUAN HAJAH FUZIAH BINTI SALLEH
[KUANTAN]**

TARIKH : 03 MAC 2022 (KHAMIS)

SOALAN

PUAN HAJAH FUZIAH BINTI SALLEH [Kuantan] minta **MENTERI KEWANGAN** menyatakan penjelasan dari Menteri Kewangan berkenaan pelaksanaan *Gender Responsive Budget* yang diumumkan dalam Bajet 2022. Apakah pencapaian setakat ini.

JAWAPAN

Tan Sri Yang Di Pertua,

Berhubung pelaksanaan *Gender Responsive Budget*, seperti yang diumumkan semasa ucapan penggulungan Bajet 2022 peringkat dasar, peruntukan tambahan 15 juta ringgit kepada Jabatan Perangkaan Malaysia (DOSM) disediakan bagi menggerakkan ketersediaan data seperti perincian mengikut gender supaya setiap dasar Kerajaan adalah lebih inklusif, bersasar dan menyeluruh terutamanya melibatkan penyediaan bajet tahunan negara.

Kementerian Kewangan (MOF) akan menyelaraskan bersama-sama dengan DOSM dan Kementerian Pembangunan Wanita, Keluarga dan Masyarakat (KPWKM) dalam membina gender *diaggregated data* terutamanya dalam bidang seperti keberhasilan kebajikan isi rumah (ketua isi rumah wanita/ ibu tunggal), kesihatan wanita, keselamatan (keganasan rumah tangga), peluang pekerjaan dan keusahawanan untuk wanita.

Berhubung inisiatif-inisiatif wanita di bawah Bajet 2022 seperti Dananita, peruntukan taska, peruntukan untuk Bahagian D11 Polis Diraja Malaysia (PDRM), subsidi mammogram dan lain-lain, pemantauan akan dibuat bagi menilai keberkesanan inisiatif sebagai platform penyediaan Bajet 2023.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : PUAN YEO BEE YIN (BAKRI)

TARIKH : 3 MAC 2022 (KHAMIS)

SOALAN

PUAN YEO BEE YIN (BAKRI) minta **MENTERI TENAGA DAN SUMBER
ASLI** menyatakan status terkini projek Akaun Amanah Industri Bekalan
Elektrik (AAIBE) pembekalan elektrik di 13 kampung Orang Asli di Pahang.

JAWAPAN

Tuan Yang di-Pertua,

1. Pada tahun 2019, Akaun Amanah Industri Bekalan Elektrik (AAIBE) telah meluluskan pembiayaan untuk tiga (3) buah projek mikro hidro bagi tujuan pembekalan elektrik di 13 kampung Orang Asli di Negeri Pahang seperti berikut:

- i) projek di Pos Lenjang yang melibatkan 10 buah kampung oleh Tenaga Nasional Berhad (TNB);
- ii) projek di Pos Lemoi yang melibatkan sebuah kampung oleh TONIBUNG, sebuah badan bukan Kerajaan; dan
- iii) projek di Pos Titom yang melibatkan 2 buah kampung oleh *Energy Action Partners* (ENACT), juga sebuah badan bukan Kerajaan.

2. Projek yang dicadangkan oleh Tenaga Nasional Berhad (TNB) kini dalam peringkat mendapatkan kelulusan Kebenaran Merancang manakala projek yang dikendalikan oleh pihak TONIBUNG dan ENACT telah ditangguhkan berikutan keputusan Kerajaan Negeri Pahang yang hanya membenarkan pembangunan projek mikro hidro di negeri tersebut dilaksanakan oleh pihak TNB.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN ABDUL LATIF BIN ABDUL RAHMAN
[KUALA KRAI]**

TARIKH : 3 MAC 2022 (KHAMIS)

SOALAN

TUAN ABDUL LATIF BIN ABDUL RAHMAN [KUALA KRAI] minta **MENTERI KANAN PENDIDIKAN** menyatakan apakah tindakan Kementerian dalam memastikan pengajaran dan pembelajaran tidak terbantut berikutan peningkatan kes positif COVID-19 dalam kalangan pelajar sekolah yang membimbangkan sehingga mewujudkan kluster sekolah.

JAWAPAN

Tuan Yang di-Pertua,

Kementerian Pendidikan Malaysia (KPM) komited dalam memastikan persekitaran sekolah adalah selamat bagi pelaksanaan pengajaran dan pembelajaran (PdP) secara bersemuka.

Bagi memastikan kelancaran pengoperasian sekolah, KPM telah menyediakan Garis Panduan Pengurusan dan Pengoperasian Sekolah 3.0 (GPPPS) 3.0 sebagai rujukan kepada jabatan pendidikan negeri (JPN), pejabat pendidikan daerah (PPD) dan pentadbir serta guru. Garis Panduan ini mengandungi panduan khusus mengenai prosedur pengurusan murid bergejala, murid disahkan positif COVID-19, murid yang dikenal pasti sebagai kontak rapat pesakit COVID-19 di sekolah dan penutupan sekolah.

Selari dengan situasi semasa berkenaan penularan wabak COVID-19, KPM sentiasa berbincang secara berkala bersama-sama Kementerian Kesihatan Malaysia (KKM) untuk meneliti dan menambah baik prosedur operasi standard (SOP) sedia ada bagi mengekang jangkitan COVID-19 di sekolah. Berdasarkan saranan daripada KKM, pihak KPM telah mengambil tindakan memperketatkan lagi pelaksanaan GPPPS 3.0 dengan menyediakan lampiran tambahan (*annexe*) kepada garis panduan ini yang memberi penekanan kepada keselamatan dan kesihatan warga sekolah. Ia menekankan beberapa aspek utama seperti kehadiran warga sekolah yang bergejala, kebenaran masuk berdasarkan status MySejahtera, tanggungjawab guru di sekolah, pengurusan bilik guru, pengurusan murid di sekolah, pengurusan asrama, pengurusan dewan makan asrama dan pengurusan kes positif di sekolah. Selain itu, peranan ketua kelas/pengawas/pembimbing rakan sebaya turut diperkasakan untuk bersama-sama memantau rakan-rakan yang bergejala dari semasa ke semasa dan mengingatkan rakan mereka supaya sentiasa mematuhi SOP. Selain itu, KPM turut melaksanakan ujian saringan bergilir COVID-19 bagi murid sekolah rendah di bawah Strategi Pengujian COVID-19 Kebangsaan.

Berdasarkan langkah-langkah yang telah diambil ini, KPM yakin sesi pengajaran dan pembelajaran (PdP) secara bersemuka dapat diteruskan dan dilaksanakan secara kondusif.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TENGKU ZULPURI BIN RAJA PUJI (RAUB)

TARIKH : 3 MAC 2022 (KHAMIS)

SOALAN

TENGKU ZULPURI BIN RAJA PUJI (RAUB) minta **MENTERI TENAGA DAN SUMBER ASLI** menyatakan bagaimana pihak Jabatan Perhutanan Semenanjung Malaysia (JPSM) membuat pengiraan yang mana Malaysia masih berada lebih dalam 50% hutan sekiranya pembalakan ini masih berjalan sedangkan pokok gantian yang ditanam masih kecil atau mati. Adakah ladang kelapa sawit, getah itu termasuk dalam pengiraan. Bagaimana juga JPSM mengetahui CCT di sesebuah negeri itu dipatuhi (tidak tebang melebihi kuota).

JAWAPAN

Tuan Yang di-Pertua,

1. Data hutan merupakan data yang dinamik. Elemen-elemen seperti perubahan status guna tanah, proses pewartaan keluar dan masuk Hutan Simpanan Kekal dan Kawasan Perlindungan (*Totally Protected Area-TPA*), peningkatan keupayaan teknologi dan aplikasi terkini, perubahan ketetapan data rujukan dan data penyelidikan termasuk penetapan dasar baharu yang berlaku di ketiga-tiga wilayah akan memberi kesan kepada peningkatan atau pengurangan data hutan tahunan yang dilaporkan.
2. Dalam hubungan ini, pengiraan data hutan adalah melibatkan beberapa faktor, antaranya adalah notis pewartaan bagi Hutan Simpanan Kekal (HSK) dan Kawasan Perlindungan, peta geospasial bagi mengenal pasti sempadan hutan serta maklumat Inventori Hutan Kebangsaan (NFI) yang dijalankan setiap 10 tahun.
3. Selain daripada inventori kawasan berhutan secara konvensional di Malaysia, penggunaan teknologi terkini dalam menganalisis keluasan kawasan berhutan seperti *Geographical Information System* (GIS) dengan izin, data-data geospasial dan imej satelit turut membantu mengukuhkan cerapan data dan memberi gambaran maklumat yang lebih terperinci. Penggunaan teknologi terkini telah membantu dalam penyediaan data dan maklumat yang lebih tepat dan akan diteruskan dalam membantu menambah baik pelaksanaan Pengurusan Hutan Secara Berkekalan di Malaysia.
4. Data-data yang dikumpul ini perlu melalui proses analisis, verifikasi dan pengesahan secara komprehensif sebelum ia digunakan sebagai data rasmi negara di peringkat domestik dan antarabangsa. Proses verifikasi dan pengesahan melibatkan kesemua Jabatan Perhutanan di Semenanjung, Sabah dan Sarawak.
5. Malaysia telah menetapkan definisi hutan nasional sebagai “sesuatu kawasan merangkumi keluasan melebihi 0.5 hektar termasuk hutan semula jadi/asli dan ladang hutan tetapi tidak termasuk pokok-pokok yang ditanam bagi tujuan pertanian atau penggunaan tanah bandar *urban land use*. **Pokok-pokok yang terdapat di kawasan tersebut juga hendaklah**

mampu mencapai ketinggian sekurang-kurangnya 5 meter dan dilitupi oleh silara pokok melebihi 30%. Definisi ini adalah selari dengan definisi hutan yang ditetapkan oleh Food and Agriculture Organization (FAO) di bawah Pertubuhan Bangsa-bangsa Bersatu. Berdasarkan definisi hutan ini, kawasan ladang kelapa sawit dan getah adalah tidak termasuk dalam pengiraan jumlah kawasan berhutan di Malaysia.

6. Bagi memantau pengusaha hasilan hutan dalam HSK dilaksanakan mematuhi kadar Catuan Tebangan Tahunan (CTT) yang telah ditetapkan, setiap Jabatan Perhutanan Negeri perlu menyediakan laporan mengenai pembukaan kawasan pengusaha hasilan hutan kepada JPSPM secara bulanan. Laporan ini akan disusun secara bersiri bagi memantau pematuhan CTT di negeri-negeri.

7. Seterusnya, maklumat-maklumat ini akan menjalani proses pengesahan oleh JPSPM melalui Mesyuarat Jawatankuasa Pemantauan Operasi Hutan (JKPOH) yang dipengerusikan oleh Ketua Pengarah Perhutanan Semenanjung Malaysia setiap suku tahun. Di samping itu, pelaksanaan CTT turut diakreditasikan melalui pensijilan MS ISO 9001:2015 Pengurusan Pengeluaran Kayu Bulat Secara Berkekalan Bagi Hutan Darat Asli Di Hutan Simpanan Kekal dan Pensijilan Pengurusan Hutan Kriteria dan Indikator Malaysia bagi Pengurusan Hutan Secara Berkekalan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN CHE ALIAS BIN HAMID (KEMAMAN)

TARIKH : 3 MAC 2022 (KHAMIS)

SOALAN

TUAN CHE ALIAS BIN HAMID (KEMAMAN) minta **MENTERI TENAGA DAN SUMBER ASLI** menyatakan peratus pelaksanaan projek ladang hutan (ladang monokultur) berskala besar dan kegiatan perlombongan dalam kawasan Hutan Simpan Kekal (HSK) di seluruh negara.

JAWAPAN

Tuan Yang di-Pertua,

1. Untuk makluman Ahli Yang Berhormat, seluas 439,189 hektar dalam kawasan Hutan Simpanan Kekal (HSK) telah diluluskan oleh Majlis Tanah Negara (MTN) Ke-68 pada tahun 2012 sebagai Zon Penubuhan Ladang Hutan (ZPLH) di Semenanjung. Sehingga 31 Disember 2021, seluas 213,522.19 hektar atau 48.62 peratus daripada jumlah tersebut telah dibangunkan sebagai ladang hutan di Semenanjung.
2. Kerajaan Negeri Sabah pada tahun 2021 mensasarkan pembangunan seluas 400,000 kawasan Hutan Simpan Komersial (Kelas II) sebagai ladang hutan menjelang tahun 2035, selaras dengan Pelan Pembangunan Sabah Maju Jaya 2021-2025. Sehingga 31 Disember 2021, seluas 149,558 hektar atau 37 peratus daripada sasaran tersebut telah dibangunkan sebagai ladang hutan di Sabah. Manakala di Sarawak, Kerajaan Negeri telah membuat ketetapan di bawah *Revised Policy Direction on Industrial Forest Plantation in Sarawak* pada tahun 2020 untuk mencapai sasaran sebanyak 1 juta hektar kawasan HSK dan Tanah Kerajaan akan dibangunkan sebagai ladang hutan (dikenali sebagai hutan industri di Sarawak). Sehingga 31 Disember 2021, seluas 527,790 hektar atau 52.78 peratus telah dibangunkan sebagai ladang hutan di Sarawak.
3. Bagi kegiatan perlombongan dalam HSK, MTN Ke-70 pada 18 November 2014 telah bersetuju supaya Kerajaan-kerajaan Negeri mengambil inisiatif untuk mengawal atau seboleh-bolehnya mengelakkan sebarang kelulusan aktiviti perlombongan dan pengkuarian di dalam HSK. Oleh yang demikian, adalah menjadi dasar Kementerian Tenaga dan Sumber Asli (KeTSA) untuk tidak meluluskan sebarang kelulusan Surat Kebenaran Skim Pengendalian Melombong (*Operational Mining Scheme* - OMS) bagi aktiviti perlombongan di kawasan-kawasan pemeliharaan iaitu HSK, Kawasan Rizab Perlindungan, Kawasan Tadahan Air dan Kawasan Sensitif Alam Sekitar (KSAS). KeTSA juga menyarankan kepada Pihak Berkuasa Negeri supaya tidak mewarta keluar mana-mana HSK untuk tujuan pengeluaran pajakan melombong.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN
TUAN STEVEN CHOONG SHIAU YOON
DARIPADA : (TEBRAU)
TARIKH : 3 MAC 2022 (KHAMIS)

SOALAN

TUAN STEVEN CHOONG SHIAU YOON (TEBRAU) minta **MENTERI PERTANIAN DAN INDUSTRI MAKANAN** menyatakan mengapa bilangan peratusan usahawan muda yang terlibat dalam pertanian dan industri asas tani tersebut adalah berkurangan dan cara mengatasi masalah tersebut.

JAWAPAN

Tuan Yang Di Pertua,

Untuk makluman Ahli Yang Berhormat, Kementerian Pertanian dan Industri Makanan (MAFI) sentiasa berusaha untuk menggalakkan dan membantu penglibatan golongan muda dalam sektor pertanian dan industri agromakanan negara. Penyertaan golongan muda adalah penting untuk mentransformasikan dan memacu sektor pertanian dengan pemodenan, teknologi dan inovasi selaras dengan matlamat MAFI melalui Dasar Agromakanan Negara 2021-2030 (DAN) 2.0.

MAFI mengakui terdapat keperluan untuk meningkatkan penglibatan golongan muda dalam sektor pertanian dan industri agromakanan demi kesinambungan pengeluaran makanan negara bagi tempoh jangka masa yang panjang.

Dalam hal ini, MAFI telah mengenal pasti cabaran-cabaran yang dihadapi berkenaan penglibatan golongan muda dalam sektor pertanian ini antaranya:

1. Persepsi yang kurang baik tentang sektor pertanian, di mana golongan muda menganggap pertanian sebagai suatu sektor yang berintensifkan buruh dengan pulangan yang rendah dan lebih cenderung kepada pekerjaan dalam sektor lain;
2. Fasiliti kewangan yang terhad bagi membantu golongan muda memulakan projek pertanian ditambah dengan kos permulaan yang tinggi;
3. Kebergantungan kepada pekerja asing disebabkan sektor pertanian di Malaysia adalah berintensifkan buruh kerana penggunaan teknologi dan automasi yang rendah; dan
4. Pendapatan tidak menentu menyebabkan golongan muda kurang berminat berada dalam sektor pertanian.

Bagi mengatasi cabaran-cabaran yang ini, melalui DAN 2.0, MAFI telah merangka strategi bagi menarik dan mengekalkan bakat muda dalam sektor pertanian. Strategi yang dirangka ini mempunyai empat (4) pelan tindakan untuk dilaksanakan oleh MAFI dalam tempoh pelaksanaan DAN sehingga 2030 iaitu:

1. Menjenamakan semula sektor sektor agromakanan dengan pertanian moden dan pintar untuk menggalakkan bakat muda dalam sektor agromakanan;
2. Mewujudkan sumber tenaga kerja industri yang optimum melalui pengintegrasian siswazah ke dalam persekitaran pekerjaan yang sebenar menerusi tambahan latihan amali dan perantisan;
3. Meningkatkan pendedahan generasi muda kepada aktiviti pertanian melalui pendidikan bersasar dan kaedah lain seperti pertandingan inovasi; dan

4. Membangunkan model pengurusan untuk menambahbaik produktiviti buruh.

Dari segi bantuan kepada golongan muda, MAFI akan meneruskan usaha membantu mereka melalui Program Agropreneur Muda yang menawarkan bantuan geran dalam bentuk barangan sehingga RM20,000. Bantuan ini pastinya dapat membantu golongan muda mengurangkan kos permulaan projek-projek pertanian dan agromakanan. Di samping itu, MAFI turut menyediakan latihan-latihan teknikal agropreneur dalam semua sub sektor agromakanan bagi membantu mereka meningkatkan kemahiran bagi memastikan projek-projek yang dijalankan berjaya mengeluarkan hasil yang tinggi seterusnya menjana pendapatan.

Melalui pelan tindakan ini, MAFI berharap akan dapat menarik dan mengekalkan golongan muda dalam sektor pertanian serta dapat mempertingkatkan output dan kualiti pengeluaran, seterusnya memacu pertumbuhan ekonomi dan sosial negara melalui sektor pertanian dan agromakanan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN BARU BIAN (SELANGAU)

TARIKH : 3 MAC 2022 (KHAMIS)

SOALAN

TUAN BARU BIAN (SELANGAU) minta **MENTERI TENAGA DAN SUMBER ASLI** menyatakan apakah status penerbitan KETSA '*A Master List of Protected Areas in Malaysia*' pada tahun 2019. Setelah ia dimuat naik di laman sesawang *Malaysia Biodiversity Information System*, kenapa dan bilakah ia dikeluarkan dari laman tersebut. Bagaimanakah pihak awam dapat mengakses penerbitan ini.

JAWAPAN

Tuan Yang di-Pertua,

1. 'A Master List of Protected Areas in Malaysia' (PA Master list) telah diterbitkan pada tahun 2019 dan dimuat naik di laman sesawang *Malaysia Biodiversity Information System* (MyBIS) pada 25 Mac 2020. Walau bagaimanapun, dokumen tersebut telah dikeluarkan daripada pangkalan data MyBIS pada tarikh yang sama berikutan terdapat keperluan untuk mengemas kini data PA Master list supaya selari dengan pelaporan di peringkat antarabangsa melalui *World Database on Protected Areas* (WDPA) di bawah *United Nations Environment Programme* (UNEP) dan *International Union for Conservation of Nature* (IUCN).

2. Data PA Master list tahun 2019 dan 2020 sedang dalam proses verifikasi dan kemas kini oleh Kementerian ini dengan kerjasama pihak pengurusan kawasan perlindungan di negeri-negeri. Data yang telah dikemas kini akan dimuat naik setelah ia dimuktamadkan pada akhir tahun ini dan akan boleh diakses oleh pihak awam menerusi laman sesawang MyBIS dan WDPA.

3. Untuk makluman Ahli Yang Berhormat, data kawasan perlindungan sehingga tahun 2018 boleh diakses melalui laman sesawang Kementerian.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : JAWAB LISAN

DARIPADA : DR. LEE BOON CHYE [GOPENG]

TARIKH : 3 MAC 2022 (KHAMIS)

SOALAN

DR. LEE BOON CHYE [GOPENG] minta **MENTERI PEMBANGUNAN WANITA, KELUARGA DAN MASYARAKAT** menyatakan bilangan kanak-kanak di institusi kebajikan kanak-kanak di Malaysia. Apakah bilangan kanak-kanak di institusi-institusi ini yang belum memperoleh kewarganegaraan Malaysia.

JAWAPAN

Tuan Yang di-Pertua,

Jabatan Kebajikan Masyarakat (JKM) mengendalikan sebanyak **38 buah institusi kanak-kanak di seluruh Malaysia**. Daripada 38 buah ini 14 buah adalah Rumah Kanak-Kanak, sembilan (9) buah adalah Sekolah Tunas Bakti, sembilan (9) buah Asrama Akhlak, empat (4) buah Taman Seri Puteri dan dua (2) buah Rumah Perlindungan Kanak-Kanak ATIP (bagi mangsa perdagangan orang).

Sehingga 31 Disember 2021, **kanak-kanak di 38 buah institusi berkenaan adalah seramai 1,726 orang**. Daripada jumlah tersebut **terdapat seramai 28 orang kanak-kanak yang mempunyai status “warganegara belum ditentukan”**. Untuk makluman, penetapan status taraf kewarganegaraan ini adalah di bawah **bidang kuasa Jabatan Pendaftaran Negara (JPN)** melalui permohonan yang dikemukakan oleh JKJ. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN NIK MOHAMAD ABDUH BIN NIK
ABDUL AZIZ (BACHOK)**

TARIKH : 3 MAC 2022 (KHAMIS)

SOALAN

TUAN NIK MOHAMAD ABDUH BIN NIK ABDUL AZIZ (BACHOK)
minta **MENTERI PERTANIAN DAN INDUSTRI MAKANAN**
menyatakan perancangan jangka pendek dan jangka panjang bagi
mengurangkan kenaikan harga ayam dan telur yang dilihat berpunca
dari kenaikan harga jagung dan soya yang diimport dari luar.

JAWAPAN

Tuan Yang Di Pertua,

Untuk makluman Ahli Yang Berhormat, senario kenaikan harga ayam dan telur di pasaran bermula pada September 2021. Punca kenaikan harga ini antaranya disebabkan oleh harga makanan ternakan iaitu jagung bijirin dan soya *bean meals* (SBM) yang diimport dari luar negara turut melonjak. Jagung bijian yang merupakan komponen utama dalam makanan ayam telah menunjukkan peningkatan harga sebanyak 54% kepada RM1,402.00/tan pada bulan Disember 2021, berbanding RM910/tan pada bulan Januari 2020. Harga SBM juga menunjukkan peningkatan sebanyak 27.7%, meningkat dari RM1,673.50/tan pada Januari 2020 kepada RM2,137/tan pada Disember 2021. Penternak turut menyatakan berlakunya peningkatan kos operasi lain seperti kos logistik, kos pekerja dan kadar tukaran matawang asing.

Sebagai langkah jangka pendek bagi mengurangkan kenaikan harga ayam dan telur dan membantu para penternak mengimbangi kenaikan kos, Kerajaan bersetuju memberi subsidi sebanyak RM0.60/kg bagi ayam bulat dan RM0.05/biji bagi telur gred A, B dan C bermula dari 5 Februari hingga 5 Jun 2022. Ini selaras dengan keputusan Mesyuarat Khas Majlis Tindakan Sara Hidup Negara (NACCOL) pada 31 Januari 2022 dan Mesyuarat Jemaah Menteri pada 9 Februari 2022. Usaha ini dijangka memberi manfaat kepada 2,061 penternak ayam pedaging dan 194 penternak ayam penelur. Rakyat juga dapat menikmati harga ayam bulat lebih rendah iaitu RM8.90/kg dan harga telur antara RM0.39 hingga RM0.43 sebiji mengikut gred. Jumlah keseluruhan subsidi yang ditanggung oleh Kerajaan ialah sebanyak RM528.52 juta.

Kerajaan juga telah mengambil tindakan proaktif dalam mengawal kenaikan harga ayam dan seterusnya mengatasi masalah kekurangan bekalan ayam bulat bagi menjaga kebajikan rakyat. Kerajaan telah memberi kebenaran untuk mengimport ayam sebagaimana yang diumumkan oleh YAB Perdana Menteri pada 1 Disember 2021. Kebenaran pengimportan sehingga 10,000 tan metrik sebulan adalah sebagai langkah intervensi sementara tertakluk kepada syarat-syarat yang ditetapkan. Ini

adalah bagi memenuhi keperluan pasaran tempatan terutamanya menjelang musim perayaan. Bagi langkah jangka panjang pula, MAFI melaksanakan tindakan seperti berikut:

- i. mengurangkan kebergantungan kepada sumber makanan import sebanyak 30%. Inisiatif yang dilaksanakan melalui penanaman jagung bijian secara berfasa dengan keluasan tanaman sehingga 80,000 hektar yang dijangka dapat mengeluarkan sebanyak 1.44 juta metrik tan pada tahun 2032;
- ii. menjalankan aktiviti penyelidikan melalui MARDI bagi menghasilkan bahan mentah gantian yang bersesuaian dalam penghasilan makanan ternakan khususnya untuk rumusan makanan unggas berasaskan isirung sawit, contohnya penghasilan "Purafex" melalui kerjasama antara Malaysian Palm Oil Board (MPOB) dan SIME Darby. Produk ini boleh menggantikan jagung dan soya sehingga 30% dalam formulasi makanan unggas; dan
- iii. menawarkan pinjaman mudah sebanyak RM200 juta kepada penternak melalui Agrobank bagi membantu penternak mengatasi masalah modal pusingan kewangan yang terjejas akibat kenaikan kos pengeluaran.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : YB DATUK SERI MOHD REDZUAN YUSOF
[ALOR GAJAH]**

TARIKH : 03 MAC 2022 (KHAMIS)

SOALAN

DATUK SERI MOHD REDZUAN YUSOF [ALOR GAJAH] minta **MENTERI KEWANGAN** menyatakan secara terperinci langkah pencegahan yang dirancang oleh Kerajaan bagi mengelakkan krisis mata wang daripada berlaku di dalam Malaysia.

JAWAPAN

Tan Sri Yang Di Pertua,

Untuk makluman, kebarangkalian untuk Malaysia menghadapi krisis mata wang adalah sangat kecil. Ini memandangkan kedudukan semasa ekonomi dan sistem kewangan Malaysia adalah jauh lebih kukuh dan berdaya tahan berbanding ketika negara mengalami krisis kewangan Asia pada tahun 1997-1998.

Namun begitu, Kerajaan melalui Bank Negara Malaysia (atau BNM) kekal berwaspada dan akan terus melaksanakan langkah-langkah yang komprehensif dan proaktif bagi mencegah krisis mata wang daripada berlaku di Malaysia. Langkah-langkah ini termasuk:

- **Pertama, memantau kedudukan luaran Malaysia dan memastikan pasaran kewangan domestik yang lebih mendalam.** Pada tahun 2021, Malaysia mempunyai lebihan

akaun semasa dalam imbangan pembayaran sebanyak 3.5% daripada KDNK dan mempunyai pasaran bon tempatan yang besar sebanyak 114.0% daripada KDNK. Ini mengurangkan pergantungan terhadap pembiayaan luaran.

- **Kedua, memelihara kestabilan kewangan domestik dan memastikan risiko terhadap hutang luar negeri kekal terurus melalui pelaksanaan dasar berhemat ke atas kedudukan kewangan Kerajaan, sistem perbankan dan syarikat korporat. Bagi kedudukan kewangan Kerajaan, sebahagian besar hutangnya yang tertunggak iaitu sebanyak 97% adalah di dalam mata wang ringgit dan hanya sebanyak 3.0% adalah dalam mata wang asing pada 2021. Ini bererti risiko terhadap kedudukan kewangan Kerajaan yang disebabkan oleh turun naik kadar pertukaran ringgit adalah sedikit dan terkawal. Manakala bagi sistem perbankan pula, rangka kerja kawal selia berhemat BNM juga telah diperkukuhkan bagi memastikan etika pemberian pinjaman dalam kalangan bank kekal berhemat dan keberhutangan yang berlebihan dapat dihadkan. Perkara ini penting bagi mengekalkan daya tahan institusi kewangan dan menyokong aktiviti pengantaraan kredit. Ujian tekanan makro dan mikro juga dijalankan oleh BNM dan setiap institusi perbankan untuk menilai keupayaan institusi perbankan tempatan mengharungi kejutan mudah tunai dan pembiayaan yang buruk. Hal ini termasuk menilai kecukupan penampunan mudah tunai mata wang asing.**
- Di samping itu, institusi perbankan tempatan mempunyai penampunan aset mudah tunai dalam mata wang asing yang besar sebanyak RM108.8 bilion bagi suku keempat 2021. Nilai ini memperkukuh keupayaan mereka untuk mengurangkan kesan kejutan daripada pengeluaran dana luar secara mendadak dan turut disokong oleh amalan pengurusan risiko institusi perbankan.

- Dan **ketiga, bagi syarikat korporat**, pinjaman luar negeri daripada pihak yang tidak berkaitan dengan mereka dipantau dan tertakluk kepada rangka kerja Pentadbiran Pertukaran Asing (*atau Foreign Exchange Administration, FEA*) oleh BNM. Rangka kerja tersebut, antara lain, bertujuan memastikan hutang luar negara disokong oleh perolehan mata wang asing atau disediakan lindung nilai secukupnya dan pinjaman digunakan untuk membiayai pelaburan yang produktif. Langkah kehematan ini penting bagi memastikan pinjaman luar negeri oleh syarikat korporat adalah mampan dan tidak menimbulkan risiko yang besar kepada ekonomi.

Pada masa yang sama, paras rizab antarabangsa BNM kekal tinggi dan masih menyokong sektor luaran Malaysia. Peranan utama rizab antarabangsa adalah sebagai penampungan mudah tunai yang memastikan pelarasan kadar pertukaran yang teratur, terutamanya semasa tempoh aliran modal yang besar dan tidak menentu. Rizab antarabangsa BNM berjumlah 115.8 bilion dolar US pada 15 Februari 2022. Paras rizab ini memadai untuk membiayai 6.1 bulan import barangan dan perkhidmatan dan 1.2 kali jumlah hutang luar negeri jangka pendek. Selain rizab antarabangsa, BNM juga boleh memperoleh kecairan tambahan melalui pengaturan *swap, dengan izin*, dua hala dengan bank-bank pusat lain. Fasiliti ini dapat mengekalkan pasaran pertukaran asing yang teratur di samping mengurangkan kesan aliran modal yang mendadak.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

DARIPADA : TUAN LOKE SIEW FOOK [SEREMBAN]

TARIKH : 3 MAC 2022 (KHAMIS)

SOALAN

TUAN LOKE SIEW FOOK [SEREMBAN] minta MENTERI PENGANGKUTAN menyatakan sama ada syarikat Integrated Marine Works Sdn Bhd telah diberikan konsesi untuk kerja-kerja "*capital dredging*" di semua pelabuhan persekutuan dan sekiranya ya, mengapa syarikat ini dipilih dan apakah terma-terma konsesi tersebut.

JAWAPAN

1. Untuk makluman Ahli Yang Berhormat, selaras dengan keputusan Mesyuarat Jemaah Menteri pada 07 Julai 2021, Kerajaan telah bersetuju untuk melantik syarikat Integrated Marine Works (IMW) Sdn. Bhd. bagi melaksanakan kerja-kerja pengerukan dan penambakan di pelabuhan-pelabuhan dalam negara.
2. Lantikan tersebut dibuat antara lain kerana IMW dimiliki sepenuhnya oleh syarikat Inai Kiara Sdn. Bhd. yang merupakan 100% pegangan tempatan serta mengambil kira kelebihan dan pencapaian syarikat daripada aspek pematuhan terhadap obligasi di bawah Perjanjian Konsesi terdahulu selama 15 tahun bermula 21 Disember 2004 dan telah berakhir pada 21 Disember 2019.
3. Sepanjang tempoh konsesi terdahulu syarikat, IMW telah berjaya melaksanakan hampir 247 projek pengerukan dengan nilai kontrak keseluruhan mencecah hampir RM2.28 bilion. IMW juga merupakan ahli *World Organisation of Dredging Associates* (WODA) dan *Eastern Dredging Associations* (EADA) serta merupakan satu-satunya syarikat tempatan yang berdaftar di bawah WODA dan EADA di Asia Tenggara.
4. Selain daripada itu, keupayaan aset-aset sedia ada, kelengkapan peralatan dan pengetahuan teknikal yang dimiliki oleh IMW dalam melaksanakan kerja-kerja pengerukan adalah mencukupi berbanding dengan syarikat pengerukan tempatan lain yang masih menggunakan pakai jentera asing untuk melaksanakan kerja-kerja pengerukan.
5. Kapal keruk (*dredger*) yang dimiliki oleh syarikat IMW juga direka mengikut Piawaian Kualiti oleh *Bureau Veritas and Ship Classification Malaysia*. Kapal Inai Kenanga yang merupakan *dredger* ketiga terbesar di dunia dan terbesar di Asia dibina sendiri oleh IMW di dalam negara.
6. Dalam hubungan ini, Kementerian Pengangkutan masih dalam proses memperhalusi dan menambah baik terma-terma utama perjanjian konsesi bagi memastikan kepentingan Kerajaan dan pengoperasian kesemua pelabuhan persekutuan terus terpelihara.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

DARIPADA : DATO' SERI TIONG KING SING [BINTULU]

TARIKH : 3 MAC 2022 (KHAMIS)

SOALAN

DATO' SERI TIONG KING SING [BINTULU] minta **MENTERI KOMUNIKASI DAN MULTIMEDIA** menyatakan:

- (a) apakah usaha Kementerian untuk menambah baik sistem rangkaian internet di kawasan Kuala Serupai yang terletak di Jalan Kuala-Tatau ke Balingian yang telah lama belum di naik taraf perkhidmatan multimedia; dan
- (b) apakah usaha Kementerian untuk memastikan kawasan luar bandar terutamanya Bintulu untuk menerima sistem telekomunikasi yang stabil untuk membuat panggilan telefon.

JAWAPAN

Tuan Yang Dipertua,

Terdapat sebuah menara di Kuala Serupai yang sedang dinaiktaraf kepada perkhidmatan 4G termasuk kerja-kerja penyambungan bekalan elektrik daripada pihak Syarikat SESCO Sdn. Bhd. yang dijangka siap pada bulan Jun 2022.

Antara inisiatif untuk menambah baik infrastruktur digital di Sarawak, dan Parlimen Bintulu melalui Pelan Jalinan Digital Negara (JENDELA) di bawah Fasa 1 setakat 31 Januari 2022 adalah seperti berikut:

| Inisiatif | Tapak Menara Baharu | | Naik Taraf Stesen Pemancar | | Premis Tersedia Gentian Optik | | Jalur Lebar Satelit | |
|-----------|---------------------|------|----------------------------|-------|-------------------------------|--------|---------------------|-------------|
| | Perancangan | Siap | Perancangan | Siap | Perancangan | Siap | Siap | Pelaksanaan |
| Sarawak | 836 | 83 | 3,213 | 2,576 | 117,296 | 76,800 | 408 | 115 |
| Bintulu | 47 | 14 | 344 | 294 | 8,482 | 7,498 | 10 | - |

Peratusan liputan 4G di kawasan berpenduduk di Sarawak telah meningkat kepada 82.86% pada suku keempat 2021 berbanding 73.67% sebelum pelaksanaan JENDELA pada suku kedua 2020. Manakala di Parlimen Bintulu pula, peratusan liputan jalur lebar 4G telah meningkat kepada 85.29% pada suku keempat 2021 berbanding 72.34% sebelum pelaksanaan JENDELA. Selain itu, usaha penambahbaikan rangkaian akan diteruskan untuk memberikan kualiti pengalaman yang lebih baik kepada pengguna.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : JAWAB LISAN

**DARIPADA : YB PUAN ALICE LAU KIONG YIENG
[LANANG]**

TARIKH : 3 MAC 2022 (KHAMIS)

SOALAN

PUAN ALICE LAU KIONG YIENG [LANANG] minta **MENTERI PEMBANGUNAN WANITA, KELUARGA DAN MASYARAKAT** menyatakan jumlah permohonan bantuan Jabatan Kebajikan Masyarakat (JKM) yang belum selesai di Sibu dan juga di seluruh Sarawak dan apakah tempoh masa yang diperlukan untuk menyelesaikan setiap permohonan serta tempoh masa untuk memproses setiap kad OKU di Sarawak.

JAWAPAN

Tuan Yang di-Pertua,

Kementerian Pembangunan Wanita, Keluarga dan Masyarakat melalui Jabatan Kebajikan Masyarakat pada tahun 2021 telah menyalurkan peruntukan **sebanyak RM 2.4 bilion** yang telah memberi manfaat kepada **519,409 penerima bantuan di seluruh negara**. Manakala penerima bantuan **di negeri Sarawak adalah seramai 50,885 penerima dengan peruntukan yang telah disalurkan adalah sebanyak RM 233.4 Juta**.

Konsep pemberian bantuan kebajikan adalah berdasarkan **kelayakan dan siasatan akan dilaksanakan bagi setiap permohonan yang lengkap**. Setiap permohonan **akan disiasat dalam tempoh 14 hari** dari tarikh permohonan diterima. **Kelulusan pula akan diberikan dalam tempoh 1 bulan dari tarikh permohonan diterima**.

Berdasarkan statistik jabatan pada **Tahun 2021** terdapat **6,933 permohonan bantuan yang diterima** dan telah diproses oleh JKMN Sarawak. Berdasarkan hasil siasatan terdapat **3,718 permohonan yang telah diluluskan dan 3,215 permohonan yang telah ditolak** kerana tidak menepati kriteria dan syarat yang telah ditetapkan. Semua permohonan yang lengkap telah diproses dan tiada permohonan tertunggak bagi tahun 2021.

Bagi Parlimen Sibu, terdapat **598 permohonan bantuan telah diproses dan sebanyak 284 permohonan diluluskan dan 314 permohonan telah ditolak** kerana tidak menepati kriteria dan syarat yang telah ditetapkan.

Tuan Yang di-Pertua,

Prosedur Pengendalian Permohonan Pendaftaran OKU, kad OKU akan diproses dan diluluskan dalam tempoh **14 hari bekerja** dari tarikh permohonan lengkap diterima. Prosedur dan tempoh kelulusan ini meliputi seluruh Malaysia termasuk Sarawak.

Dalam usaha menggalakkan lebih ramai OKU berdaftar, Kementerian Pembangunan Wanita, Keluarga dan Masyarakat (KPWKM) melalui Jabatan Kebajikan Masyarakat (JKM) telah membangunkan **Modul Permohonan Pendaftaran OKU Secara Dalam Talian** yang dikenali sebagai **MyDaftar OKU** dan mula dilaksanakan mulai 01 November 2021. Tujuan MyDaftar OKU adalah untuk meningkatkan kualiti penyampaian perkhidmatan kepada OKU dalam urusan pendaftaran.

MyDaftar OKU merupakan inisiatif Kementerian dalam meningkatkan pendaftaran OKU di Malaysia. Ini selari dengan Teras Strategik 8 Pelan Tindakan OKU 2016-2022 yang menggariskan tentang keperluan mewujudkan pangkalan data OKU dan sistem maklumat yang komprehensif.

Menerusi MyDaftar OKU, Kad OKU Digital dalam bentuk Kod QR akan diterima oleh pemohon dalam **tempoh 24 jam selepas permohonan diluluskan. Sehingga 09 Februari 2022 sebanyak 15,503 permohonan pendaftaran OKU telah diluluskan dan dikeluarkan Kad OKU digital dalam bentuk Kod QR.**

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' SERI HAJI IDRIS BIN JUSOH
[BESUT]**

TARIKH : 03 MAC 2022 (KHAMIS)

SOALAN

DATO' SERI HAJI IDRIS BIN JUSOH [BESUT] minta **MENTERI KEWANGAN** menyatakan pencapaian semasa penggunaan e-dompet atau *e-wallet* yang diperkenalkan sejak tahun 2018 bagi menggantikan kad fizikal dan tunai ketika menjalani aktiviti jual beli.

JAWAPAN

Tan Sri Yang Di Pertua,

Penggunaan e-wang berasaskan rangkaian atau juga dikenali sebagai *e-wallet* atau e-dompet kini semakin popular dalam kalangan pengguna.

- Penggunaan e-dompet telah mencatatkan peningkatan memberangsangkan sebanyak 179% kepada 1.1 bilion transaksi pada tahun 2021 daripada hanya 53 juta transaksi pada tahun 2018 (berdasarkan kaedah pengiraan *Compounded Annual Growth Rate (CAGR)* atau Kadar Pertumbuhan Purata).
- Bilangan pengguna aktif juga telah meningkat sebanyak 77% kepada 13.5 juta pada tahun 2021 daripada 8.7 juta pengguna pada tahun 2018.

Penggunaan e-dompet yang kian meningkat didorong oleh kesedaran pengguna, ciri-ciri mesra pengguna dan ketersediaan e-dompet yang meluas. Pandemik COVID-19 juga telah menjadi pemangkin peralihan yang ketara kepada penggunaan e-dompet bagi menggantikan tunai ketika menjalani aktiviti jual beli.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : DATO' JOHARI BIN ABDUL (SUNGAI PETANI)

TARIKH : 3 MAC 2022 (KHAMIS)

SOALAN

DATO' JOHARI BIN ABDUL (SUNGAI PETANI) minta **MENTERI TENAGA DAN SUMBER ASLI** menyatakan banjir yang melanda negara setiap tahun antara puncanya ialah tindakan pembalakan yang tidak terkawal. Apakah tindakan Kerajaan bagi memastikan Kerajaan Negeri mematuhi semua syarat-syarat yang dikenakan sebelum pembalakan dimulakan.

JAWAPAN

Tuan Yang di-Pertua,

1. Untuk makluman Ahli Yang Berhormat, aktiviti pembalakan di negara ini melibatkan kawasan Hutan Simpanan Kekal (HSK) yang dikelaskan sebagai Hutan Pengeluaran, Tanah Kerajaan dan Tanah Bermilik. Pembalakan Hutan Pengeluaran dilaksanakan secara terkawal melalui Catuan Tebangan Tahunan (CTT) berdasarkan prinsip Pengurusan Hutan Secara Berkekalan (*Sustainable Forest Management* – SFM) menerusi Sistem Pengurusan Memilih (*Selective Management System* - SMS).
2. CTT bertujuan mengimbangi jumlah pengeluaran kayu dengan keupayaan dan keluasan sesuatu kawasan Hutan Pengeluaran dalam HSK. Kadar CTT diputuskan dalam Majlis Tanah Negara (MTN) pada setiap tempoh Rancangan Malaysia Lima Tahun. Penetapan CTT adalah berasaskan kepada keupayaan pemulihan semula jadi (*natural regeneration capacity*) kawasan yang diusaha hasil. Setiap Kerajaan Negeri perlu mematuhi kadar CTT yang telah ditetapkan dan pematuhan terhadap CTT dilaporkan dalam mesyuarat MTN.
3. Bagi tujuan pelesenan pembalakan di hutan Tanah Kerajaan dan Tanah Bermilik, ianya tertakluk kepada pematuhan Akta Kualiti Alam Sekeliling 1974 [*Akta 127*] dan Perintah Kualiti Alam Sekeliling [Aktiviti Yang Ditetapkan Penilaian Impak Alam Sekitar (EIA) 2015] yang ditetapkan oleh Jabatan Alam Sekitar (JAS) di bawah Kementerian Alam Sekitar dan Air (KASA). Jabatan-jabatan Perhutanan Negeri akan mengeluarkan lesen pembalakan selepas laporan EIA diluluskan oleh JAS.
4. Selain itu, bagi memastikan aktiviti pembalakan dilaksanakan secara teratur, pelesen perlu menyediakan Rancangan Mengusahasil Hutan (RMH) sebelum lesen dikeluarkan. Jabatan Perhutanan Semenanjung Malaysia (JPSM) juga telah mengeluarkan Pekeliling Ketua Pengarah Perhutanan Semenanjung Malaysia pada tahun 2016 iaitu 'Panduan Amalan Baik Hutan (*Good Forest Practices*) untuk Pengusahasilan Kayu Kayan Tanah Kerajaan' sebagai rujukan utama Jabatan-jabatan Perhutanan Negeri.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : DATO' JOHARI BIN ABDUL (SUNGAI PETANI)

TARIKH : 3 MAC 2022 (KHAMIS)

SOALAN

DATO' JOHARI BIN ABDUL (SUNGAI PETANI) minta **MENTERI TENAGA DAN SUMBER ASLI** menyatakan banjir yang melanda negara setiap tahun antara puncanya ialah tindakan pembalakan yang tidak terkawal. Apakah tindakan Kerajaan bagi memastikan Kerajaan Negeri mematuhi semua syarat-syarat yang dikenakan sebelum pembalakan dimulakan.

JAWAPAN

Tuan Yang di-Pertua,

1. Untuk makluman Ahli Yang Berhormat, aktiviti pembalakan di negara ini melibatkan kawasan Hutan Simpanan Kekal (HSK) yang dikelaskan sebagai Hutan Pengeluaran, Tanah Kerajaan dan Tanah Bermilik. Pembalakan Hutan Pengeluaran dilaksanakan secara terkawal melalui Catuan Tebangan Tahunan (CTT) berdasarkan prinsip Pengurusan Hutan Secara Berkekalan (*Sustainable Forest Management* – SFM) menerusi Sistem Pengurusan Memilih (*Selective Management System* - SMS).
2. CTT bertujuan mengimbangi jumlah pengeluaran kayu dengan keupayaan dan keluasan sesuatu kawasan Hutan Pengeluaran dalam HSK. Kadar CTT diputuskan dalam Majlis Tanah Negara (MTN) pada setiap tempoh Rancangan Malaysia Lima Tahun. Penetapan CTT adalah berasaskan kepada keupayaan pemulihan semula jadi (*natural regeneration capacity*) kawasan yang diusaha hasil. Setiap Kerajaan Negeri perlu mematuhi kadar CTT yang telah ditetapkan dan pematuhan terhadap CTT dilaporkan dalam mesyuarat MTN.
3. Bagi tujuan pelesenan pembalakan di hutan Tanah Kerajaan dan Tanah Bermilik, ianya tertakluk kepada pematuhan Akta Kualiti Alam Sekeliling 1974 [*Akta 127*] dan Perintah Kualiti Alam Sekeliling [Aktiviti Yang Ditetapkan Penilaian Impak Alam Sekitar (EIA) 2015] yang ditetapkan oleh Jabatan Alam Sekitar (JAS) di bawah Kementerian Alam Sekitar dan Air (KASA). Jabatan-jabatan Perhutanan Negeri akan mengeluarkan lesen pembalakan selepas laporan EIA diluluskan oleh JAS.
4. Selain itu, bagi memastikan aktiviti pembalakan dilaksanakan secara teratur, pelesen perlu menyediakan Rancangan Mengusahakan Hutan (RMH) sebelum lesen dikeluarkan. Jabatan Perhutanan Semenanjung Malaysia (JPSM) juga telah mengeluarkan Pekeliling Ketua Pengarah Perhutanan Semenanjung Malaysia pada tahun 2016 iaitu 'Panduan Amalan Baik Hutan (*Good Forest Practices*) untuk Pengusahakan Kayu Kayan Tanah Kerajaan' sebagai rujukan utama Jabatan-jabatan Perhutanan Negeri.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS 2022**

PERTANYAAN : LISAN

DARIPADA : DATO' JOHARI BIN ABDUL [SUNGAI PETANI]

TARIKH : 3 MAC 2022 (KHAMIS)

SOALAN

DATO' JOHARI BIN ABDUL [SUNGAI PETANI] minta **MENTERI KANAN PENDIDIKAN** menyatakan pakar-pakar ekonomi dunia meramalkan China akan menjadi kuasa ekonomi dunia dalam masa yang terdekat. Adakah Kementerian mempunyai perancangan memasukkan matapelajaran Bahasa Mandarin sebagai persiapan agar anak-anak Malaysia bersedia dengan kebolehan ini dan tidak tertinggal apabila Bahasa Mandarin diperlukan.

JAWAPAN

Tuan Yang di-Pertua,

Kementerian Pendidikan Malaysia telah memperkenalkan mata pelajaran Bahasa Cina Sekolah Kebangsaan (BCSK) mulai tahun 2007. Pelaksanaan BCSK terbuka kepada semua murid sekolah kebangsaan (SK) sebagai bahasa tambahan. Pada peringkat menengah, Bahasa Cina Komunikasi (BCK) dilaksanakan di sekolah menengah kebangsaan (SMK), sekolah berasrama penuh (SBP) dan sekolah menengah kebangsaan agama (SMKA). Sehingga kini, terdapat 477 buah SK yang menawarkan BCSK, manakala BCK ditawarkan di 122 sekolah menengah. Di samping BCSK dan BCK, mata pelajaran Bahasa Mandarin (BM) turut ditawarkan di 77 buah kolej vokasional. Pelaksanaan BCSK, BCK dan BM ini selaras dengan aspirasi di dalam Pelan Pembangunan Pendidikan Malaysia 2013-2025 yang menggalakkan semua murid untuk mempelajari bahasa lain sebagai bahasa tambahan. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

DARIPADA : TUAN NOOR AMIN BIN AHMAD (KANGAR)

TARIKH : 3 MAC 2022 (KHAMIS)

SOALAN

TUAN NOOR AMIN BIN AHMAD (KANGAR) minta **MENTERI PERTANIAN DAN INDUSTRI MAKANAN** menyatakan pecahan jenis subsidi dan bantuan sosial yang diberikan di bawah Kementerian dari tahun ke tahun sejak tahun 2013. Apakah sebab pemberian ini dan apakah rancangan Kementerian untuk mengurangkan pergantungan penerima subsidi dan bantuan sosial ini bagi tempoh jangka sederhana dan panjang.

JAWAPAN

Tuan Yang DiPertua,

Kementerian Pertanian dan Industri Makanan (MAFI) peka dengan pembangunan industri dan keadaan yang dihadapi oleh golongan sasar. Pemberian subsidi dan bantuan sosial bertujuan untuk menggalakkan perkembangan pengeluaran hasil ladang dan meningkatkan kesejahteraan golongan petani, penternak dan nelayan.

Antara bantuan subsidi yang diberikan oleh MAFI adalah bagi industri padi dan beras serta nelayan. Subsidi yang ditawarkan adalah seperti berikut:

1. Subsidi sektor industri padi dan beras

Kerajaan telah memperkenalkan lima (5) program bantuan subsidi dan insentif kepada industri padi dan beras negara bagi memastikan kelangsungan pengeluaran padi dan beras negara di samping mampu menampung keperluan pasaran domestik dan menjanakan pendapatan pesawah. Empat program bantuan subsidi bagi input pertanian adalah:

- i. Skim Baja Padi Kerajaan Persekutuan (SBPKP);
- ii. Skim Insentif Pengeluaran Padi (SIPP);
- iii. Skim Baja dan Racun Padi Bukit / Huma (SBRPB); dan
- iv. Skim Insentif Benih Padi Sah (IBPS).

Peruntukan berjumlah RM 9.396 billion telah diperuntukkan bagi pelaksanaan skim ini bermula dari 2013.

Selain daripada itu, MAFI juga menampung subsidi output pertanian melalui penjualan hasil penanaman melalui Skim Subsidi Harga Padi (SSHP). Jumlah pemberian subsidi dinaikkan daripada RM300 kepada RM360 bagi setiap 1 tan metrik padi bersih bermula Januari 2019. Ianya bermatlamat untuk menggalakkan peningkatan produktiviti pengeluaran padi dalam kalangan pesawah. Jumlah peruntukan bagi pelaksanaan skim ini dari tahun 2013 adalah berjumlah RM 4.906 billion.

2. Subsidi Petrol dan Diesel

Program ini dilaksanakan bagi menampung sebahagian dari kos operasi penangkapan ikan nelayan akibat dari kenaikan harga bahan api di pasaran bagi menggalakkan nelayan untuk keluar menangkap ikan bagi didaratkan dalam negara. Daripada tahun 2013 sehingga 2021, peruntukan berjumlah RM576,005,722.34 dan RM4,393,354,107.00 telah diperuntukkan masing-masing bagi subsidi petrol dan diesel.

3. Subsidi Industri Ayam-Telur (JPSIA-T)

Pada tahun 2022, MAFI akan melaksanakan pemberian subsidi ini yang bertujuan untuk meringankan beban kewangan ditanggung pengusaha ayam yang berdepan kos amat tinggi terutama pembelian makanan untuk ayam ditenak dengan peruntukan berjumlah RM528.52 juta. Pemberian subsidi melibatkan insentif sebanyak 60 sen sekilogram bagi ayam daging dan lima sen bagi setiap biji telur untuk semua jenis gred iaitu A, B dan C.

Bantuan sosial yang ditawarkan oleh MAFI pula adalah seperti berikut:

4. Elaun Sara Hidup Nelayan (ESHN)

Program ini bertujuan untuk meringankan beban nelayan dalam menghadapi tekanan ekonomi disebabkan kenaikan kos sara hidup dan secara tidak langsung meningkatkan pendapatan nelayan secara bulanan. Bermula tahun 2021 bayaran ESHN dinaikkan pada kadar RM300 sebulan bagi pemilik vesel zon A dan pekerja zon A, B, C dan C2 berbanding RM250 pada tahun 2020. Jumlah yang telah diperuntukkan bagi ESHN daripada tahun 2013 adalah berjumlah RM4,509,257,660.34.

Manakala untuk Elaun Sara Hidup Nelayan Darat (ESHND) sebanyak RM 67,403,800.00 telah disalurkan kepada nelayan darat mulai tahun 2015 hingga 2021. Bermula tahun 2021, ESHND dibayar pada kadar RM250 sebulan, iaitu kenaikan daripada RM200 sebulan, kepada 3,500 nelayan darat.

5. Perumahan Nelayan

Projek Khas Perumahan Nelayan (PKPN) merupakan bantuan yang diberikan kepada nelayan yang berpendapatan rendah untuk membaikpulih rumah dan membina rumah baharu. Projek ini juga akan membangunkan penempatan semula nelayan untuk memberi kesejahteraan kepada keluarga nelayan agar dapat menikmati kualiti hidup yang lebih baik dan selesa.

Tiga (3) komponen utama Projek Khas Perumahan Nelayan adalah seperti berikut:

- i. Baik Pulih Rumah Nelayan;
- ii. Bina Baharu Rumah Nelayan; dan
- iii. Penempatan Semula Rumah Nelayan (PSN).

Peruntukan pelaksanaan projek ini daripada tahun 2013 adalah berjumlah RM 421,213,738.93.

Dalam usaha untuk mengurangkan pergantungan penerima subsidi dan bantuan sosial ini, MAFI telah melaksanakan tapisan dan pemutihan secara berterusan serta rasionalisasi kelayakan penerima secara bersasar (*soft landing*). MAFI akan berunding dengan Kementerian Kewangan (MOF) berkenaan pelaksanaan pendekatan peralihan yang menggalakkan pesawah untuk meningkatkan produktiviti pengeluaran, di samping mewujudkan '*self regulated industry*' secara beransur-ansur serta pengurangan penglibatan dan pemantauan Kerajaan di sepanjang rangkaian pengeluaran padi.

Penarikan bantuan subsidi dan insentif input pertanian secara drastik adalah tidak disyorkan pada masa ini kerana ianya akan menjejaskan pendapatan secara langsung. Subsidi dan insentif bagi input dan output masih diperlukan untuk memastikan pulangan lestari kepada pesawah. MAFI akan menilai dan meneliti semula jumlah subsidi dan bantuan yang ditawarkan selaras dengan keupayaan kewangan semasa Kerajaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : JAWAB LISAN

**DARIPADA : YB DATUK DR. HASAN BIN BAHROM
[TAMPIN]**

TARIKH : 3 MAC 2022 (KHAMIS)

SOALAN

DATUK DR. HASAN BIN BAHROM [TAMPIN] minta **MENTERI PEMBANGUNAN WANITA, KELUARGA DAN MASYARAKAT** menyatakan perkara berkaitan Pewartaan Pusat Pemindahan Sementara (PPS) mangsa bencana bagaimana ia dipilih dan mengapa tidak ditempatkan pada kemudahan yang lengkap seperti di Pusat Latihan atau sekolah yang mempunyai asrama.

JAWAPAN

Tuan Yang di-Pertua,

Proses pemilihan sesuatu premis dijadikan Pusat Pemindahan Sementara (PPS) dikenal pasti dengan lebih awal bagi memudahkan urusan pemindahan dan agar masyarakat mengetahui lebih awal di mana PPS yang perlu diduduki. Sekiranya bangunan-bangunan yang telah dikenal pasti itu adalah **milik persendirian atau di bawah tanggungjawab agensi lain, maka kebenaran terlebih dahulu perlu diperolehi**. Kriteria dan panduan bagi pemilihan pusat pemindahan adalah seperti berikut :

- i) **Bangunan mempunyai ruang mencukupi dan selamat digunakan;**
- ii) **Mempunyai kemudahan dan keperluan asas seperti bekalan elektrik dan sebagainya;**
- iii) **Lokasi / kedudukannya selamat dari dilanda bencana dan tidak terputus hubungan; dan**
- iv) **Terletak berhampiran komuniti di mana bencana itu berlaku.**

Semua Pusat Pemindahan Sementara (PPS) perlu **mendapat kelulusan daripada Pengerusi Jawatankuasa Pengurusan Bencana Daerah (JPBD) atau Pegawai Daerah** dan hanya pusat berkenaan sahaja akan dibekalkan dengan keperluan asas dan bekalan makanan.

Kementerian Pembangunan Wanita, Keluarga dan Masyarakat melalui Jabatan Kebajikan Masyarakat mengalu-alukan cadangan bagi menjadikan Sekolah Berasrama, Institusi Pengajian Tinggi (IPT), Kolej Komuniti dan Politeknik yang mempunyai kemudahan kolej / asrama untuk dijadikan PPS.. **Satu perbincangan khas bersama Kementerian Pelajaran Malaysia, Kementerian Pengajian Tinggi dan pihak-pihak lain berkaitan perkara ini telah diatitkan pada 3 Mac 2022.**

Sekian, terima kasih.

**PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : YB TUAN AKMAL NASRULLAH BIN
MOHD NASIR (JOHOR BAHRU)**

TARIKH : 4 MAC 2022 (JUMAAT)

SOALAN

YB TUAN AKMAL NASRULLAH BIN MOHD NASIR (JOHOR BAHRU) minta **MENTERI PENGAJIAN TINGGI** menyatakan garis masa pelaksanaan hasil sumbang saran beberapa libat urus berkaitan penambahbaikan Akta Universiti dan Kolej Universiti (AUKU) 1971 yang dijalankan oleh Kementerian.

JAWAPAN

Tan Sri Yang di-Pertua,

Akta Universiti dan Kolej Universiti 1971 [Akta 30] atau lebih dikenali dengan AUKU, merupakan suatu akta untuk membuat peruntukan bagi menubuh, menyelenggara dan mentadbir Universiti dan Kolej Universiti serta perkara-perkara lain yang berkaitan dengannya. Selain daripada perkara berkaitan tadbir urus universiti, AUKU turut merangkumi hal berkaitan aktiviti pelajar, persatuan, pertubuhan, badan atau kumpulan pelajar.

Dalam perkara ini, Kementerian sentiasa prihatin dan responsif ke atas aspirasi pelbagai pihak yang inginkan supaya AUKU ditambah baik dari semasa ke semasa. Atas dasar ini, AUKU telah mengalami proses pindaan sebanyak tujuh (7) kali sejak diwartakan pada tahun 1971 hingga pindaan terakhir pada tahun 2019 yang memansuhkan Seksyen 15(2)(c)

AUKU bagi memberikan lebih ruang dan kebebasan kepada pelajar untuk bersuara dan berpolitik di dalam kampus.

Sesi libat urus yang berkaitan dengan penambahbaikan AUKU 1971 merupakan langkah penting dalam usaha memperkasakan AUKU khususnya dalam mendapatkan pandangan dan cadangan daripada pihak berkepentingan. Sepanjang sesi libat urus yang telah diadakan dengan pihak-pihak yang berkepentingan, tiga (3) isu utama telah dibangkitkan, iaitu melibatkan aktiviti pelajar, tadbir urus universiti dan kebebasan akademik berkaitan dengan kakitangan akademik di universiti awam.

Susulan daripada itu, beberapa cadangan dan sumbang saran telah dikemukakan kepada Kementerian khususnya dari aspek pengurusan universiti oleh Majlis Presiden Persatuan Akademik (MPPK) dan aspek hal ehwal pengurusan pelajar oleh Majlis Perundingan Pelajar Kebangsaan (MPPK).

Kementerian memandang serius permohonan cadangan penambahbaikan ini dan telah mengemukakan cadangan tersebut kepada semua universiti awam bagi mendapatkan maklum balas dalam mengenal pasti mekanisme terbaik memperkasakan dan menghak upaya pelajar. Hasil maklum balas tersebut telah dikemukakan kepada wakil pelajar universiti awam dalam satu sesi libat urus pada 1 Mac 2022 untuk mendapatkan persetujuan bersama bagi pelaksanaan cadangan penambahbaikan tersebut sebelum dibentangkan di peringkat pengurusan tertinggi Kementerian untuk persetujuan dasar.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

DARIPADA : DATUK ROZMAN BIN ISLI (LABUAN)

TARIKH : 3 MAC 2022 (KHAMIS)

SOALAN

DATUK ROZMAN BIN ISLI (LABUAN) minta **MENTERI PERTANIAN DAN INDUSTRI MAKANAN** menyatakan status terkini projek penempatan semula rumah nelayan di Labuan serta jumlah dan jenis bantuan yang diberikan kepada nelayan di sini sejak COVID-19 melanda.

JAWAPAN

Tuan Yang Di Pertua,

Untuk makluman Ahli Yang Berhormat, seramai 25,162 orang nelayan seluruh negara telah menerima manfaat daripada program Projek Khas Perumahan Nelayan (PKPN) bermula tahun 2012 sehingga kini. Daripada jumlah tersebut, seramai 23,162 orang nelayan menerima bantuan baik pulih rumah, 255 orang nelayan menerima bantuan bina rumah baharu dan 1,772 orang nelayan menerima bantuan penempatan semula.

Sebanyak RM16 juta telah diperuntukkan untuk projek Penempatan Semula Nelayan (PSN) di Wilayah Persekutuan Labuan yang akan memberi manfaat kepada 100 orang nelayan. Status terkini PSN di Labuan adalah di peringkat akhir iaitu proses pemurnian perjanjian *Memorandum of Understanding* di antara Perbadanan Labuan dan Lembaga Kemajuan Ikan Malaysia (LKIM).

Bagi meringankan beban golongan nelayan semasa pandemik COVID-19, MAFI telah menyalurkan bantuan-bantuan seperti berikut:

- i. Skim Subsidi Petrol dan Diesel;
- ii. Program Elaun Sara Hidup Nelayan (ESHN);
- iii. Bantuan Bekalan Makanan;
- iv. Program Pembangunan Pelan Peningkatan Pendapatan Golongan B40: Nelayan Melalui Projek Tanaman Kontan; dan
- v. Skim Perlindungan Nelayan dan Bantuan Tabung Bencana Alam Nelayan Dan Kebajikan Nelayan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN LIM KIT SIANG
[ISKANDAR PUTERI]**

TARIKH : 03 MAC 2022 (KHAMIS)

SOALAN

TUAN LIM KIT SIANG [ISKANDAR PUTERI] minta **MENTERI KEWANGAN** menyatakan senarai pengurusan tertinggi Unit Pelaksanaan dan Koordinasi Stimulus Ekonomi Antara Agensi Nasional berserta gaji dan elaun bulanan setiap pengurusan tertinggi dan jumlah staf dan emolumen sejak penubuhan LAKSANA.

JAWAPAN

Tan Sri Yang Di Pertua,

Unit Pelaksanaan dan Koordinasi Stimulus Ekonomi Antara Agensi Nasional atau dikenali dengan nama Unit LAKSANA telah ditubuhkan di Kementerian Kewangan melalui Waran Perjawatan Bilangan 99 Tahun 2020 berkuatkuasa mulai 12 Ogos 2020. Terdapat 12 perjawatan di Unit LAKSANA dengan diterajui oleh Pengarah Gred Utama C (Terbuka). Untuk makluman, jumlah emolumen bulanan bagi jawatan Pengarah Gred Utama C (Terbuka) adalah RM14,134.00 dan elaun bulanan sebanyak RM6,966.67.

Pada masa ini, terdapat tujuh (7) pengisian perjawatan di Unit LAKSANA dengan jumlah emolumen adalah sebanyak RM 36,967.03 sebulan [tidak termasuk emolumen Pengarah Gred Utama C (Terbuka)]. Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK SERI HAJI SALAHUDDIN BIN AYUB
(PULAI)**

TARIKH : 3 MAC 2022 (KHAMIS)

SOALAN

DATUK SERI HAJI SALAHUDDIN BIN AYUB (PULAI) minta **MENTERI TENAGA DAN SUMBER ASLI** menyatakan apakah indikator yang diambil kira oleh Jabatan Perhutanan negeri mengenai ketetapan keluasan hektar bagi kegiatan perhutanan atau pembalakan yang dibenarkan melalui Catuan Tebangan Tahunan (CTT).

JAWAPAN

Tuan Yang di-Pertua,

1. Amalan pengurusan hutan Malaysia adalah berpandukan kepada Dasar Perhutanan Malaysia yang bermatlamat untuk memelihara dan mengurus hutan negara berdasarkan amalan Pengurusan Hutan Secara Berkekalan (*Sustainable Forest Management* – SFM). Salah satu kriteria utama dalam SFM ialah pengawalan terhadap pembukaan kawasan hutan untuk pengusaha hasilan melalui pelaksanaan Catuan Tebangan Tahunan (CTT).
2. CTT berfungsi untuk mengimbangi jumlah pengeluaran kayu dengan keupayaan dan keluasan kawasan hutan pengeluaran dalam hutan simpanan kekal (HSK), yang diputuskan dalam Majlis Tanah Negara (MTN) pada setiap tempoh Rancangan Malaysia Lima Tahun. Penetapan kadar CTT adalah berasaskan kepada keupayaan pemulihan semula jadi (*natural regeneration capacity*) kawasan yang diusahakan hasil. Kaedah pengiraan CTT dibuat dengan mengambil kira luas kawasan pengeluaran bersih (*nett production area*) dan juga jumlah pertambahan isipadu bersih (*nett volume increment*) bagi kawasan berhutan. Pematuhan terhadap CTT yang ditetapkan dapat memastikan kawasan yang telah diusahakan ini terpulih untuk diusahakan semula dalam tempoh 25 hingga 55 tahun selepas pengusaha hasilan.
3. Bagi tempoh RMKe-12 (tahun 2021 hingga tahun 2025), Mesyuarat MTN Ke-77 yang bersidang pada 8 September 2020 telah menetapkan CTT bagi Semenanjung Malaysia seluas 37,710 hektar setahun, Sabah seluas 50,000 hektar setahun dan Sarawak seluas 145,000 hektar setahun.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : DATUK SERI DR. MUJAHID BIN YUSOF
TARIKH : RAWA (PARIT BUNTAR)
3 MAC 2022 (KHAMIS)

SOALAN

DATUK SERI DR. MUJAHID BIN YUSOF RAWA (PARIT BUNTAR)
minta MENTERI PERTANIAN DAN INDUSTRI MAKANAN
menyatakan apakah usaha Kementerian untuk mengurangkan beban peningkatan kos petani di daerah Kerian akibat kenaikan harga racun dan baja.

JAWAPAN

Tuan Yang Di Pertua,

Untuk makluman Ahli Yang Berhormat, Kementerian Pertanian dan Industri Makanan (MAFI) prihatin terhadap isu kenaikan kos input pertanian seperti harga racun dan baja. Kesan kenaikan harga ini bukan sahaja dirasakan oleh petani di Daerah Kerian tetapi di seluruh negara yang mengusahakan tanaman seperti padi, sayur-sayuran dan buah-buahan. Secara umumnya, bagi mengurangkan beban peningkatan kos petani, Kerajaan telah memberikan pelbagai bantuan berbentuk subsidi input pertanian dengan jumlah sekitar RM1 bilion saban tahun. Bagi industri padi negara sahaja, subsidi yang diberikan merangkumi hampir 60% daripada kos pengeluaran padi sehektar dan bakinya ditanggung oleh para pesawah sendiri.

Antara program-program bantuan subsidi input pertanian adalah seperti Skim Baja Padi Kerajaan Persekutuan (SBPKP) dalam bentuk baja urea dan baja sebatian, Skim Insentif Pengeluaran Padi (SIPP) dalam bentuk bantuan baja NPK tambahan, bajak, racun makhluk perosak dan pengapuran, Insentif Benih Padi Sah (IBPS), dan Skim Baja dan Racun Padi Bukit (SBRPB) di mana baja dan racun yang diberikan adalah khusus untuk penanaman padi bukit di Sabah dan Sarawak.

Malah, Kerajaan juga telah menambah peruntukan sebanyak RM62 juta bagi menaikkan kadar bantuan bersubsidi racun makhluk perosak di bawah program SIPP daripada RM200/hektar per musim kepada RM300/hektar per musim untuk tahun ini. Kadar ini akan dapat menampung pembelian empat (4) botol pelbagai jenama di bawah senarai SIPP yang mana harganya adalah terkawal untuk setiap hektar per musim berdasarkan keperluan oleh pesawah.

Kerajaan juga turut menyediakan dana sebanyak RM200 juta sebagai pinjaman agromakanan pada kadar faedah sifar peratus di samping moratorium bayaran balik pinjaman selama enam bulan di bawah Tabung Ekonomi Kumpulan Usahawan Niaga (TEKUN) dan Agrobank bagi manfaat pengusaha tanaman sayur-sayuran serta buah-buahan yang terkesan.

Disamping itu juga, bagi mengurangkan kesan kenaikan harga racun dan baja ini, Kementerian melalui Jabatan dan agensi telah memperkenalkan pelbagai inisiatif mengelakkan kebergantungan kepada baja kimia seperti:-

1. Menggalakkan petani mengamalkan Pengurusan Perosak Bersepadu (*Integrated Pest Management*) bagi mengurangkan kebergantungan terhadap racun kimia melalui kawalan secara kultura, kawalan fizikal dan kawalan biologi;
2. Menggalakkan dan mempromosikan penggunaan input pertanian berasaskan mikroorganisma berfaedah (*Effective Microorganism*) seperti 'Plant Booster', 'Growth Enhancer' dan 'Bokashi';
3. Menggalakkan penggunaan bahan sisa tanaman seperti jerami padi untuk dijadikan baja kompos; dan
4. Menjalankan aktiviti pengembangan bagi mendidik petani untuk menggunakan baja dan racun mengikut keperluan dan sukatan yang tepat dengan teknik-teknik yang betul supaya penggunaan racun dan baja adalah berkesan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : JAWAB LISAN

**DARIPADA : YB TUAN SIVAKUMAR VARATHARAJU
NAIDU [BATU GAJAH]**

TARIKH : 3 MAC 2022 (KHAMIS)

SOALAN

TUAN SIVAKUMAR VARATHARAJU NAIDU [BATU GAJAH] minta
**MENTERI PEMBANGUNAN WANITA, KELUARGA DAN
MASYARAKAT** menyatakan :-

- (a) progres Program Pemberian Kit Asas Kebersihan Wanita seperti yang dicadangkan semasa Belanjawan 2022 mengikut negeri; dan
- (b) mekanisme yang digunakan oleh Kementerian untuk mengenal pasti kumpulan sasaran dan proses menyampaikan bantuan tersebut.

JAWAPAN

Tuan Yang di-Pertua,

Melalui pengumuman Belanjawan 2022 ini, kerajaan telah mengambil inisiatif bagi membantu golongan yang memerlukan melalui pelaksanaan Program Pemberian Kit Kebersihan Asas Wanita Kepada Remaja Perempuan – Kit SERI (*Social Empowerment of Reproductive Health Initiatives*). Program ini akan melibatkan pemberian Kit Kebersihan Asas wanita dan program pendidikan kesihatan reproduktif serta pengurusan kebersihan haid kepada remaja perempuan di kawasan luar bandar dan bandar menerusi sekolah menengah terpilih.

Program ini melibatkan 2 agensi utama dalam pelaksanaan iaitu di bawah Kementerian Pembangunan Wanita, Keluarga dan Masyarakat (KPWKM) melalui Lembaga Penduduk dan Pembangunan Keluarga Negara (LPPKN) akan menjalankan pengisian program pendidikan kesihatan reproduktif selama 12 bulan dan Jabatan Penjara Malaysia akan menyediakan dan menghantar bekalan tuala wanita pakai buang bermula bulan Mei sehingga Disember 2022. Bagi memastikan agihan serta pelaksanaan program ini berjalan dengan lancar, Kementerian Pembangunan Wanita, Keluarga dan Masyarakat (KPWKM) melalui Lembaga Penduduk dan Pembangunan Keluarga Negara (LPPKN) telah mengadakan satu sesi taklimat mengenai Program Pemberian Kit SERI (*Social Empowerment of Reproductive Health Initiatives*) pada 12 Januari 2022 secara dalam talian melibatkan seramai 114 orang Pegawai Pejabat Pendidikan (PPD) dan Pegawai Jabatan Pendidikan Negeri (JPN). Taklimat ini bertujuan untuk memberikan maklumat mengenai mekanisme agihan bekalan kepada pelajar di sekolah menengah terpilih iaitu bekalan fasa pertama akan dijalankan oleh LPPKN untuk 4 bulan pertama (Januari hingga April 2022) dan 8 bulan berikutnya oleh Jabatan Penjara Malaysia.

Satu sesi Taklimat dan Bengkel Pendidikan SERI telah dilaksanakan secara dalam talian melibatkan 475 orang guru sekolah yang akan turut serta menyampaikan maklumat mengenai pendidikan kesihatan reproduktif dan pengurusan haid kepada pelajar. Bengkel Pendidikan SERI juga turut dilaksanakan kepada 52 orang Pegawai LPPKN dan *Teen Educators* yang akan melaksanakan program ini di sekolah-sekolah terpilih, Pusat Remaja KafeTEEN, Trak KafeTEEN, Kelab KafeTEEN di sekolah, dan mobile KafeTEEN.

Selain itu, pelaksanaan program *outreach* Kit SERI telah berjaya dijalankan di Sabah dan Johor dengan penyertaan seramai 350 orang remaja perempuan yang menerima Kit SERI pada bulan Januari 2022 setakat ini. Program advokasi kesihatan reproduktif ini mampu meningkatkan kesedaran dan pengetahuan SRH remaja dan seterusnya memastikan objektif program pemberian kit asas kebersihan wanita secara jangka panjang tercapai.

Untuk mengenal pasti kumpulan sasaran dan proses menyampaikan bantuan tersebut, proses ini melibatkan:

- 1) Kerjasama dengan Kementerian Pendidikan Malaysia (KPM) untuk mengenal pasti pelajar dari golongan B40 yang layak menerima bekalan ini melalui maklumat pangkalan data pelajar di bawah KPM. Pemberian bekalan Kit SERI ini akan diberikan secara berkala selama tempoh 12 bulan kepada **130,000 orang remaja perempuan berumur 13 hingga 17 tahun di 1,124 buah sekolah** terpilih menerusi Pejabat Pendidikan Daerah Negeri di seluruh Malaysia.
- 2) Kerjasama dengan Jabatan Kemajuan Orang Asli (JAKOA) dan Jabatan Kebajikan Masyarakat (JKM) bagi mengenal pasti kumpulan sasar yang tercicir daripada institusi sekolah dan tiada akses kepada bekalan tuala wanita pakai buang untuk edaran tuala wanita kain bagi penggunaan jangka masa panjang.

Kementerian turut mengambil berat isu yang melibatkan kesihatan reproduktif dan ini adalah sejajar dengan matlamat Dasar Pendidikan Kesihatan Reproduksi dan Sosial (PEKERTI) yang mengutamakan peningkatan kesedaran dan pemerkasaan masyarakat berkaitan kesihatan reproduktif. Justeru, Program Pemberian Kit Asas Kebersihan Wanita ini merangkumi program pendidikan dan advokasi kesihatan reproduktif yang merupakan satu inisiatif untuk memperkasa remaja wanita terutamanya golongan B40 agar meningkatkan ilmu kesihatan reproduktif dan kebersihan *hygiene* semasa haid. Justeru, **Program Pendidikan SERI** turut dilaksanakan oleh LPPKN Negeri dengan kerjasama guru di **270 buah sekolah** yang terpilih di seluruh Malaysia.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : JAWAB LISAN

**DARIPADA : YB TUAN SYED IBRAHIM BIN SYED NOH
[LEDANG]**

TARIKH : 3 MAC 2022 (KHAMIS)

SOALAN

TUAN SYED IBRAHIM BIN SYED NOH [LEDANG] minta **MENTERI PENGANGKUTAN** menyatakan langkah dan perancangan pihak Kementerian dalam menangani isu lambakan kenderaan lusuh dan terpakai.

JAWAPAN

Tuan Yang di-Pertua,

1. Secara amnya, Kementerian Pengangkutan (MOT) bersama Agensi-Agensi Kerajaan lain yang berkaitan seperti Kementerian Perdagangan Antarabangsa dan Industri (MITI) memberi perhatian kepada isu lambakan kenderaan motor yang tidak lagi sesuai digunakan di atas jalan raya sama ada dari aspek *road-worthiness* atau keselamatan penggunaannya serta dari aspek pencemaran kepada alam sekitar. Dalam hal ini, MOT sedia bekerjasama sama dengan agensi Kerajaan terbabit untuk mengkaji hala tuju jangka masa panjang mengenai perkara ini termasuk mengkaji konsep *End-of-Life Vehicle (ELV)*. Pelaksanaan konsep ELV berupaya menyumbang kepada peningkatan tahap keselamatan jalan raya, mengurangkan pencemaran daripada kenderaan yang telah lama dan berusia serta merancakkan permintaan kenderaan yang akan menyumbang kepada kelestarian sektor automotif negara.

2. Namun, konsep pelaksanaan ELV termasuk melibatkan komponen pemeriksaan berkala kepada kenderaan motor milik persendirian masih di peringkat kajian awal dan pelbagai faktor perlu diambil kira terutamanya dari aspek implikasi kewangan dan kesan sosioekonomi kepada rakyat Malaysia.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK IGNATIUS DARELL LEIKING
[PENAMPANG]**

TARIKH : 03 MAC 2022 (KHAMIS)

SOALAN

DATUK IGNATIUS DARELL LEIKING [PENAMPANG] minta **MENTERI KEWANGAN** menyatakan jumlah cukai yang telah dikutip dari Sabah bagi lima tahun kebelakangan ini dan jumlah yang telah dikembalikan kepada Sabah dalam tempoh masa yang sama seperti yang diperuntukkan dalam Perlembagaan Persekutuan Artikel 112C dan D.

JAWAPAN

Tan Sri Yang Di Pertua,

Di awal pembentukan Malaysia, Perkara 112C Perlembagaan Persekutuan (PP) dibaca bersama subseksyen 2(1), Bahagian IV, Jadual Kesepuluh, Perlembagaan Persekutuan memperuntukkan bahawa negeri Sabah berhak menerima Pemberian Khas bersamaan dengan dua perlima ($\frac{2}{5}$) atau 40% daripada hasil bersih negeri Sabah yang dikutip oleh Kerajaan Persekutuan.

Walau bagaimanapun, formula 40% tersebut tidak lagi terpakai oleh kerana kajian semula ke atas Pemberian Khas telah dijalankan dan dipersetujui bersama di bawah Perkara 112D Perlembagaan Persekutuan dalam tempoh 1969 hingga 1973 dan kadar Pemberian Khas tersebut berkuat kuasa sehingga kini.

Kerajaan Persekutuan dan Kerajaan Negeri Sabah baru sahaja memuktamadkan rundingan Pemberian Khas selaras dengan Perkara 112D Perlembagaan Persekutuan; dan perkara tersebut akan diumumkan secara bersama oleh YAB Perdana Menteri dan YAB Ketua Menteri Sabah dalam masa terdekat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' SRI BUNG MOKTAR BIN RADIN
[KINABATANGAN]**

TARIKH : 03 MAC 2022 (KHAMIS)

SOALAN

DATO' SRI BUNG MOKTAR BIN RADIN [KINABATANGAN] minta **MENTERI KEWANGAN** menyatakan apakah perancangan Kerajaan untuk meningkatkan peruntukan kepada Kerajaan Negeri Sabah bagi membolehkan kerja-kerja penyelenggaraan infrastruktur awam seperti jalan raya, bekalan elektrik dan air yang terjejas semasa musim tengkujuh dan kejadian bencana alam dapat dilaksanakan segera dan mengelakkan kerosakan dari bertambah teruk serta mengakibatkan pertambahan kos yang akan membazir.

JAWAPAN

Tan Sri Yang Di Pertua,

Sabah merupakan antara negeri yang menerima peruntukan terbesar di bawah Perbelanjaan Pembangunan yang disediakan oleh Kerajaan Persekutuan. Peruntukan pembangunan bagi negeri Sabah pada tahun 2022 adalah sebanyak RM5.2 bilion di mana daripada jumlah ini, sebanyak RM882 juta telah disediakan kepada kementerian-kementerian yang terlibat bagi projek-projek infrastruktur / jalan /bekalan air asas di Negeri Sabah. Oleh yang demikian, Kerajaan Persekutuan akan memberikan keutamaan dalam melaksanakan kerja-kerja pembaikan infrastruktur/jalan/bekalan air asas yang terjejas akibat banjir melalui penyusunan semula peruntukan pembangunan bagi kementerian yang terlibat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

DARIPADA : TUAN ANYI NGAU [BARAM]

TARIKH : 03 MAC 2022 (KHAMIS)

SOALAN

TUAN ANYI NGAU [BARAM] minta **MENTERI KEWANGAN** menyatakan status permohonan penyediaan kemudahan bank bergerak dan penyediaan kemudahan ATM ke kawasan pedalaman Sarawak. Nyatakan sama ada kemudahan ATM akan disediakan di Pekan Long Lama dan Pekan Beluru, Baram.

JAWAPAN

Tan Sri Yang Di Pertua,

Pihak Kerajaan dan Bank Negara Malaysia (BNM) mengambil maklum tentang kekurangan pusat akses kewangan terutamanya di kawasan luar bandar, dan peka terhadap kesukaran mendapatkan akses kepada perkhidmatan perbankan.

Selain daripada cawangan bank, terdapat saluran alternatif yang telah disediakan oleh institusi kewangan bagi menyokong dan meningkatkan penyampaian kemudahan asas perkhidmatan perbankan di kawasan pedalaman. Antaranya termasuk penyediaan ejen bank yang menawarkan beberapa perkhidmatan perbankan asas seperti penyimpanan dan pengeluaran deposit, khidmat pemindahan dana, pembukaan akaun, pembayaran balik pembiayaan dan pembayaran bil utiliti. Ejen bank terdiri daripada entiti perniagaan seperti kedai runcit, stesen minyak, pejabat pos, dan koperasi yang dilantik oleh pihak institusi

perbankan untuk menyediakan perkhidmatan perbankan asas, terutamanya di kawasan pedalaman yang jauh daripada cawangan bank. Pada masa ini, terdapat sebuah cawangan Public Bank yang menyediakan perkhidmatan ATM dan dua ejen Bank Simpanan Nasional (BSN) di sekitar Pekan Long Lama, Sarawak. Manakala, di Pekan Beluru terdapat sebuah ejen Agrobank dan tiga ejen BSN yang menyediakan perkhidmatan asas perbankan iaitu penyimpanan dan pengeluaran deposit

Walau bagaimanapun, pihak Bank ambil maklum masih terdapat keperluan untuk penyediaan transaksi tunai pada masa kini. Pihak BNM bersama pihak Kementerian Kewangan juga sedang berusaha untuk meluaskan inisiatif penyediaan transaksi tunai melalui Bank Bergerak dengan kerjasama institusi perbankan seperti yang diumumkan dalam Pelan PEMULIH pada 28 Jun 2021. Di bawah inisiatif PEMULIH ini, hampir seluruh negeri Sarawak telah disenaraikan sebagai keutamaan bagi menerima perkhidmatan Bank Bergerak mengikut kesesuaian lokasi, infrastruktur dan persekitaran, keperluan serta permintaan perkhidmatan kewangan seiring dengan pembangunan setempat. Antara perkhidmatan perbankan asas yang ditawarkan termasuk penyimpanan dan pengeluaran wang, serta khidmat nasihat mengenai perbankan secara digital. Perkhidmatan Bank Bergerak di bawah inisiatif PEMULIH sudah mula beroperasi secara berperingkat sejak suku keempat 2021.

Di samping itu, pihak BNM juga menggalakkan rakyat untuk melakukan urusan perbankan secara digital, termasuk menerima bayaran bantuan kerajaan melalui akaun bank, di mana transaksi perbankan boleh dilakukan di mana-mana dan pada bila-bila masa sahaja secara selamat. Perbankan digital juga diharap akan dapat meluaskan jangkauan perkhidmatan kewangan kepada kawasan-kawasan pedalaman, agar pengguna di seluruh Malaysia boleh mendapat manfaat daripada akses dan penggunaan perkhidmatan kewangan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : LISAN

**DARIPADA : DATO' SERI UTAMA HAJI MUKHRIZ BIN
TUN DR. MAHATHIR (JERLUN)**

TARIKH : 3 MAC 2022 (KHAMIS)

SOALAN

DATO' SERI UTAMA HAJI MUKHRIZ BIN TUN DR. MAHATHIR [JERLUN] minta **MENTERI PERTANIAN DAN INDUSTRI MAKANAN** menyatakan apa perancangan jangka panjang dan tindakan yang diambil untuk mengawal peningkatan harga bahan makanan hasil pertanian akibat daripada kebergantungan kepada input pertanian yang diimport. Apa Kementerian lakukan untuk menjamin bekalan makanan yang dihasilkan melalui sektor pertanian tempatan mencukupi, dihasilkan pada harga yang berpatutan dan membekalkan nutrisi yang memanfaatkan rakyat.

JAWAPAN

Tuan Yang Di Pertua,

Untuk makluman Ahli Yang Berhormat, secara umumnya, Kerajaan telah membelanjakan subsidi input pertanian bersubsidi berjumlah hampir RM1 bilion setahun dalam industri padi negara. Ianya merangkumi hampir 60% daripada kos pengeluaran padi sehektar dan bakinya ditanggung oleh para pesawah sendiri. Antara program-program subsidi bantuan input pertanian bersubsidi tersebut ialah Skim Baja Padi Kerajaan Persekutuan (SBPKP) dalam bentuk baja urea dan baja sebatian; Skim Insentif Pengeluaran Padi (SIPP) dalam bentuk bantuan baja NPK tambahan, baja, racun makhluk perosak dan pengapuran; Insentif Benih

Padi Sah (IBPS), dan Skim Baja dan Racun Padi Bukit (SBRPB) khusus untuk penanaman padi bukit di Sabah dan Sarawak.

Walau bagaimanapun, Kerajaan amat prihatin dengan keluhan para pesawah berikutan berlakunya peningkatan kos dan harga bahan racun yang ketara. Oleh yang demikian, Kerajaan telah menaikkan kadar bantuan bersubsidi racun makhluk perosak di bawah program SIPP daripada RM200/hektar per musim kepada RM300/hektar per musim untuk tahun 2022.

Kerajaan juga turut menyediakan dana sebanyak RM200 juta sebagai pinjaman agromakanan pada kadar faedah sifar peratus di samping moratorium bayaran balik pinjaman selama enam bulan di bawah Tabung Ekonomi Kumpulan Usahawan Niaga (TEKUN) dan Agrobank bagi manfaat pengusaha tanaman sayur-sayuran serta buah-buahan yang terkesan.

Selain itu, Kerajaan telah mula membuka permohonan untuk pemberian subsidi kepada penternak ayam pedaging dan ayam penelur bermula pada 28 Februari 2022 hingga 6 Jun 2022 bagi pengeluaran ayam daging dan telur bermula 5 Februari 2022 hingga 5 Jun 2022. Sebanyak RM528.52 juta disediakan untuk tujuan subsidi ini. Kadar pemberian subsidi sebanyak RM0.60/kg bagi ayam pedaging dan RM0.05/biji bagi telur gred A, B dan C. Pemberian subsidi ini akan melibatkan penternak persendirian, penternak *integrator/semi-integrator* dan juga penternak kontrak. Berdasarkan rekod pendaftaran penternak di seluruh negara, dianggarkan seramai 2,255 orang penternak akan menikmati subsidi ini.

MAFI juga telah mengatur langkah strategik dalam meningkatkan produktiviti sektor agromakanan bagi memenuhi permintaan pasaran tempatan dalam usaha untuk menstabilkan harga makanan menerusi:

- (i) pelaksanaan Program *Smart* Sawah Berskala Besar (*Smart* SBB) yang menyasarkan peningkatan purata hasil per hektar daripada 3.5 tan metrik kepada 7.0 tan metrik dalam tempoh Rancangan

Malaysia Kedua Belas (RMKe-12) melalui pelbagai kaedah pelaksanaan seperti pertanian kontrak, sewaan dan sebagainya;

- (ii) pembangunan dan pemerkasaan platform pemasaran produk agromakanan secara e-dagang bagi mengurangkan peranan orang tengah menerusi FAMA dan LKIM seperti Agrobazaar Online dan NEKMATBIZ serta kerjasama strategik dengan platform swasta;
- (iii) pembangunan makanan ternakan alternatif dan pembangunan industri benih tempatan bagi mengurangkan kebergantungan negara kepada import input pertanian selain menyumbang kepada kestabilan harga makanan;
- (iv) pemberian insentif kepada pengeluaran makanan yang selamat dan sihat bagi meningkatkan ketersediaan makanan berkhasiat dengan harga berpatutan di pasaran;
- (v) Program Bantuan Insentif Makanan Ternakan Ruminan melalui Skim Harga Bersubsidi Dedak Isirung Sawit (PKC/PKE) kepada penternak kecil ruminan sebanyak RM10 juta pada tahun 2022; dan
- (vi) kebenaran mengimport ayam bulat dan keratan ayam kepada pasaraya dan pemegang AP import sedia ada sehingga 10,000 tan metrik sebulan bermula dari Disember 2021 hingga Mei 2022 dari loji luar negara yang diiktiraf bagi mengatasi kekurangan bekalan ayam dalam negara.

MAFI yakin bahawa Inisiatif-inisiatif tersebut akan dapat menyumbang dalam memastikan bekalan makanan di pasaran munasabah harganya serta mampu dibeli oleh rakyat.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN MUHAMMAD BAKHTIAR BIN
WAN CHIK [BALIK PULAU]**

TARIKH : 03 MAC 2022 (KHAMIS)

SOALAN

TUAN MUHAMMAD BAKHTIAR BIN WAN CHIK [BALIK PULAU]
minta **MENTERI PELANCONGAN, SENI DAN BUDAYA** menyatakan :-

- (a) impak usaha sedia ada dalam menghidupkan Seni Warisan Tidak Ketara; dan
- (b) usaha serta perancangan seterusnya agar Seni Warisan Tidak Ketara terus dijaga dan dimanfaatkan buat generasi akan datang.

JAWAPAN

Tuan Yang di-Pertua,

1. Kementerian Pelancongan, Seni dan Budaya (MOTAC) sentiasa melaksanakan usaha memelihara dan memulihara Seni Warisan Tidak Ketara agar terus terjaga dan dimanfaatkan oleh generasi kini dan akan datang menerusi pelbagai inisiatif yang direncanakan selaras dengan tujuh (7) Teras Dasar Kebudayaan Negara.
2. Antara impak yang diperoleh hasil daripada usaha yang telah dilakukan bagi menghidupkan warisan kebudayaan tidak ketara termasuklah peningkatan kesedaran kepada orang ramai untuk melestarikan warisan kebudayaan tidak ketara dalam kalangan masyarakat selain menjadi satu kebanggaan kepada seluruh rakyat negara bagi memperkenalkan warisan tidak ketara ke persada dunia. Ini dapat dilihat melalui pewartaan sejumlah 529 warisan kebudayaan tidak ketara di bawah Akta 645 yang mana ia berjaya dilakukan hasil kesedaran masyarakat yang membantu dalam penyelidikan dan inventori bagi tujuan perlindungan.
3. Selain itu, Malaysia juga berjaya menerima pengiktirafan antarabangsa terutama daripada UNESCO terhadap usaha yang dilakukan berdasarkan prinsip-prinsip 2003 *Convention for the Safeguarding of the Intangible Cultural Heritage of Humanity*. Sebanyak tujuh (7) pengiktirafan UNESCO telah diperoleh bagi Warisan Tidak Ketara sejak tahun 2005 sehingga 2021.
4. Di samping itu, pelbagai usaha oleh MOTAC dan agensi-agensinya telah dilaksanakan dalam menghidupkan Seni Warisan Tidak Ketara agar seni warisan ini terus terpelihara dan diwarisi kepada generasi yang akan datang. Antaranya termasuklah:
 - (i) penyediaan Pelan Perlindungan (*Safeguarding Plan*) bagi tujuan memelihara dan melindungi warisan selaras dengan Akta Warisan Kebangsaan 2005 [Akta 645] dan “2003 *Convention for the Safeguarding of the Intangible Cultural Heritage*”;

SOALAN NO : 81

- (ii) pembangunan pangkalan data seni, budaya, warisan dan pelancongan yang komprehensif serta diperluaskan untuk kegunaan masyarakat khususnya generasi muda dan pelancong.
- (iii) pengisytiharan butiran Warisan Seni Tidak Ketara sebagai Warisan dan Warisan Kebangsaan di bawah Akta Warisan Kebangsaan 2005 (Akta 645) secara berterusan;
- (iv) penyelidikan dan dokumentasi dalam bidang Warisan Tidak Ketara seperti penerbitan buku dan video;
- (v) kerjasama dengan universiti-universiti tempatan melalui program 1IPT 1 Produk Seni;
- (vi) penganjuran Festival Seni Hidup @ *Living Arts Cultural Festival* (LACF) yang mengetengahkan kesenian yang telah diiktiraf oleh *United Nations Educational, Scientific and Cultural Organization* (UNESCO) serta mendapat pengiktirafan Warisan Kebangsaan;
- (vii) Program Perantisan yang bertujuan untuk memulihara, memelihara dan mengekalkan Seni Warisan Tidak Ketara terutamanya kesenian tradisional yang hampir pupus;
- (viii) penubuhan Pusat Seni Pentas Tradisional ASWARA (PuTRA) yang merupakan sebuah pusat kecemerlangan dalam kesenian tradisional. PuTRA bertanggungjawab dalam membuat penelitian, penyelidikan, pengembangan kesenian tradisional Malaysia dan melatih para pelajar ASWARA dalam seni persembahan tradisional;
- (ix) pelantikan Adiguru ASWARA berdasarkan khidmat dan kepakaran dalam bidang seni dan budaya sebagai pakar rujuk dalam bidang penyelidikan dan penerbitan;

SOALAN NO : 81

- (x) pembangunan inventori bagi Seni Warisan Tidak Ketara yang melibatkan kerja-kerja penyelidikan dan daftar warisan kebangsaan; dan
- (xi) penyeliaan tokoh / tenaga pakar Seni Warisan Tidak Ketara untuk dibawa kepada jawatankuasa pakar.

5. Antara inisiatif-inisiatif yang akan dilaksanakan termasuklah:

- (i) meneruskan promosi dan pengembangan ilmu melalui kaedah pameran/aktiviti/manifestasi seperti LACF 2022, Karnival Lenggong (mempromosi makanan warisan), Festival Permainan Tradisi dan lain-lain;
- (ii) menganjurkan Persidangan Antarabangsa, penyelidikan bersama agensi lain, bengkel, aktiviti keilmuan (seminar/forum/kolokium/dan lain-lain) serta pelan media seperti Bengkel Pengenalan Asas Warisan Kebangsaan Mak Yong, Bengkel Paluan Kompang dan lain-lain seumpamanya;
- (iii) meneruskan usaha pemuliharaan, pemeliharaan, perlindungan dan pengekalan warisan seperti Pendigitalan Dokumentasi serta menambah baik Buku Garis Panduan dan Tatacara Perlindungan Warisan Tidak Ketara; dan
- (iv) mengadakan Program Perantisan Warisan Kebangsaan Orang Hidup (WAKOH), dan Program Perantisan mengikut negeri serta pertunjukan persembahan di Panggung Seni Tradisional (PST).

Sekian, terima kasih.